

萬有文庫

第二集七百種

王雲五主編

大方廣佛華嚴經

(七十)

實叉難陀譯

澄觀撰述

商務印書館發行

大方廣佛華嚴經

(七十)

實又難陀譯

澄觀撰述

國學基本叢書

大方廣佛華嚴經疏鈔會本卷七十一

佛子何等爲菩薩摩訶薩聞藏。

疏第五聞藏分三初徵名。

此菩薩知是事有故是事有是事無故是事無是事起故是事起是事滅故是事滅是世間法是出世間法是有爲法は無爲法是有記法は無記法。

疏二釋相中二初明所知之法後菩薩摩訶薩下顯多聞之意。今初標稱聞藏釋云知者聞爲本故實則多知耳文亦分二先標章後牒釋今初句雖有十義束爲七初之四句但是緣生故謂一緣生二有漏五蘊三無漏五蘊四有爲五無爲六有記七無記鈔聞爲本故者大品第六須菩提白佛言何等一切法中無礙相應學應知釋曰卽多知義下佛答中與此列大同佛言一切法者善不善法無記法世出世間法有漏法有爲法無爲法共法不共法釋曰此十但共不共此中略無以一向是不共般若故彼經云何爲共法四禪四無色四無量心四無色定如是等法是名共法智論釋云凡夫聖人生處入定處所共故名爲共法經云何等名不共法四念處乃至十八不共法是名不共法論釋云菩薩分別知此諸法各各無相是法從因緣和合生故無性無性故自性空釋曰此卽聖人法不共凡夫如十八不共亦不共二乘也餘大同此。

何等爲是事有故是事有謂無明有故行有何等爲是事無故是事無謂識無故名色無何等爲是事起

故是事起。謂愛起故苦起。何等爲是事滅。故是事滅。謂有滅故生滅。

疏二何等下牒釋。卽爲七段。初緣起中。依生引二門。開爲四重徵釋。謂十二支。初二能引。次五所引。次三能生。後二所生。故爲四也。鈔依生引二者。然第六地廣顯其相。今文略引。然此一段疏文有三。一總顯生引。

疏然依雜集第四十二。有支皆具。此有彼有等義。故彼論文釋支相云。相者。謂無作緣生故。無常緣生故。勢用緣生故。此有彼有者。顯無作緣生義。唯有緣故。果法得有。非緣有實作用。能生果法。此生故彼生者。顯無常緣生義。非無生法爲因故。少有法生而得成立。無明緣行等者。顯勢用緣生義。雖復諸法無作無常。然不隨一法爲緣。故一切果生。以諸法功能差別故。鈔二然依雜集下。以三緣生會釋經文之意。文二。先正說三緣生。故彼論云。云何緣生。幾是緣生。何義觀緣生耶。問也。謂相故。分別支故。釋曰。彼有十五義。今略用一二耳。論名相者。謂無作緣生故。無常緣生故。勢用緣生故。是緣生相。由此三故。薄伽梵說。此有故彼有。此生故彼生。爲無明緣行。乃至廣列也。此有故彼有者。顯無明緣生義等。具如疏文。卽是釋也。功能差別下。更云。如從無明力故。諸行得生。乃至生力故。得有老死。

疏然今經中。欲顯緣起無性。舉前二門。勢用一門。六地廣辨。就二門中。從增勝說。前後互舉。前七許同。因位故名能引所引。後五要因果相望。云能生所生。由此能所引中。但云此有彼有。後文則云。此起彼起。卽生也。故集論云。謂於因時。有能引所引。於果時。有能生所生。鈔然今經中下。第二會釋經文。有五。一正明二門。然此有彼有等。亦兼勢用正顯二相。故指勢用在於六地。就二門下。二出其影略。言

前後互舉者。謂能所引中。明無作緣生。能所生中。明無常緣生。前七許同下。三出生引。所以言許同者。據三世義。初二次五。過現不同。約二世義。許得同世。但引五種。故不名生。由此能所下。四出此經影略之由。以前於能所引中。無作義顯而影取無常。能所生中。無常義顯。影取無作。故集論下。五引證生引之相。

疏然文有染淨二觀。初於能引中。明染觀。故云無明有故。行有。第二約所引。亦通能所相對。以明淨觀。故云識無故名色無。以識通能引。有二種業。一持諸有情所有業縛。謂與行所引習氣俱生滅。故二與名色作緣。謂由識入母胎。名色得增長。今言識無者。卽不爲業熏。不持業縛。故不入胎增長名色。故云識無故名色無。鈔然文有下三釋文。初句標。言染淨觀者。六地廣明。謂無明緣行等。前能生後。生死流轉爲染。無明滅行滅等。反本還源。爲清淨耳。初能引中。下二別釋。卽爲四番。初番可知。第二約所引。下約所引。明淨。例前亦合。云識有故名色。有前文亦合。有無明無故。行無。以識通引下。釋上亦通能所引義。正義正取識名色爲所引義。今釋上言通能所引。若識支通能引。名色唯所引。故識與名色。是能所引。對於中先反釋經文。約染觀。明然識通能所引者。若取識種爲識支。卽是所引。若取行種爲識支。識是能引。行是能引。故今舉二業。初業是能引。以取行習氣爲識支。故實是行種。與識俱。故名爲識支。卽集論意。正取業種以爲識支。識種乃是名色。支攝而緣起經。通能所引。業種識種。俱名識。故識種但是名色所依。非名色故。今第二意。卽是識爲能引。云與名色作緣。謂由識入母胎下。兼顯現行二果。然今下經。義通能所。故六地云。於諸行中。植心種子。卽具二也。其二種業言。卽六地自業助成。章中。然彼

二業云。識有二種業。一令諸有相續。二與名色作生起因。今取其勢。以能所引而爲二業。約持行種。卽是能引。約其自體。卽是所引。今言識無者。上反釋經。今順釋也。反上二義可知。

疏第三能生所生相對。以明染觀。故云愛起。故苦起。苦卽當果。愛卽能生。能生有三。舉初攝末。下明淨觀。舉末攝初。蓋巧辨影略耳。第四亦能所生相對。以明淨觀。謂因亡果喪耳。鈔第三下。能生所生相對。上愛取有是能生。生死爲所生故。

疏後之三門。皆能所相望。何以無明與行。唯約能引而相望耶。答欲顯十二支皆有無作無常二門。故於初一位。相次以明不爾。則謂要四位相望。方得此有彼有。故下之三門。欲顯四位不同。故能所相望。又爲顯能引支中。或二或三。故於前二。別爲一段。蓋說智之妙也。鈔後之三門下。料揀初問。然第二門。識與名色。識雖有能引之義。正取所引故。三皆能所相對。又爲下。重顯前二相次爲一。所以識支是所引。則能引唯二。識是能引。則能引有三。若識取所引。則上四番而爲三類。初一唯就能引明。第二唯就所引說。三四通能所相對。故顯十二一一相望。皆得此有彼有。此生彼生等。不必要能引所引能生所生相對。以明。方有此有彼有等。故云說者之妙。

何等爲世間法。所謂色受想行識。

疏第二有漏五蘊者。積聚義。雜集第一云。藏果。重擔義。而標名世間者。世卽隱覆義。隱覆勝義故。又可破壞義。三世所遷故。問者。墮虛僞中故。隱覆之法。卽墮虛僞故。世卽是問。無色等蘊。通於無漏出世之義。欲呵毀故。略舉一分。鈔二有漏下文五一釋總名。已見光明覺。雜集藏果等者。卽第二論其藏。

果義與蘊義大同。重擔與陰覆義大同。然彼論云。蘊義云何。答。諸所有色。乃至若近若遠。彼一切略說。色蘊積聚義故。如財貨蘊。如是乃至識蘊。釋曰。此即藏果義。蘊藏色等果法耳。言重擔者。論云。荷雜染擔。故名爲蘊。如肩荷擔。荷雜染擔者。謂煩惱等諸雜染法。皆依色等故。譬如世間身之一分。能荷於擔。即此一分。名肩。名蘊。色等亦爾。能荷雜染。名之爲蘊。而標名下。二釋世間。世有三義。隱覆名世。通爲無爲。如世界成就品。下二唯有爲世間。世卽是間。持業釋也。然色等下。三料揀言通無漏者。謂佛五蘊。況因滅無常色。獲常色等。兼通無爲。今但取有漏有爲蘊。不攝無爲。義不相應故。留於無漏。在後段說。疏云。何知之。應知三種。一。知其相。謂色以變礙爲相。受以領納爲義。想者取像。行謂遷流。識者了別。二。知其生滅。謂生無所從來。滅無所至。三。知其不生不滅。謂法本不生。今則無滅。故力林菩薩云。分別此諸蘊。其性本空寂。空故不可滅。此是無生義。況知一切法趣蘊。蘊卽法界無礙。方名眞實多聞。鈔云。何知下。四釋知相。卽大品意。前文已引。初知相中。言色以變礙爲相。俱舍第一中。色有二義。一變壞義。論問云。始自眼根。終乎無表。世尊何故說爲色耶。答。可變壞故名爲色。蘊釋曰。變者。顯刹那無常。壞者。顯衆同分無常。論問云。誰能變壞。謂手觸故等云云。卽便變壞。廣說乃至蚊虻等觸。此變壞者。卽是可破壞義。二變礙義。論云。有說變礙故名爲色。釋曰。變謂變壞。礙謂質礙。若爾。極微應不名色。無變礙故此難不然。無一極微。各處而住。衆微聚集。變礙義成。餘廣如彼。雜集亦二義。一問名色。蘊何相。答。變現相是色相。此有二種。一觸對變壞。二方所示現。觸對變壞者。謂由手足。乃至蚊虻。他所觸對時。卽便變壞。方所示現者。謂由方所隨何相示現。如此色如是。如是色等。受以領納者。雜集問云。受蘊何相。答。領

納相是受故。謂領種種淨不淨業。所得異熟。又唯識云。受謂領納順違。俱非境相爲性。想以取像者。即唯識文。下云。施設種種名言爲業。謂要安立境分齊相。方能隨起種種名言。雜集云。構了相是想相。由此想故。構了種種像類。所見聞覺知之義。起諸言說。行以遷流者。俱舍云。造作遷流二義。名行。雜集云。造作相是行相。由此行故。令心造作。謂於善惡無記品中。驅役心故。釋曰。俱舍二義。今取遷流。欲訶毀故。識以了別者。俱舍云。識謂各了別。論云。了別名識。此有六種了別不同。故名爲識。雜集云。了別相是識相。由此識故。了別色聲香味觸法等種種境界。況知一切法趣色者。即於第三義中。傍況此義。亦大品云。一切法趣色。色尙不可得。云何當有趣及非趣。天台爲三觀釋云。初句假。次句空。後句中。然經文。但顯性空。今疏引意。卻取一法趣色。明事事無礙。一中有無量義故。是名善巧多聞。疏然諸蘊性。性皆遷流。隨勝立名。行之一種。雖標總稱。即受別名。又攝法多故。鈔然諸蘊性下。第五解妨。此即以通爲別。妨釋有二義。初一可知。又攝法多者。第二釋也。因此略明五蘊攝法多少。且依大乘百法。識蘊唯攝八識。心王。色蘊唯攝十一種色。想受二蘊。但攝心所。徧行中二數。四蘊但攝二十一法。除六無爲。蘊所不攝。餘七十三。皆行蘊攝。故云多也。百法已見第一疏鈔。何等爲出世間法。所謂戒定慧解脫解脫知見。

疏第三無漏五蘊。亦名無取五蘊。然無漏蘊。亦有二類。一仍本名。亦名色等。不與漏相應。故名爲無漏。二從已轉立名。即五分法身。如今文是。欲顯戒等德。是可欣。故從極果。標以出世。理實亦有世間戒等。鈔理實亦有者。上五蘊亦有出世間。然世間戒等。自有二義。一者外道。共有十善等戒。四禪等定。世

智之慧。脫下地惑。於中知見。二者正教之中。亦說十善五戒四禪八定。無見慢修。欣厭之慧。脫下界縛。了見分明。而是有漏。故名世間。

疏戒定慧三。上來頻釋。解脫即是離繫爲名。解脫知見。由離繫縛。於境自在。觀求覺了。智論八十八云。戒衆者。攝一切戒。和合成衆。衆即蘊也。餘皆準之。

疏然即轉前五蘊。成此五分。謂轉色蘊。成於戒身。表無表戒。皆色蘊故。轉受蘊。而成定名。定名正受。入四靜慮。出四受故。轉想成慧。凡所有想。皆是虛妄。見相非相。見法身故。轉行爲解脫。無貪等行。名心解脫。永斷無智。慧解脫故。轉識成解脫知見。若與邪受。妄想相應。謂識依根了別諸境。若與正受智慧相應。即是現量。如實知故。仁王觀空品云。觀色識受想行。得戒忍。知見忍。定忍。慧忍。解脫忍。即斯義也。鈔然即轉下三。立所由二。先正釋。即智論及仁王意。仁王下引證。如次配之。居然可了。然新經即菩薩行品。經云。復次道種性菩薩。修十迴向。起十忍心。謂觀五蘊色受想行識。得戒忍。定忍。慧忍。解脫忍。解脫知見忍。觀三界因果。得空忍。無想忍。無願忍。觀二諦假實。諸法無常。得無常忍。觀一切法空。得無生忍。今即前五文。是舊經。故次與此不同。

疏知見與慧。此二何別。佛地論第四。總有三說。略舉其一。謂無漏淨戒。名爲戒蘊。無漏定慧。名定慧蘊。無學勝解。名解脫蘊。無學正見。名解脫知見蘊。前三是因。後二是果。鈔知見與慧下。四釋妨難。即相濫難也。佛地三說者。今即第一釋。二云。一切皆是無礙。緣解脫慧。名解脫知見。緣解脫慧者。緣滅諦智也。緣餘慧者。緣餘三諦等智。三云。一切通學無學。學位分得。無學圓滿。諸佛菩薩。皆有五故。疏此五別。

說四法爲性。謂定慧勝解及無表色。鈔此五別說下。五出體。以解脫知見及慧。約所照異。故同是慧。慧卽與想相應。解脫知見。卽與識相應。慧耳。

疏然此五分法身。不覆勝義。不爲相遷。不墮虛僞。故名出世。雜集云。謂能對治三界。無顛倒。無戲論。無分別。故是出世間義。鈔然此下。六會釋總名出世。所以引雜集證。卽上第一論也。

疏問。無取五蘊。卽有爲無漏。何以言不爲相遷。答。約教異故。前是權小所明。若實教定說。非爲無爲。同真性故。但似蘊相現立。以蘊名故。涅槃純陀云。善覆如來有爲之相。應言如來同於無爲。況二融攝。若如是知名爲多聞。鈔問。無取下。七會通權實。然雜集第三。亦云。無取五蘊。當言有爲。當言無爲。答。彼不應言有爲無爲。何以故。諸業煩惱無故。不應言有爲。隨欲現前故。不應言無爲。所以者何。無取諸蘊。隨所樂欲。而現其前。無爲不爾。以常住故。釋曰。此乃假說雙非。以約體用互奪。亦不敢定言無爲也。又言無取五蘊。則顯凡夫是有取五蘊。雜集云。取蘊者。與取合故。取者。蘊中諸煩惱也。純陀故實。已見玄談。

何等爲有爲法。所謂欲界、色界、無色界、衆生界。

疏第四有爲者。瑜伽一百云。有生滅繫屬因緣。是名有爲。智論云。有所得故。是名有爲。二論心境爲異。今略舉四事。三界卽所依處。衆生卽能依之者。鈔。瑜伽屬因緣者。正理論第一云。有爲者。衆緣聚集。其所生故。未來未起。何爲有爲。是彼類故。亦名有爲。如所燒薪。於未燒位。是彼類故。亦名爲薪。或據會當立名無失。如琴瑟等名。爲有聲。亦如乳房蓮華池等。諸未生法。不越彼類。故名有爲。其有生滅。此語

猶略。雜集論云。若法有生滅住異。可名有爲。一切法皆有爲。唯除法界法。法處一分。爲捨執著。無常我故。釋曰。此中論答三問。一答云。何爲有爲。二一切法下。答幾是有爲。三爲捨下。答爲何義。故觀有爲。今略舉四者。理實智論。大品等。廣有多法。大品云。何等有爲法。若法生住滅。此釋有爲義。欲界色界無色界五蘊。乃至意識。因緣所生。受四念處。乃至十八不共法。爲一切智。是有爲法。智論釋云。有爲法略說三相。一所謂生住滅。二三界繫義。三四念處。乃至十八不共法。雖有無爲法。以有作故。是有爲法。無爲相。是無爲法。釋曰。今以十八不共等。屬有記法。故但略出其四。衆生則攝蘊處界也。

疏然所依處。隨心成異。故論云。欲所屬界。名欲界等。鈔故論云者。卽俱舍第八等字。等餘二界。云色所屬界。名爲色界。無色所屬界。名爲無色界。略其所屬二字。但名欲界等。如言胡麻飲。及金剛環。飲之與環。俱是總名。胡麻金剛。並爲別稱。以別依總。名胡麻飲。及金剛環。具足應言。胡麻所屬飲等。略去所屬。但云金剛環等。界者總名。欲等別稱。略去中言。云欲界等。論云。此中欲言。爲說何法。答。略說。假食。姪所引貪。注云。姪貪名貪。貪食名欲。然語猶隱。本業上卷云。佛子。見著二業。迷法界中一切欲心故。欲所起報分。爲欲界報。佛子。見著二業。迷法界中一切色心故。色心所起報分。爲色界報。佛子。見著二業。迷法界中一切定心故。定心所起報分。爲無色界報。是故於一法界中。有三界果報。若更令易見。欲界有男女形。姪欲受身故。色界無男女形。唯有色故。無色界。謂無色故。前本業言。見著者。彼經說有七見六著。經云。佛子。無明者。名不了一切法。迷法界而起三界業果。是故我言。從無明藏。起十三煩惱。所謂邪見。我見。常見。斷見。戒見。盜見。疑見。七見。見一切處求。故說見。復起六著心。貪愛。瞋癡。欲慢。於法界中一

切時起一切煩惱。以十三爲本。無明與十三爲本。是以就法界中。別爲三界執。卽云見著二業等。如前所引。

何等爲無爲法。所謂虛空涅槃。數緣滅。非數緣滅。緣起。法性住。

疏第五無爲爲者作也。卽前生滅。今虛空等。寂寞冲虛。湛然常住。無彼造作。故名無爲。瑜伽云。無生滅。不繫屬因緣。是名無爲。智論云。無所得故。名爲無爲。淨名云。不墮數故。然諸論總名。大旨無別。鈔瑜伽下引證。如次論對前二義。雜集云。無生住滅。故名無爲。不墮數故。卽淨名阿難章云。佛身無爲。不墮諸數。數卽有爲。餘義但翻上有爲。故疏結云。諸論總名。大旨無別。

疏然其名數開合不同。小乘多說三種。卽此中初及三四。諸大乘中。掌珍說四。謂加眞如。法相論中。或說有六。復加不動。及想受滅。謂於擇滅中。滅惑障。故名爲擇滅。滅定障。復加後二。或開爲八。於眞如中。開出三性。謂善法眞如等。漸欲展此眞如。徧諸法故。鈔然其下二開合中。然小乘多說三種者。卽俱舍等論云。無漏謂道諦。及三種無爲。謂虛空二滅。而言多者。分別論有四。一虛空。二非擇滅。三想受滅。四眞如。大衆部說九無爲。謂三及四空。緣起支性。聖道支性。化地部亦九。三外加不動。三性。道支。緣起。諸大乘者。於小乘三上加眞如故。或說有六。唯識論等。廣如下說。或開爲八者。雜集第二云。無爲法。有八種。謂善法眞如。不善法眞如。無記法眞如。空虛。擇滅。非擇滅。不動。及想受滅。如是建立八無爲中。當知所依有差別故。分析眞如。假立三種。不由自性。善法眞如者。謂無我性。空性。無相。實際。勝義。法界。何故眞如說名無我。由彼自性。無變性故。謂一切時。無我實性。無改轉故。說無變異。當知此則是無我。

性離二我故。何故復說此名空性。一切雜染所不行故。所以者何。由緣此故。能令一切諸雜染事悉皆空寂。有時說染。但是客塵。諸相寂靜。故名無相。無倒所緣。故名實際。實者。謂無顛倒。此處究竟。故名爲際。最勝聖智所行處。故說名勝義。一切三乘妙法所依。故名法界。如善真如。不善無記。當知亦爾。餘如彼論。言漸欲下。疏出論意。

疏此經說六於擇滅中開出涅槃。二道別故。復加緣起。顯無一事。不卽真故。略無二定。未究竟故。鈔此經說六下。第三釋文於中。二先總明有無。

疏言虛空者。離諸障礙。無物所顯故。鈔言虛空下。二別釋。多用唯識。有六無爲。卽爲六段。初虛空。釋語全是百法疏意。卽唯識依性。假施設有義。彼論先釋法性云。謂空無我所顯真如。有無俱非。心言路絕。與一切法。非一非異等。是法真理。故名法性。離諸障礙。故名虛空。釋曰。彼論明法性空。但言離諸障礙。百法兼取外空。云無物所顯。故俱舍云。此中空無礙。

疏二涅槃者。古有二釋。一云性寂滅故。此卽性淨涅槃。涅槃三十四。亦同此說。此與擇滅顯未顯殊。一云卽性淨之果。此卽解脫道後。擇滅乃在無間道中。然大乘非擇滅。旣約性淨。又下說法性。則後解爲正。鈔二涅槃者。涅槃卽同擇滅。先明性淨。乃傍出異義耳。涅槃三十四者。此卽刊定記釋。謂同此經所說虛空及涅槃也。故涅槃經釋緣生四句中云。有非緣生。非十二因緣者。謂虛空涅槃是也。此則同性淨義。後義爲正。云性淨之果。卽圓淨涅槃。應有問言。若是果者。何殊擇滅。由因果殊。故分二道。所以第一總明中。以此義爲正。云於擇滅中開出涅槃。二道別故。然其大乘下。斷上二義。則後解爲正者。若

唯識解非擇滅云。不由擇力。本性清淨故。

疏三。數緣滅者。數謂慧數。由慧爲緣。揀擇諸惑。能顯滅理。故唐三藏譯爲擇滅。謂擇力所得滅。名爲擇滅。然此滅言。有其二義。一理性寂滅。此從所顯得名。二因滅惑顯。名理爲滅。則從能顯得名。鈔三。數緣滅下。故唐三藏出其異名。擇力所得者。是俱舍論釋。故彼喻云。如牛所駕車。名曰牛車。略去中言。故作有說。但云擇滅。唯識釋云。由揀擇力。滅諸雜染。究竟證會。故云擇滅。然此滅言下。別釋滅字。此二義稱滅。若兼能滅之智。智亦稱滅。

疏四。非數緣滅者。非由慧數滅惑所得。但以性淨。及於緣闕之所顯故。鈔四。非數緣滅者。故唯識云。不由擇力。本性清淨。及緣闕所顯。名非擇滅。釋曰。論存二義。初義異小。故上疏文取爲楷定。言緣闕者。俱舍論云。畢竟礙當生。別得非擇滅。下釋中云。言當生者。當來生法。緣會則生。緣闕不生於不生時。得非擇滅。此非擇滅。礙當生法。令永不不起。名畢竟礙。言別得者。謂非擇滅有實體性。緣闕位中。起別得故。非擇滅得。不因擇滅。但由緣闕。名非擇滅。論指事明云。如眼與意。專一色時。餘色聲香味觸等。謝緣彼境界。五識身等。住未來世。畢竟不生。由彼不能緣過去境。緣不具故。得非擇滅。釋曰。謂眼綠色時。亦合緣聲等。以專注色故。耳等不緣聲等。同時聲等。剎那已謝。故令緣聲等識。更不復生。以前五識唯緣現量。不緣過去。而言觸等者。等取法中有與能緣。同時爲所緣境者。如他心智所緣境是也。此他心智。唯緣現在心王。亦合緣心所。以專注心王故。於心所得非擇滅故。

疏五。緣起者。有別有通。別謂十二因緣故。分別論者。大衆一說。雞胤化地。說出世部。皆立十二緣起。以

爲無爲。彼意以其次第作緣。恆無雜亂。故說爲常。有佛無佛。此法自爾。名曰無爲。故智論二十二云。聲聞法中。亦說法性實際。故維阿含中說。有一比丘問佛。十二因緣。爲是佛作。爲是餘人作。佛告比丘。我不作。十二因緣。亦非餘人作。有佛無佛。諸法如法。相法位常有。所謂是事有故。是事有等。涅槃亦說。卽是無爲。遠公云。就人論法。三世流轉。是其有爲。廢人談法。法相常定。故曰無爲。望今經意。緣起無性。故曰無爲。大品云。菩薩觀十二因緣。如虛空不可盡。涅槃云。十二因緣。卽是佛性。雖舉十二因緣。卽已攝陰界諸法。鈔智度下。引大乘論證成上義。此中論文。先有問云。聲聞法中。何不說法性實際。而摩訶衍中。處處說耶。答。聲聞法中。亦說下。與疏同。玄中已引涅槃。亦說下。三引大乘經立無爲義。先引涅槃。卽北經迦葉菩薩品。第三十四經。而爲品初。南經三十一。北經半卷向後。列二十一。諍論。此卽第六經云。或說十二因緣。是有爲法。或有說言十二因緣。是無爲法。至第三十五方釋。經中具云。善男子。我經中說。云何名爲十二因緣。從無明生行。從行生識。從識生名色。從名色生六入。從六入生觸。從觸生受。從受生愛。從愛生取。從取生有。從有生。從生有。老死憂悲苦惱。善男子。我諸弟子。聞是說已。不解我意。唱言如來說十二因緣。定是有爲。我又一時告喻比丘。作如是言。十二因緣。有佛無佛。性相常住。善男子。有十二因緣。不從緣生。有從緣生。非十二因緣。有從緣生。亦十二因緣。有非緣生。非十二因緣。有緣者。謂凡夫人所有五陰。有非緣生。非十二因緣者。謂虛空涅槃。善男子。我諸弟子。聞是說已。不解我意。唱言如來說十二因緣。定是無爲。釋曰。若經中言。爲與無爲。俱不解意。若遠公釋。各有所以。然有二

意。今疏是第一意。第二意云。真就因緣事中。現在之者。名曰有爲。在未來者。未現起用。名曰無爲。釋曰。後釋順經後四句意。前釋順經初意。又智論等意。望今經下疏第四出今意。次言大品云下。引他經證成上正義。此卽中論青目所引。釋初因緣不生之義。涅槃又云者。復引涅槃重成上義。卽北經三十二師子吼品經云。善男子。無明不能吸取諸行。行亦不能吸取於識也。亦得名爲無明緣行。行緣識。有佛無佛。法界常住。若言佛性住衆生中者。善男子。常法無住。若有住處。卽是無常。善男子。十二因緣無定住處。若有住處。十二因緣不得名常。如來法身亦無住處。法界法入法陰。虛空。悉無住處。佛性亦爾。都無住處。次下又云。佛性者。名十二因緣。何以故。以因緣故。如來常住。一切衆生。定有如是十二因緣。是故說言一切衆生。悉有佛性。十二因緣卽是佛性。佛性卽是如來。釋曰。此上經意。正取十二因緣之性。以爲佛性。故是無爲。文中雖舉下第二通釋。難云。若緣起無性。卽無爲者。諸蘊界等。豈有性耶。故爲此通。則意無不該。是故上引涅槃云。法界法入法陰。虛空。卽說三科。皆無住處。同佛性也。

疏六法性住者。卽真如也。謂非妄倒。故名真如。又真實如常。揀妄揀事。於一切位。恆如其性。而云住者。離遷變。故與法爲性。是隨緣義。復云住者。是不變義。卽妄卽真。事皆如矣。若準智論。法性法住。各是一義云云。卽爲七法。鈔法性住者。卽真如也。顯此法性。卽唯識等真如異名耳。謂非妄下。別釋其名。初釋真如。自有二義。初合釋。唯揀於妄。二離釋。卽唯識云。真謂真實。顯非虛妄。如謂如常。表無變易。是故疏云。揀妄揀事。二釋法性名。唯識偈云。此諸法勝義。亦卽是真如。常如其性故。卽唯識實性是也。次釋住字。亦有二義。一連上釋之。則三字一名。謂上之二釋。順法相宗。加此住字。順法性宗。法性爲隨緣。住

字爲不變。以隨緣不失自性故。二義既具。卽妄卽真。故是法性宗義。若準智論下。別釋取上法字。及下住字。自爲一義。成七無爲。則法字兩用。

疏然小乘說三虛空。則就外空。復計三皆實有。若大乘說。非唯數增。義亦有異。唯識論中。二義建立。一唯心變故。二依法性假施設有。謂此諸義。但一真如。隨義假設。一無相義。二所證義。三惑盡義。四性淨義。五隨緣義。六隨緣卽不變義。鈔然小乘下。對揀權實。初舉小乘。若大乘下。舉大斥小。非唯數增。已如前說。義亦有異。次下。正明小乘之義。略如上說。廣如唯識。廣引廣破。唯識論下。正辨大乘無爲之相。卽第二論。論中先破諸小乘宗等。計於無爲爲實有。竟顯正義云。然契經說有虛空等諸無爲法。略有二種。一依識變假施設有。謂曾聞說虛空等名。隨分別有虛空等相。數習力故。心等生時。似虛空等無爲相現。此所現相。前後相似。無有變易。假說爲常。釋曰。此空無爲。而無本質。唯心所變。猶如極微。假而無體。於佛等處。聞其名。故而心變之。次論復云。二依法性假施設有。謂空無我所顯真如。有無俱非。心言路絕。與一切法非一非異等。是法真理。故名法性。離諸障礙。故名虛空。由揀擇力。滅諸雜染。究竟證會。故名擇滅。不由擇力。本性清淨。或闕緣所顯。故名非擇滅。苦樂受滅。故名不動。想受不行。名想受滅。釋曰。疏取論意。以釋經文。但順經有不順論。有上釋非擇。有其二義。依此論文。疏此中法性。卽是真如。然法性真如。亦假施設。遮撥爲無。故說爲有。遮執爲有。故說爲空。勿謂虛幻。故說爲實。理非妄倒。故名真如。爲法之性。名爲法性。非離色心。別有實體。今多聞之人。不唯知名而已。應如是知。鈔五出體性。卽彼論示無爲體。論云。此五皆依真如假立。真如亦假施設。下至故名真如。皆

是論文爲法之性故名法性。是疏義加亦卽前文唯識論意。非離色心別有實體者。取論意結具足論云。不同餘宗離色心等。存實常法名曰眞如。故諸無爲非定實有。釋曰。言眞如亦是假者。不得體故。遮空見者。說如爲有。遮小乘中化地部等。執定實有。故說爲空。非言無爲體卽空也。勿謂虛幻者。虛揀徧計。幻揀依他。卽顯眞如是圓成實。以無虛妄顛倒法故。名眞如也。

大方廣佛華嚴經疏鈔會本卷七十一

何等爲有記法。謂四聖諦。四沙門果。四辨。四無所畏。四念處。四正勤。四神足。五根。五力。七覺分。八聖道分。疏第六有記法者。有釋云。謂能招愛非愛果。故名有記。此乃通說。餘處辨記。卽是善惡。今唯舉善。應云。順理善法。可記錄故。鈔第六有法中二。先釋總名。先敍昔。卽刊定記。大品亦云。若善法。若不善法。是名記法。如所說相。不捨離故。此乃通說。下辨非。以下無記。既非三性。今此有記。安得無之。後今唯下辨正。

疏下出所記法體。句有十一。義攝唯五。四聖諦。如前本品已辨。四沙門果。如梵行品。四辨。如第九地。三十七品。如第四地。鈔下出所下辨相。先指所餘。如前後釋。不欲繁文。疏四無所畏。今當略明。謂外難無怯。故名無畏。瑜伽云。如來於此謗難。都不見有如實因相。由是因緣。能自了知。坦然無畏。無畏爲四。一切智無畏。二漏盡無畏。三者障道。四出苦道。鈔四無畏義下。唯釋此一言。今當略明者。諸經多以五門分別。一辨名。二出體。三行相。四次第。五諸門。今疏但有三门。略無出體。次第。卽分爲三。初釋名。二辨相。三諸門分別。初中有二。先總名。上二句指文。都不見有如實因相者。謂其所難。皆就跡生疑。不知所觀真實之理。故此所難。無如實因。若實有可難。則有怯畏。所難不實。何所畏耶。無畏有四。二釋別名。文中但列而不解釋。釋名含在下行相中。故此略無。若具釋者。一切智無畏者。瑜伽亦名正等覺無畏。謂有正覺覺諸法。故名一切智。二漏盡者。諸煩惱漏。種現俱斷。

故。三障道者。亦名障法。說障礙法。染必有障。故四出苦道者。說出離道。諸聖修習。決定出苦。故於此四
中得無所畏。皆依主釋。謂一切智之無畏等。

疏此四各有難答。初外難云。若佛是一切智者。有諸比丘。從他方來。何須問言。安樂住不。言一切智
無所不知。今問於他。一何相反。佛自唱言。我是一切智人。但爲攝受來者。隨順世間師弟人事故。鈔
此之四段下。二辨相初。一切智無畏難。有二。初牒舉所難。二有諸比丘下。正難於中。先出難所因。謂諸
部律中。多有此言。時諸比丘。至如來所。頭面禮足。佛便問言。比丘住止安樂不。乞求易得不。不以飲食
爲苦耶等。今云何故問者。卽是難也。言一切下。結成難也。佛自唱言下。答也。於中先按定所難。明不失
一切智義。若具皆云。我於此難。正見無由。得安隱住。無怖無畏。自稱我是大仙尊位。但爲攝受下。出是
一切智之所以。示現問耳。非已不知。言攝授者。令發勝心。聞佛慰問。發道心故。隨順世間師弟人事故。
此有二意。一者成上示現之相。二者亦令餘人審諦於事。佛知尙問。況餘不知。亦爲後人作軌則故。見
來發心。應爲引攝。故云隨順世間。

疏二有難云。若佛自言漏永盡者。何以愛語羅睺。呵罵調達。佛於此難。正見無由。安隱無怯。自唱德號。
我實漏盡。但爲隨根而調伏故。鈔二有難云下。第二無畏。先難中文。但有二。先牒舉所難。謂經中說
言。我諸漏已盡。何以愛下。正難難之所因。含在其中。謂羅睺羅被僧驅出。在於廁上。佛語諸比丘言。云
何野干。驅師子子。卽愛語羅睺。調達。頻爲惡行。佛時罵言癡人。或云食睡小兒等耶。佛於此難下。亦先
按定所難。不失漏盡之義。但爲隨根而調伏故。卽出愛悲。所以謂羅睺臂之慧象。隨逐人心。軟言卽調。

調達喻之惡馬。楚毒方調。非是如來有愛羅眠。有悲調達。漏未盡也。

疏三有難云。若佛說欲能障道者。何故預流一來。尚有妻子之愛。佛於此難。心無怯懼。謂自唱德號。我說欲能障道。但障不盡羅漢。非初二果。鈔佛於此下。答中亦二。先按所難。不失欲爲障道。若具亦應云。我於此難。正見無由安隱無怯。處大仙位。故云自唱德號。我所說下。出不障所以。若說邪行。障諸聖道。若說畜妻。障離欲道。初二果人。性戒久成。故斷邪行。既未離欲。不斷妻子。斯有何失。故諸染法。非不障也。

疏四有難云。若佛說諸聖道能盡苦者。何故羅漢受瘡潰蛇螫之苦。佛於此難。心無怯懼。自唱德號。我說聖道。實能盡苦邊際。但說未來。非現在故。鈔四有難下。第四無畏。先難亦二。先牒所疑。謂如說我爲弟子。說出離道。諸聖修習。決定出離。決定通達。何故羅漢下。正難。既瘡潰蛇螫。豈非苦耶。羅漢豈是無聖道耶。豈非相違。佛於此難下。答亦應具云。我於此難。正見無由安隱無怖。處大仙位。我說聖道下。通前難。然有二意。一者由於前世故業感身。於此身上。得阿羅漢。苦依身在。故有此苦。非得羅漢後有此苦。卽今疏意。更有意云。無學實無苦果。爲現惡因。必有苦報。由此聖者。示相受苦。起後教故。亦猶世尊受金鎗等。示義非實。故疏略無。疏四中初一離所知障。次離煩惱障。三是出離道障。四卽出離之道。初二自利。後二利他。所以自歎此四者。初一爲菩薩。第二爲聲聞。後二通爲智論二十五。瑜伽五十對法十四。廣辨其相。鈔四中初一下。第三諸門分別。卽瑜伽論文三。初約離障。言三是出離障道者。欲爲道障。今出離故。四是出離之道者。諸出離道。能出於苦。然其後二。並約離煩惱障。三是所離之障。四

是能離之道。而三就離因爲難。四就離果爲難。亦可後二通約因位。初二自利下。二利料揀。然約答難。並是利他。如次下明。今約前二。就佛身難。是約自利德嘆。後二約化他爲歎。故云利他。所以歎此下三。彰歎所以。亦約被根差別。則是皆利義。菩薩爲求種智。斷所知故。初一爲之。二乘求盡諸漏。第二爲之。欲皆障於三乘。三乘皆期出苦。故後二並爲智論二十五下。總示其源。然菩薩藏經第五。般若五十三。顯揚第四。亦廣明之。此中卽有次第出體。言次第者。德用自在。智最勝故。首而明之。由具一切智。能盡諸漏。由具智斷。說法化生。說法之中。先說生死因。後出生死故。而此一門。卽前二利門中。已攝此意。若瑜伽對法。出苦爲第三。障道爲第四。先果後因。亦如苦集。又依上次者。卽倒對四諦。謂一切智約眞道爲難。二約眞滅爲難。三約集因。四約苦果。未見經論。義必應然。若出體者。總有五種。一剋性體。卽信進念定慧爲體。二引發體。若定若慧。三最勝體。卽正體。後得二智。四中初一通二智。二卽正體。三四皆後得。以是說法心故。若約自住。四皆正體。約能答難。此四並以後得爲性。四相應體。四蘊爲性。五眷屬體。五蘊爲性。亦猶十力道共定共。無表戒色。助答難故。上之四體。卽瑜伽五十七。及雜集說。瑜伽云。以信進念定慧。及具知根爲性。對法云。若定若慧。及彼相應諸心心所。又云。若起作用。後得智爲性。若住自性。正體智爲體。第五亦以義加。又無畏若約德。初卽智德。二卽斷德。三四恩德。今就能知。並智爲體。餘義可知。

何等爲無記法。

疏第七無記中分二。先徵名。後謂世間下辨相。今初無記二義。一非善非惡。不能招感受。非愛果。名

爲無記。可釋餘文。今此正謂虛妄推度。非理問難。不可記錄。故名無記。非對善惡故。俱舍第十九云。諸契經說十四無記。卽其義也。亦名置記。記卽答也。不應答故。鈔第七無記。初徵名四。一釋總名。判定亦立二義。而以前義爲正。今依諸論。以後爲正。俱舍第十九中。第二明無記。中自分爲二。一明無記報。二因便明四記。前卽對善惡之無記也。廣如彼論。第二別明四無記事。頌曰。應一向分別反詰捨置記。如死生殊勝。我蘊一異等。釋曰。上兩句指事釋之。且問記有四。一應一向記。二應分別記。三應反詰記。四應捨置記。記者答也。如問死者一切有情皆當死。不應一向記。一切有情皆定當死。如問生者一切有情皆當生。不應分別記。有煩惱者受生。無煩惱者不生。如問殊勝。應反詰記。有作是問。人爲勝劣。應反詰言。爲何所方。若言方天。應記人劣。若言方下。應記人勝。釋曰。下卽惡趣論。如問我蘊一異者。應捨置記。謂若作是問。我與五蘊爲一爲異。應捨置記。此不應問。若有我體。可問一異。本無我體。一異不成。如問石女生兒。爲白爲黑。應捨置記。謂石女本無兒。何得論其白黑。此上依毘婆沙說。頌言等者。等取發知本論。及契經說。今當敍經云。云何有問應一向記。謂諸行皆無常耶。此問名應一向記。云何有問應分別記。謂若有問諸有故。思造作業已。爲受何果。此問名爲應分別記。造善受人天。造惡受惡趣。謂若有問士夫報。與我爲一爲異。此問假我。應反詰言。汝依何我。作如是問。答言依籬我。色蘊上我。應記與報異。報色不同。故言異也。此問名爲應反詰記。云何有問但應捨置答。若有問世爲常。一問無常。二問亦常亦無常。三問非常非無常。四問世爲有邊。五問無邊。六問亦有邊亦無邊。七問非有邊非無邊。八問如來滅後爲有。九問非有。十問亦有亦非有。十一問非有非非有。十二問爲命者卽身。十三問爲

命者異身。十四問此問名爲但應捨置。此十四問皆不可記名。十四不可記事。以我體既無。是故皆應捨置。答也。涅槃三十五。亦有四答。而一名小異。謂從經一半向後。因迦葉難佛性義有無。如來答云。善男子。如來爲衆生故。四種答。一者定答。二分別答。三隨問答。四者置答。如問作惡得何果耶。應答得苦果。是名定答。二善男子。如來十力。四無所畏。大悲。三念處。首楞嚴等。八萬億諸三昧門。三十二相。八十種好。五智印等。三萬五千諸三昧門。金剛定等。四千二百諸三昧門。方便三昧。無量無邊。如是等法。是佛性者。如是佛性。則有七事。一常。二我。三樂。四淨。五眞。六實。七善。是名分別答。如汝先問斷善根人有佛性者。亦有如來佛性。亦有後身菩薩佛性。是二佛性。障未來故。得名爲無。必定得故。得名爲有。是名分別答。三經云。如我所說一切法無常。復有問言。如是世尊。爲何法故。說於無常。答言。爲有爲法故。無我亦爾。爲何法故。說一切燒爲煩惱故。是名隨問答。四經云。若有說言。斷善根人。定有佛性。定無佛性。是名置答。下迦葉難云。不答名置。如來今者。何因緣答而名置。佛答云。善男子。我亦不說置而不答。名爲置答。善男子。置答復二。一者遮止。二者莫著。以是義故。得名置答。釋曰。據上諸文。明是不答以爲無記。非善惡中之無記也。據十四難。正同俱舍。準涅槃意。今文正當爲遮止義。兼令莫著。

疏所以不答者。何謂此乃無義語也。知之不免生死。不知不障涅槃。前說有記。則反於此。智論第三云。所以不答十四難者。此事無實故。諸法有常。無此理故。言斷亦爾。如有人問。穀於牛角。得幾升乳。豈曰問耶。復次世界無窮。猶如車輪。復次無利有失。墮惡邪中。覆於四諦。諸法實相。復次人不能知。復次稱法說故。第十七云。有一比丘。思唯十四難。不能解。辭佛不爲弟子。佛言。我爲老病死。人說法濟度。此是

鬪諍法。如中毒箭。不應推尋。楞伽亦云。皆是世論。非我所說。鈔智論第三下。正引論釋。先引第三。有五復次。多同答十四難。兼經中諸無記法。如第一無實事故。正答十四。第二如車輪。卽答何等爲生死。最初際。第三無利有失。兼答世界來去等。以從集因生。歸寂滅理。妄徵來去。卽覆四諦。第四人不能知。兼答有幾佛幾衆生。以佛智知無盡法故。第五復次。兼答佛等先後。通意可知。第十七下。二引此文。卽引昔例。今其文稍略。具云。有一比丘於十四難。思惟觀察。不能通達。心不能忍。持衣鉢至佛所。白佛言。佛能爲我解此十四難。使我了者。當作弟子。若不能解。我當更求餘道。佛言。癡人。汝共我要誓。若答十四難。汝作弟子耶。比丘言。不也。佛言。汝癡人。今何以言若不答我。不作弟子。我爲老病死。說法濟度。此十四難。是鬪諍法。於法無益。但是戲論。何用問爲。若爲汝答。汝心不了。至死不解。不能得脫。生老病死。譬如有人。身被毒箭。親屬呼鑿。欲爲出箭塗藥。使言未可出箭。我先當知汝姓字。親里父母年歲。次欲知箭出在何山。何木。何羽。作箭鏃者。爲是何人。是何等鐵。復欲知弓何山木。何蟲角。復欲知藥是何處。生是何種名。如是等事。盡了知之。然後聽汝出箭塗藥。佛問比丘。此人可得知此衆事。然後出箭。不比正言。不可得知。若待盡知。此則已死。佛言。汝亦如是。爲邪見箭。愛毒所塗。已入汝心。欲拔此箭。作我弟子。爲不欲拔箭。而欲求盡世間常無常邊無邊等。求之未得。卽失慧命。與畜生同死。自投黑暗。比丘慚愧。深識佛語。卽得阿羅漢道。復次菩薩。欲作一切智人。推求一切法。知其實相。十四難中。不滯不礙。知其是心重病。能出能忍。是名法忍。釋曰。卽疏下文引論廣破。及經結多聞之意是也。論文引毒箭之喻。與涅槃大同。前已引竟。楞伽亦云。卽第三經。佛令慎勿習近世間諸論。舉昔有婆羅門來問我云。

瞿曇一切所作耶。我答婆羅門言一切所作是初世論。彼復問言一切非所作耶。我復報言一切非作是第二世論。復問言一切常耶。無常耶。生耶。不生耶。我報言是六世論。復云一耶。異耶。俱耶。不俱耶。一切因種種受生現耶。我報言十一世論。廣說云云。我言悉是世論。非我所說是汝世論。我唯說無始虛偽妄想習氣種種諸惡。三有之因不能覺知自心現量。而生妄想攀緣外性。彼復問意癡愛業因故有三有耶。爲無明因耶。我報言此二者亦是世論。彼復問言一切法皆入自相共相耶。我復報言此亦世論。婆羅門乃至意流妄計外塵皆是世論。又問頗有非世論不耶。佛答意云外道中無我論中有非世論。汝諸外道不能知以外性不實妄想虛僞計著故。謂妄想不生了覺有無自心現量。妄想不生不受外塵。妄想永息是名非世論。此是我法。非汝有也。偈中云乃至心流轉是則爲世論。妄想不轉者是人見是心來者謂事生去者事不現明了知去來。妄想不復生。解曰前偈無妄見後偈了知妄滅。據今經文正明是前文一段所有妄計。其再問癡愛因緣等雖是正義。不了自心故爲世論。故智論云覆諸法實相亦卽涅槃通遣著故。

疏言十四者卽此中前四四句。其第四四句但合爲二。謂身與神一身與神異。鈔言十四者下第三示十四相可知。若歷五蘊三世成六十二見對前已說。

疏然諸經論多說十四難而相或同異不繁會釋。今經委論不出我法二執。鈔然諸經論下第四總會異說言相或同異者多同少異。諸處亦說名十四不可說俱舍十九已如上說。正與此同。智論十七卽釋大品大品二十一佛母品云復次須菩提佛因般若波羅密諸衆生心數出沒屈伸如實知世尊

云何知之。佛言。一切衆生心數出沒屈伸。皆依色受想行識生。佛於如是中。知衆生心數出沒屈伸。所謂神及世間常。是事實。餘妄語。是見依色。神及世間無常等。三句準知。及世間有邊。是事實。餘妄語等。四句準知。皆是見依色。末云。依受想行識。亦如是。神卽是身。是見依色等。異身亦然。依受想行識亦然。又云。死後有如去。是事實。爲妄語。是見依色。二死後無如去。三死後或有如去。或無如去。二句同初結云。依受想行識。亦如是。釋曰。斯卽歷蘊諸句。小異耳。涅槃三十九。先尼梵志問。有我耶。無我耶等。廣有問難。亦是小異之相。繁不出之。

謂世間有邊。世間無邊。世間亦有邊。亦無邊。世間非有邊。非無邊。世間有常。世間無常。世間亦有常。亦無常。世間非有常。非無常。如來滅後。有。如來滅後無。如來滅後亦有。亦無。如來滅後非有。非無。我及衆生有。我及衆生無。我及衆生亦有。亦無。我及衆生非有。非無。

疏文分五段。第一有四四句。就我明無記。第二過去下。就三世橫論。凡聖數之多少。三何等下。約凡聖豎論。初後四世間。從何下。徵三世間所從。五何者下。約生死際畔。以辨無記。鈔文分五段下。第二辨相。便有釋文。就常等破。皆中論意。

疏今初。句雖十六。其過不出。斷常言世間者。華大品中。通三世間。謂衆生世間。五蘊世間。及器世間。今此文意。正顯衆生世間。兼明五蘊世間。以衆生是總。主假者。外道計以爲我。故有邊等諸見。初有邊四句。約未來世。常等四句。約過去世。如來有無。依涅槃起。故中論邪見品云。我於過去世。爲有。爲是無。世間常等見。皆依過去世。我於未來世。爲作。爲無。作。有邊等諸見。皆依未來世。涅槃品云。如來滅後。有無。

等。依涅槃起。我及衆生有無四句。約現在說。鈔今初段中句雖十六下。釋此第一就我明無記。先辨見所依。後正釋文。今初有三。一明不離斷常。言世間下。二明世間同異。明見依我起。準大品者。卽上二十一經。而三世間。是智論釋。論云。世間有種等。餘如疏辨。初有邊四句下。三釋此我不同。不出三世。涅槃爲起見處。就引中論邪見品云。我於過去世等者。偈首之我。卽今世我。意問今世之我。於過去世。爲先已有。爲先未有。若先已有。卽是計常。若先無。今此雖起。卽是無常。三則雙立。四則雙非。邊等諸義。次下當釋。中論涅槃品偈云。滅後有無等。無邊等常等。諸見依涅槃。未來過去世。釋曰。此卽總示所依。依前別配可知。

疏旣知起見之本。次隨文別釋。卽爲四段。第一四句。言有邊者。卽斷見外道。計我於後世更不復作。則與此身俱盡。無邊者。謂我於後世更有所作。三俱句者。身盡故有邊。我不異故無邊。四俱非句者。亦以我存身盡。見上有過。故立此句。謂身盡故。非無邊。我存故。非有邊。旣皆邪見。故不答之。若欲破者。初之二句。墮無後世過。謂有邊則與陰同盡。無邊則是今身。故皆無後世。無後世者。修道苦行。爲何益耶。第三句。亦有邊無邊者。若身盡我存。身我爲一。爲異。一則不應有盡。不盡。異則離蘊。何相知有我耶。若謂捨人生。天人分。猶在天分更增。則半天半人。故皆不可。第四句。非有邊。未免於無。非無邊。未免於有。云何於此強分別耶。鈔第一四句者。然論先明常等。後說邊等。廣破常等。例破邊等。今順經次。先明邊等。文中有三。初辨四句之相。卽前偈中。我於未來世。爲作爲無作。初以無作爲有邊。而是斷見外道。亦先偈首之我。是今世我。四句之相。疏文自明。旣皆邪見下。二明無記義。卽出不答所以也。若欲破者。

初之二句。皆墮無後世過者。合破二句。論云。若世間有邊。云何有後世。若世間無邊。云何有後世。釋曰。有邊則後無續。故無後世。無邊則是今身。故無後世。有邊則斷。無邊則常。無後世者。下出無後世過。亦卽斷常過也。論又云。五陰常相續。猶如燈火焰。以是故世間不應邊無邊。前出過破。定有定無。故墮斷常。今立理破。如焰從緣。不可爲無。無定實。故不可爲有。故離二邊。又前破人我。此破法我。今經正破人我。故不引破法。又論反破云。若先五陰壞。不因是五陰。更生後五陰。世間則有邊。若先陰不壞。亦不因是陰而生後五陰。世間則無邊。釋曰。此亦正破五陰世間。五陰和合。爲衆生世間。旣破五陰。卽破衆生。衆生卽假我故。上云外道依之計我。今破五陰。亦已破我。又上二偈。亦別破二句。亦兼明第三俱句。第三句等者。然論廣破常等。後例邊等。故論云。我於未來世。爲作爲不作。如是之見者。皆同過去世。然破邊等。無有身一異。破身一異。卽是前破常等。今依論例破。故取前勢。若論破第三句云。若世半有邊。世間半無邊。是則亦有邊。亦無邊。不然。彼受五陰者。云何一分破。一分而不破。是事則不然。受亦復如是。云何一分破。一分而不破。釋曰。前偈破衆生。卽是遣我。後偈破受陰。卽是破法。然俱是相違破。無有一法亦常無常故。此相難見。故疏取前破常等例。前破常偈云。若謂我卽是。而身有異相。當知離於身。何處別有我。離身無有我。是事爲已成。若謂身卽我。若都無有我。但身不爲我。身相生滅。故釋曰。此則破常等。以一異門。今將例破邊等四句也。若謂捨人生天下。遮救卽論正破邊等之意。然偈云。若天卽是人。則墮於常邊。天則爲無生。常法不生。故若天異人者。是卽爲無常。若天異人者。是則無相續。釋曰。前偈破常。卽破無邊。後偈破斷。卽破有邊。次偈云。若半天半人。則墮於二邊。常及於無常。是事則不然。

今疏卽影公取偈之意。捨人生天人分。猶在天分更增等。上卽縱立。則半天下正破。結言略明。故皆不然。不然之由。卽如偈文亦常無常二相相違。猶如水火義無並立。第四句下論。但躡前破云。若有邊無邊。是二亦應成釋曰。此卽縱破。亦相待破。有第三句可待。對此有第四非有邊無邊句。以有無相待。故今無第三之源。何有第四之末。疏中卽出過破。非有遮有故。未免於無。非無遮無。安得離有。故還成亦有亦無。無第四俱非之義。以皆執取。非中道故。云何於此下結斥邪見。

疏二常等四句約過去者。過去世我卽是今我。名之爲常。若常卽有大過。破壞因果涅槃等故。若謂我今始生。名爲無常。若爾我是作法。亦墮無因。無因則亦無涅槃等。第三見上二過。便謂我常身無常。離身何處有我。又成上二過。第四謂我不異故。非無常身有異故。非常破同第三句。又中論云。一切法空故。何有邊無邊。及常等見。餘義廣如彼論。鈔二常等四句者。上破邊等。先出四句。後方別破。今則常句。便立便破。初常句中。先立然前問偈云。我於過去世。爲有爲是無。卽問今之現我。過去先已有耶。今初句云。有故。過去世我卽是今我也。論初常句云。過去世有我。是事不可得。過去世中我不作。今我若言常者。卽有大過等者。出過破也。卽彼長行云。先世中我不作。今我有常過故。若常則有無量過。何以故。如人修福。因緣故作天。然後作人。若先世我卽是今我者。天卽是人。以罪業因緣故。作旃陀羅。後作婆羅門。若先世我卽是今我。旃陀羅卽是婆羅門等。若謂我今下卽第二句。亦先立。後若爾下破。有二種破。先因緣破。緣作是無常法。立我常故。二墮無因故。故論云。過去我不作。是事則不然。過去世中我異。今亦不然。若謂有異者。離彼應有今。我住過去世。而今我自生。如是則斷滅。失於業果報。彼作而

此受有如是等過。先無而今有。此中亦有過。我則是作法。亦爲是無因。釋曰。此中初二句。牒計總非。次二句。標有異過。次二偈。二世相對。以辨異過。末後一偈。獨就未來。以彰其過。上二句。標下二句。顯第三句。由今始有。故成作法。卽障無常。次句。指同前非。云亦是也。前失業果。卽是無因。今我自生。豈非無因。第三見上下。謂見前二過。便卽雙立。從離身下破。卽前所引偈中。卽離門。又成上二過者。亦常同初句。亦無常同第二故。第四句。但翻用前句。而立破。則還第三論偈。但云。如過去世中。有我無我見。若共若不共。是事皆不然。又中論云下。卽品末之偈。總結上過。示以性空。末後又偈云。瞿曇大聖主。憐愍衆生。故悉斷一切見。我今稽首禮。卽總結一品也。

疏三。如來滅後四句。釋有二義。一明如來者。非是佛也。如卽相似。來謂從前際來。謂一有執云。如從前世來。生此間。去向後世。亦復如是。故云。如來滅後有。謂如前來時有故。此由計我異陰故。二云。如從前世來。此間。死後斷滅。故云。如來滅後無。謂不如來時去故。此計陰我一故。三由計我有籠細故。謂籠我與身俱盡。故云。不如去。細我異陰。不同滅故。亦如來時而去。故云。如來滅後亦有亦無。四云。我如虛空。體無來去。故。管經云。如來滅後。如去。不如去等。此則通望三世。以辨若依中論。附涅槃起四句。如來卽佛也。順此經文。亦是外道自立已師。而爲如來。有謂如來滅後。定有不變。或謂入無餘依。同於太虛。或謂法有應無。或謂約應非有。約法非無。以其四句。皆成戲論。不見如來寂滅相故。亦爲邪見。此則權小之徒。未能免也。瑜伽八十七云。依二道理。如實隨觀。俱不可記。如來滅後。若有若無。所以者何。且依勝義。彼不可得。况其滅後。或有或無。若依世俗。爲於諸行。假立如來。爲於涅槃。若於諸行。如來滅後。無有。

一行流轉可得。爾時何處假立如來。既無如來。何有無等。若於涅槃。涅槃唯是無行所顯。絕諸戲論。自內所證。絕戲論故。施設爲有。不應道理。亦復不應。施設非有。勿當損毀。施設妙有。寂靜涅槃。又此涅槃。極難知故。最微細故。說名甚深。種種非一。諸行煩惱斷所顯故。說名廣大。現量比量。及正教量。所不量故。說名無量。鈔三如來滅後。下前明見所依。從其後義。云依涅槃起。而其前義。通依三世我陰而起。順於普經。若依中論下第二意。於中二。先定見所依。及如來不同。以外道自謂勒沙婆等。是世尊。是如來故。故百論中。敍得相形。言優樓佉等。亦是世尊故。有謂如來滅後者。別示四句。先示可知。以其四句。下明破無記之意。上依中論涅槃品偈云。如來滅度後。不言有與無。亦不言有無。非有及非無。涅槃與世間。無有少分別。世間與涅槃。亦無少分別。涅槃之實際。及與世間際。如是二際者。無毫釐差別。釋曰。初之一偈。依二諦說。後之二偈。唯依第一義。與瑜伽同。瑜伽八十七下。證成上義。則顯中論初偈。俱通二諦。約世諦中。唯釋二句。等字。等於三四。約涅槃中。但釋初二句。又此涅槃下三義。通顯離四句。絕百非。中論末後偈云。一切法皆空。何有邊無邊。亦邊亦無邊。非邊非無邊。何者爲一異。何有常無常。亦常亦無常。非常非無常。諸法不可得。滅一切戲論。無人亦無我。佛亦無所說。釋曰。此偈可結無記一段。以文相續。故此引耳。

疏四。及我衆生有無等四句。此並雙立。衆生卽是五蘊。非約總主。有卽定有。定有著常。無卽定無。定無著斷。三遠上二過。雙立有無。卽墮相違。四。避此相違。立俱非句。又成戲論。然此四句。亦有單計。我有所無。所有我無。亦不離初二句。又合上成第三。互尊成第四。亦不出初二句。鈔四我及衆生等者。

雙立我法。衆生卽蘊。蘊卽法故。故疏直就緣生法理。以辨有無。然此四句。大品智論俱舍等。於此但立二句。大品等云。身與神一。及異成二句。俱舍卽命與身。卽及離成二句。初句云。俱有者。謂有執云。但有身處。則有神。我有神。我處。其必有身。身之與神。不相離。故釋曰。此卽身神一句。故智論云。神卽是身者。有人言。身卽是神。何以故。分析此身。求神不可得。故受之。籠妙皆是身。故言身卽是神。身異神異者。有人言。神微細。五情所不得。亦非凡夫人所見。攝心清淨。得禪定人。乃能得見。是故言身異神異。復次。若身卽神。身滅神亦滅。是邪見。身異神異。身滅神常。是邊見。釋曰。論文但釋二句。今經中初句。是論初釋身神一句。第二句。是論復次身卽是神。身滅神滅。是邪見。第三句。正是身神異句。雖籠妙之異。身在俱有。身無俱無。爲俱句也。第四卽復是身神一句。以身隨神。體皆妙。故俱離有無。然此四句者。此對前經中二雙立故。亦是智論約邊見意。其我有所無。正同智論身滅神常。二所有我無者。身籠可見。我無相故。言亦不離初之二句者。我有所有。合是初句。我無所無。合爲第二。又合上成第三者。初句我亦有。第二句我亦無。初句所亦無。第二句所亦有。故合爲第三。第四既合一處。故互相奪。如我有合我無。則我非有。所有合所無。則所非有等。遮無卽爲第一。俱有句。遮有卽爲第二。俱無句。故云。亦不出初之二句。問。如初我及衆生有。卽是邪見。以計我故。次句云。我及衆生無。則是二空。有何過耶。故疏中云。定無著斷。以執定故。非緣生無。亦應破云。約計實我。此我非有。隨世假我。此我非無。故說俱無。亦非當理。過去有幾如來。般涅槃。幾聲聞辟支佛。般涅槃。未來有幾如來。幾聲聞辟支佛。幾衆生。現在有幾佛住。幾聲聞辟支佛住。幾衆生住。

疏第二門明三乘凡聖數之多少者。以橫無邊故。不可記也。

何等如來最先出。何等聲聞辟支佛最先出。何等衆生最先出。何等如來最後出。何等聲聞辟支佛最後出。何等衆生最後出。何法最在初。何法最在後。

疏第三門。豎無際故。不可記也。有人答問云。有初佛言自然悟。引獼祭天。亦爲應機。甯加置記。若有初佛。如來應知。則可說名。言何法者。染淨等一切法也。鈔第三門。豎明中。言有人答問者。卽水南善知識。答燕國公張說。問云。法在前佛在前。答云。法在前。諸佛所師。所謂法故。便被難云。若爾。最初成佛。前無佛說。何由悟法。答云。自然而悟。如月令中。獼乃祭天。豈有人教。燕公大伏。亦爲應機者。歎其善對。甯加置記者。爲順經文。從若有初佛。下出不及置記。所以既有初佛。悉數難窮。如來具足一切種智。直舉初佛。則可示矣。故雖善對。未息難源。言何法者。染淨一切法者。卽如真妄前後之難也。初會略明。初地當廣。

世間從何處來。去至何所。有幾世界成。有幾世界壞。世間從何處來。去至何所。

疏第四門。徵世間所從。有六句。初二句。問衆生及蘊世間。次四句。約器世間。以外道計衆生。有最初生故。或謂從冥諦中來。還至冥故。或謂世界皆微塵成。謂至妙之色。常恆不變。聚則爲身器。散則成微塵。故此皆邪見之源。故不應答。鈔第四門。徵世間所從中。其諸邪見。初卷已廣。

疏有情世間。不言成壞者。瑜伽云。有情望器。有五不同。一。謂器界生死。共因所生。有情生死。但由其故。是因不同。二。器有除斷。有情流轉不斷。故是時不同。三。謂三災壞不壞。故名法不同。四。器界因無永

斷有情不爾。名斷不同。五器則斷而復續。有情斷已無續。名續不同。以斯義故。略無成壞也。鈔器界生死共因者。出現品說三謂三災。但壞器界不壞有情。先令有情生上界。竟方壞器界。故四器界因無永斷者。如染刹之因已亡。不復更修染因。招染刹也。有情染因雖滅。陰識不滅。五器界斷而復續者。約招成壞之利。壞後更成。有情若捨異生之性。終不更爲凡夫矣。然此與四似當相違。而四則器界約因斷。果不生。有情因斷。果不失。五器界約果斷。果更續。有情約妄因已斷。妄果不續。何者爲生死最初際。何者爲生死最後際。

疏第五約生死初後際。唯有二句問。初際無始。聖教所明。生死有終。豈非正理。答略有三義。一約一人。則可云終。通望一切。則無終極。二以彼定執。長邪見故。亦不應答。謂若許有終。必有始。故常法無始。亦無終。故三約法性。皆不可說。故中論云。大聖之所說。本際不可得。生死無有始。亦復無有終。若無有始終。中當云何有。是故於此中。先後共亦無。既言本際不可得。亦不應定謂無始無終。況有始終之見耶。又有偈云。眞法及說者。聽者難得故。是故則生死非有邊無邊。鈔謂若許有終。必有始。故亦如初地。中論云。大聖之所說等。卽本際品偈。此中初偈。引教立理。顯無始終。次二句。仍上遣中。以無始終。可待對。故後兩句。遣其先後。略有三義。謂應有問言。生死二法。爲先生後死。爲先死後生。爲生死一時。一時名共。今且總非。下有偈出。非所以云。若使先有生。後有老死者。不老死有生。生不有老死。若先有老死。而後有生者。是則爲無因。不生有老死。釋曰。前偈破先生後死。生必因死。今先有生。則不因老死。而有。故云不老死有生。則亦令生無有老死。先獨生。故後偈破先死後生。生是死因。今死在前。則爲無因矣。

次破一時偈云。生及於老死。不得一時共。生時卽有死。是二俱無因。釋曰。以生不因死。死不因生故。後結法空云。若使初後共。是皆不然者。何故而戲論。謂有生老死。旣言本際下。疏釋論。正爲證有始終之邪見故。又有偈云。此卽邪見品。彼有邊等偈。後前已引竟。

疏上諸邪見。多是外道。亦參小乘。菩薩善知。則問答無滯。使舉破者。令自他造中故也。鈔上諸邪見。下總結上意。言菩薩善知問答者。具四種答。一。正是置答。二。如說生死無有始終。是一向答。三。如云衆生器界五種不同。是分別答。四。若有問云。世尊約何法說我。何法說衆生。應答言。約假名說我。約因緣說衆生。是名隨問答。若通前七。以辨多聞問答。居然可知。餘可思準。是名無記法。

菩薩摩訶薩。作如是念。一切衆生。於生死中。無有多聞。不能了知。此一切法。我當發意。持多聞藏。證阿耨多羅三藐三菩提。爲諸衆生。說眞實法。是名菩薩摩訶薩。第五多聞藏。

疏第二菩薩下。顯多聞之意。謂悲物無聞。長淪生死。故誓持聞藏。自證利他。

大方廣佛華嚴經疏鈔會本卷七十三

佛子何等爲菩薩摩訶薩施藏。

疏第六施藏文三同前。

此菩薩行十種施。所謂分減施。竭盡施。內施。外施。內外施。一切施。過去施。未來施。現在施。究竟施。

疏釋相中二。第一標列十章。

佛子云何爲菩薩分減施。

疏第二佛子下。依章牒釋。釋中十段。一一各三。謂標釋結。然此十施。前六事捨。謂身命財。次三心捨。謂不取著。後一俱捨。名爲究竟。

此菩薩稟性仁慈。好行惠施。若得美味。不專自受。要與衆生。然後方食。凡所受物。悉亦如是。若自食時。作是念言。我身中有八萬戶蟲。依於我住。我身充樂。彼亦充樂。我身饑苦。彼亦饑苦。我今受此所有飲食。願令衆生普得充飽。爲施彼故。而自食之。不貪其味。復作是念。我於長夜。愛著其身。欲令充飽。而受飲食。今以此食。惠施衆生。願我於身。永斷貪著。是名分減施。

疏第一分減施釋中三。初明分減之相。二若自食下。明施善巧。外無施境。而不捨施心。三復作下。對治施障。

云何爲菩薩竭盡施。

疏第二竭盡施者。不顧活命。傾竭所有也。然施心須成。施行須量。若彼爲成大利。則身命無吝。若彼但爲貪求無厭。或惡心欲行大害。應以方便。勿成人惡。如月光王施頭與怨。奪萬姓之安。施二人之死。怨王喜死。乞者恨死。雖有賢行。未全可準。今言竭盡者。以彰菩薩施心已成。有應施境。終無吝也。內施內外。準此可知。若不爾者。菩薩能雨七珍。克足一切。何不施耶。亦見衆生所不宜故。鈔如月光王等者。卽賢愚經第五卷。說月光王施頭二十八經中。因說如來受波旬請。卻後三月。當般涅槃。舍利弗聞。便白世尊。不忍見佛涅槃。當先涅槃。佛便許之。涅槃訖。佛告阿難。舍利弗。非但今日不忍見我涅槃。先取滅度。昔亦如是。阿難請說其事。佛便廣引經文。浩博今略。意引佛告阿難。過去久遠無量無數不可思議。阿僧祇劫。此閻浮提有一國王。名栴陀婆羅。管言月光。統閻浮提八萬四千國。第一夫人。名須摩檀。管言花施。一萬大臣。其第一者。名摩訶旃陀。管言大月。有五百太子。大者曰尸羅跋陀。管言戒賢。王所住城。名跋陀耆婆。管言賢壽。廣說莊嚴。王思善因。廣行大施。告令國內。悉令大捨。時邊遠有一小國王。名曰毘摩斯那。心生嫉妬。廣詔外人。乞取王頭。無肯從者。後復廣詔云。得月光王頭。分國半治。以女妻之。有婆羅門。名勞度叉。應詔乞頭。月光王國。先有變怪。大月大臣。復得惡夢。城神遮之。不令得人。時首陀天。託夢令知。月光睡覺。詔令見已。大月大臣。思以五百七寶贖頭。換之不得。心裂七分。死於王前。王許。卻後七日。徧告國內。國內皆至。擗地請留。王不受之。言我計死。所經地獄。一日之中。捨身無數。竟無所益。今日施頭。持是功德。誓求佛道。當度汝等。言訖入園。以髮繫樹。樹神以手搏婆羅門。王語樹神。我於此樹下。已捨九百九十九頭。今當滿千。汝莫遮我。無上大道。樹神依之。婆羅門斬下王頭。地六震。

動施頭之聲。聲徧天下。時毘摩羨王聞此語已。喜踴驚愕。心瓣裂死。時婆羅門嫌頭腥臭。擲地。脚跟人又呵之。迴來在道。無施給者。饑餓憔悴。聞毘摩羨王已復命終。懊懊憤憤。心裂七分。吐血而死。王及婆羅門墮阿鼻地獄。其餘人民。咸激死者。皆得升天。月光王者。我身是也。毘摩羨王波旬是也。勞度叉者。調達是也。其樹神者。目連是也。大月大臣者。舍利弗是釋曰。此卽世尊本行。故云賢行。此明世尊無不能捨。則合施心須成。恐無巧慧。不善籌量。故云未全可準。奪萬姓之安。施二人之死。向引已具。若不爾下。成上須量之義。菩薩能施而不施者。明是不宜。卽善量也。

佛子。此菩薩得種種上味。飲食。香華。衣服。資生之具。若自以受用。則安樂延年。若輟己施人。則窮苦天命。時或有人來。作是言。汝今所有。悉當與我。菩薩自念。我無始已來。以饑餓故。喪身無數。未曾得有。如毫末許。饒益衆生。而獲善利。今我亦當同於往昔。而捨其命。是故應爲饒益衆生。隨其所有。一切皆捨。乃至盡命。亦無所吝。是名竭盡施。

疏二釋相中三。初明難施之物。二或時下乞境現前。三菩薩自念下。正修施行。下之四施。皆有此三。云何爲菩薩內施。

疏第三內施。謂內身也。

佛子。此菩薩年方少盛。端正美好。香華衣服。以嚴其身。始受灌頂轉輪王位。七寶具足。王四天下。時或有人來白王言。大王當知。我今衰老。身嬰重疾。癯獨羸頓。死將不久。若得王身手足血肉。頭目骨髓。我之身命。必冀存活。唯願大王。莫更籌量。有所顧惜。但見慈念。以施於我。爾時菩薩。作是念言。今我此身後。必當

死。無一利益。宜時疾捨。以濟衆生。念已施之。心無所悔。是名內施。

疏發者。單也。玉篇云。無兒曰癸。無子曰獨。頓者。損也。冀者。望也。三是名下結名。

云何爲菩薩外施。佛子。此菩薩年盛色美。衆相具足。名華上服。而以嚴身。始受灌頂轉輪王位。七寶具足。王四天下。時或有人來白王言。我今貧窶。衆苦逼迫。惟願仁慈。特垂矜念。捨此王位。以贍於我。我當統領。受王福樂。爾時菩薩。作是念言。一切榮盛。必當衰歇。於衰歇時。不能復更。饒益衆生。我今宜應隨彼所求。充滿其意。作是念已。即便施之。而無所悔。是名外施。

疏第四外施。卽王位也。窶者。無財備禮也。

云何爲菩薩內外施。佛子。此菩薩如上所說處輪王位。七寶具足。王四天下。時或有人而來白言。此轉輪位。王處已久。我未曾得。唯願大王。捨之與我。并及王身。爲我臣僕。爾時菩薩。作是念言。我身財寶。及以王位。悉是無常敗壞之法。我今盛壯。富有天下。乞者現前。當以不堅而求堅法。作是念已。即便施之。乃至以身恭勤作役。心無所悔。是名內外施。

疏第五內外施者。王位爲外。兼身作役爲內也。

云何爲菩薩一切施。佛子。此菩薩亦如上所說處輪王位。七寶具足。王四天下。時有無量貧窮之人。來詣其前。而作是言。大王名稱。周聞十方。我等欽風。故來至此。吾曹今者。各有所求。願普垂慈。令得滿足。時諸貧人。從彼大王。或乞國王。或乞妻子。或乞手足。血肉心肺。頭目髓腦。菩薩是時。心作是念。一切恩愛。會當別離。而於衆生。無所饒益。我今爲欲永捨貪愛。以此一切。必離散物。滿衆生願。作是念已。悉皆施與。心無悔。

恨亦不於衆生而生厭賤。是名一切施。

疏第六一切施者。凡所有物也。此與竭盡及內外施異者。竭盡揀異分減。但約資生。內外合前二門。空言作役王位。今云一切通前諸門。又是事捨之終。故總該收。舉難攝易。略列數條。廣則無邊。如第六迴向所辨。

云何爲菩薩過去施。此菩薩聞過去諸佛菩薩所有功德。聞已不著。了達非有。不起分別。不貪不味。亦不求取。無所依倚。見法如夢。無有堅固。於諸善根。不起有想。亦無所倚。但爲教化。取着衆生。成熟佛法。而爲演說。又復觀察過去諸法。十方推求。都不可得。作是念已。於過去法。畢竟皆捨。是名過去施。

疏第七過去施者。然三世之施。通相皆明不着。別則過去不生追戀。未來預止貪求。現在心無染着。今過去釋中分二。先明於佛法無着。後又復下。於一切法無着。前中初二句總明。次不起分別下。別顯。先顯不着之相。不分別者。稱法性故。次不貪染。不愛味。亦不方便求取。以爲已德。亦不依此而起修行。次見法下。廣上了達。釋不着所由。次但爲下。釋疑。疑云。既俱無着。云何而說。釋云。爲化衆生。令無着故。二於一切法無著者。以般若智求不可得。觸目現境。尙了性空。過往法中。甯當計有。

云何爲菩薩未來施。此菩薩聞未來諸佛之所修行。了達非有。不取於相。不別樂往生諸佛國土。不味不着。亦不生厭。不以善根。迴向於彼。亦不於彼。而退善根。常勤修行。未曾廢捨。但欲因彼境界。攝取衆生。爲說真實。令成熟佛法。然此法者。非有處所。非無處所。非內非外。非近非遠。復作是念。若法非有。不可不捨。是名未來施。

疏第八未來施釋中分二。先正顯後釋疑。前中不着修行之因。不願淨土之果。不味其好。不厭其事。不迴向者。釋上不味。不自安處。求勝樂故。不退已下。釋上不厭修彼行故。鈔不自安處求勝樂者。初發心住。已會此文。

疏二但欲下釋疑。疑云。既於淨不味。修行何爲。釋有二意。一者約悲。但爲攝物故。二然此下約智。智了非有故。生卽非生。故不着。不礙事故。非生之生。故修行。非有處所者。與理冥故。非無處所者。事像形故。非內者。相分境故。非外者。心所淨故。非近者。十萬等殊故。非遠者。我淨土不毀故。此約淨國以說。若通論未來法者。可以意知。復作已下。更約性空。結成捨義。又曰擊尙捨。況於未形。鈔非有處所者。與理冥故者。卽明淨土四句之義。謂有質不成。無質不成等。如世界成就品。十萬等殊者。十萬卽阿彌陀經。從此西方十萬佛土。有世界名曰極樂故等者。等於餘土遠近之數。若約通論。未來法可以意知者。未來未至故。非有處所緣會當成。聖智所知故。非無處所未來故。非內。由心故。非外。未至何有遠近。云何爲菩薩。現在施此菩薩。聞四天王衆天。三十三天。夜摩天。兜率陀天。化樂天。他化自在天。梵天。梵身天。梵輔天。梵衆天。大梵天。光天。少光天。無量光天。光音天。淨天。少淨天。無量淨天。徧淨天。廣天。少廣天。無量廣天。廣果天。無煩天。無熱天。善見天。善現天。色究竟天。乃至聞聲聞緣覺具足功德。

疏第九現在施釋中有三。初明所捨之境。二聞已下。正明捨心。三爲令下。釋通外難。今初先列淨天。後列二乘功德。上二世中。舉佛菩薩。今舉諸天。二乘者。文影略耳。天中初六欲界。已如初會。梵天已下。明色界天。然色界攝天多少。諸說小異。俱舍正理。皆說十七。故頌云。三靜慮各三。第四靜慮八。長行之

中。建立十六。以梵王梵輔。同一天故。瑜伽云。處有十八。謂色究竟外。說大自在。不言無想。意在廣果。子收。今此卽文而數。有二十二。然四禪初一。皆是總標。則初靜慮四。二三各二。第四有八。還成十八。正理初說有三。今加梵身。管經梵衆。名梵眷屬。若然。身亦衆義。則梵身是外所領之衆。梵衆則爲內眷屬。衆。梵輔卽大梵。前行列侍御。大梵卽彼天王。獲中間定。初生後歿。威德等勝。故名爲大。疏次光天下。卽二禪三天。一自地天內。光明最少故。二光明轉勝。量難測故。三光音者。口出淨光故。次淨天下。卽三禪三天。意地受樂。總名爲淨。一於自地中。此淨最劣。故名少淨。二淨增難量故。三此淨周普故。次廣天下。明四禪八天。初三。是凡離八災患。皆稱福廣。於自地中。此福猶劣。故名少廣。二福難量故。三異生果中。此最勝故。鈔異生果中。此最勝故者。上五聖居故。

疏無煩已上。名五淨居。謂離欲諸聖。以聖道水。濯煩惱垢。故名爲淨。淨身所止。故名淨居。或此天中。無異生雜。純聖所止。故名淨居。一無煩者。煩謂繁雜。或謂繁廣。無繁雜中。此最初故。繁廣天中。此最劣故。此依正理。若順今經。皆作此煩。則無廣義。二無熱者。已善伏除。雜修淨慮。上中品障。意樂調柔。離熱惱故。或熱者。熾盛爲義。謂上品修靜慮。及果。此猶未證故。三善現者。已得上品雜修靜慮。果德易彰。故名善現。鈔已得上品雜修靜慮者。謂漏與無漏。問雜而修。故名雜修。俱舍賢聖品論云。前說上流。雜修靜慮。爲因。能生色究竟天。先應雜修何等靜慮。一問。由何等位。知雜修成。二問。復有何緣。雜修靜慮。三問。偈云。先雜修第四。答。第一問。成由一念雜。答。第二問。爲受生現樂。及遮煩惱過。答。第三問。釋曰。初句。明夫欲雜修。必先修第四靜慮。由第四靜慮。最堪能故。二答成位。謂阿羅漢。或是不還。成由一念雜者。

謂彼必先入第四靜慮。多念無漏。相續現前。從此引生。多念有漏。後復多念無漏現前。如是旋環。後後漸滅。乃至最後二念無漏。次引二念有漏。現前無間。復生二念無漏。名雜修定。加行成滿。次復唯有一念無漏。次復引起一念有漏。無間。復生一念無漏。中間有漏。前後無漏。以相間雜。故名雜修。此一念雜名根本成。修第四已。乘此勢力。亦能雜修下三靜慮。三答何緣云。雜修靜慮。總有三緣。一爲受生。生淨居天故。二爲現樂。受現法樂故。三爲遮煩惱退。若不還修。由前三緣。若羅漢修。除受生一。從此第六明淨居處。何唯有五。論頌云。由雜修有五。生有五淨居。釋曰。由雜修第四有五品故。一下品有三心。初起無漏。次起有漏。復起無漏。二是中品。亦同上修三心。并前成六。三是上品。四上勝品。五上極品。亦皆同初。各起三心。三五便成一十五心。如次五品。感五淨居。應知此中無漏勢力。熏修有漏。感五淨居。非無漏感。今善現天是第四品。第五善見。是極上品。故障至微。

疏四善見者。雜修定障。餘品至微。見極清徹。故名善見。經本先見後現。或恐誤也。五色究竟者。更無有處於有色中能過於此故。或此已到衆苦所依身最後邊故。

疏言乃至二乘功德者。中間越於四空等故。

聞已。其心不迷不沒。不聚不散。但觀諸行。如夢不實。無有貪着。

疏二正明捨心中。聞上世出世境已。不迷爲實。不沉沒於貪。不聚集其善因。不散動以分別。但觀下釋。其所以可知。

爲令衆生捨離惡趣。心無分別。修菩薩道。成就佛法。而爲開演。是名現在施。

疏三釋難者。疑云。既言不聚善因。何以說五乘因果。釋云。拯三塗之劇苦。示人天以蘇息。止劣見之妄情。說二乘以引攝。爲物然耳。非自不捨也。

云何爲菩薩究竟施。

疏第十究竟施。文三。同前。微名者。略有五義。得究竟名。一前六捨財命。次三捨著心。今則兼上二門故。二又發大願。令物無着故。三令物得究竟果故。四不生一念愛着。則微細無着故。五究竟能令物實益。故如無眼等而施之者。如世凡人。豈能將他之目。安之於己。今菩薩福力。令彼還得。以慈善根力故。如五百羣賊。平復如故。故云究竟益。

佛子。此菩薩假使有無量衆生。或有無眼。或有無耳。或無鼻舌。及以手足。來至其所。告菩薩言。我身薄結。諸根殘缺。惟願仁慈。以善方便。捨己所有。令我具足。

疏釋相中三。初施境現前。二菩薩聞下。正明施行。三如我下。回向衆生。

菩薩聞之。即便施與。假使由此經阿僧祇劫。諸根不具。亦不心生一念悔惜。但自觀身。從初入胎。不淨微形。胞段諸根。生老病死。又觀此身。無有真實。無有慚愧。非賢聖物。臭穢不潔。骨節相持。血肉所塗。九孔常流。人所惡賤。作是觀已。不生一念愛着之心。復作是念。此身危脆。無有堅固。我今云何而生戀着。應以施彼。充滿其願。

疏二。中分二。初正施無吝。二但自下。釋成行之由。由入觀故。此觀卽是念處觀也。皆言身者。觀有通別。別觀五蘊。一一名身。故淨名云。是身如泡。不得久立等。通觀五陰。皆無常等。故智論云。五陰卽無常。無

常卽苦。苦卽無我等。今此不淨偏語。色身餘之三觀。皆通五蘊。第一苦觀。謂始從入胎。皆生苦攝。老等可知。二又觀下。明無我觀。謂無真實主宰。故無有慚愧者。雖假以澡浴衣食。一旦背恩。如小兒故。非賢聖物者。是世間故。故智論云。由無我故。令捨世間。三臭穢下。明不淨觀。四復作下。明無常觀。觀危脆故。鈔。一日背恩。如小兒故者。卽智論文。審諦觀此身。終畢歸死處。難御無反復。背恩如小兒。故智論云。由無我故。下同此卷。已前亦引。

如我所作。以此開導一切衆生。令於身心不生貪愛。悉得成就清淨智身。是名究竟施。是爲菩薩摩訶薩第六施藏。

疏三回向者。揀小乘故。然菩薩修此觀時。以無所得而爲方便故。同法界故。已不共小。況回向耶。佛子何等爲菩薩摩訶薩慧藏。

疏第七慧藏中分四。一徵名。二釋相。三結名。四歎益。

此菩薩於色如實知。色集如實知。色滅如實知。於受想行識如實知。受想行識集如實知。受想行識滅如實知。於聲聞如實知。聲聞集如實知。聲聞滅如實知。於獨覺如實知。獨覺集如實知。獨覺滅如實知。於菩薩如實知。菩薩集如實知。菩薩涅槃如實知。

疏就釋相中。二初明慧藏。後釋無盡。前中三。初明如實知境。次云何下。釋如實知義。三菩薩成就下。總

結多門以彰善巧。今初以四諦慧照十種法攝十爲五類。前二五蘊。次二有支。後三三乘。故鈔以四諦慧等者。卽無作四諦也。故下四諦差別門中云。若約菩薩能觀皆無作也。

疏收此五類不出二門。初二凡境。後三聖境。又若後三就果。則初二有作四諦。後一無作四諦。界內界外。因果異故。此就所觀。若約菩薩能觀皆無作也。又初二流轉。後三還滅。前有滅道。是流轉始修之還滅。後有苦集。是還滅未盡之流轉。又前是所知之法。後是能知之人。人中有法。卽是前法。歷於四諦。是聲聞法。所緣有支。是緣覺法。五蘊卽是三乘共法。皆如實知。是菩薩法。鈔收五爲二。四門中前三皆約所知。後一方具能所。前有滅道。下此通妨難。謂有難言。初二流轉。卽五蘊有支。而皆有四諦。謂色滅。色道等。滅道卽是還滅。何言流轉。後有苦集亦然。故今通云。前五陰等中有滅道者。於蘊等中方始修道。期得滅耳。若已證滅。則無蘊等言。後有苦集者。卽三乘中亦以四諦。則有苦集。旣是還滅。何得有之。今答雖是聖人。苦集未盡。無餘涅槃。方始盡故。又前是所知。下第四門中。二先正明。後人中有法。下通妨。經云。聲聞法如實知。緣覺法如實知等。何言但是能知之人。故爲此通。謂三乘聖人。歷前諸法。成三乘耳。歷於四諦。下示其以法成人之相。其四諦之法。徧在前七。所緣有支。卽無明有愛。能如實知諸法。故名菩薩。

疏皆言如實知者。下經總釋。今當略辨。一如事實。二如理實。

疏十中前七。當相是苦。無明與愛。有漏性故。行苦隨故。行蘊攝故。緣成是集。無性是滅。顯滅爲道。從詮顯故。此則總說。及就理滅。若別說者。不了無常不淨等過。而生愛着。名爲色集。若滅癡愛。名爲色滅。唯

止與觀。是色滅道。由止離愛。由觀離癡。若兼助道。卽有戒學。及道品等。受想行識。例此可知。無明集者。由他言說。不如理引。由自妄想。不正思惟。滅此名滅。言愛集者。謂無明觸爲緣。所生受故。亦滅此名滅。癡愛之道。皆同蘊說。十二支中。唯舉二者。發業潤業。唯此二故。能引能生。各舉初故。從癡有愛。病之源。故涅槃三十四云。從無明生愛。當知是愛。卽是無明。從愛生取。當知是取。卽無明愛等。亦似斯義。又約三際。無明爲本。愛取爲際。此二中間。有識等五。及生老死。令悟無明。由迷過去。有識等五。現在之愛。卽是無明。若不斷者。輪轉不息。今思斷之。將來無復生死矣。鈔無明與愛有漏性下。釋妨。謂有問言。無明與愛。此是煩惱。云何而言。七皆是苦。故爲此通。明三義。是苦。緣生是集。七皆緣生。無性是滅。七皆無性。結是理滅。顯滅爲道者。顯無性理。言從詮顯者。釋上顯滅爲道。謂緣生之法。是顯滅之詮。若不從緣。不知無性故。亦如修行止觀。顯得滅理故。次結云。此則總說。及就理滅。若別說者。下歷色等。一一別明。四諦之相。可以思準。由他言說等。皆喻伽意。義皆可知。不正思惟。亦涅槃意。六地常明。無明觸爲緣等者。亦喻伽意。大般若等。皆說眼觸。眼觸爲緣。所生諸受等。如眼根境識三。和合名觸。若以明爲緣。不成有支。由無明迷。而受諸受。樂受生愛。故是愛因。發業下解釋。略引三文。一唯識生引門。說無明發業。愛能潤業。能引有二。但舉無明。能潤有三。但舉於愛。已攝取有涅槃下。引經證。卽是北經。有本當三十五。南經三十二。明二十一。對證論之中。此當第十四。有心數無心數義。此文稍略。若具引者。經云。善男子。我於經中。作如是說。聖人色陰。乃至識陰。皆是無明因緣所出。一切凡夫。亦復如是。從無明生愛。當知是愛。卽是無明。從愛生取。當知是取。卽無明愛。從取生有。當知是有。卽是無明愛取。從有生受。當知是

受卽是行有。從受因緣。生於名色。無明愛取。有行受觸識六入等。是故受者。卽十二支。善男子。我諸弟子。聞是說已。不解我意。唱言。如來說無心數。釋曰。此中有三。先明聖人五陰從無明生。二例凡夫。三就凡中。明心法展轉相生。更無別數。此中卽三世十二因緣。隱顯互論。文中先列後結。列中先明過去之因。從無明生。言從無明生愛。當知是愛。卽是無明者。謂無明之心。對境染着。卽名爲愛。是故此愛。卽是無明。言從愛生取。當知是取。卽無明愛者。卽前愛心。取着境界。卽名爲取。體性不殊。是故此取。卽無明愛。言從取生有。當知是有。卽是無明愛取者。前取心起業名有。是故此有。卽無明等。次論現果云。從有生受。當知此受。卽是行有者。此名識支。以之爲受。識支卽是現報之體。從因納得。故名爲受。卽前有支轉爲此受。是故此受。卽前行有。亦應卽前無明愛取。就近言耳。言從受因緣生於名色者。受增爲名所託。識立以之爲色。從受生於無明愛取。有行者。從現報受起後因也。從受因緣生於愛觸識六入等者。從現報色轉起未來生老死也。亦應宣說名色卽是受。乃至宣說六入卽受。而文略耳。以下經云。是故受者。卽十二支。故此末句。卽是總結無別受外心法。向前卽於過去無明受等。向後卽於名色等。故受卽十二支。以今疏引。但引初段。證無明愛是十二支本。其卽無明愛等字。等餘經文。然其彼經本意。爲明無別心法。非成無明及愛。是有支本。故疏結言。亦似斯義。又約三際無明爲本下。卽瑜伽論。至下六地。當廣分別。今且略釋。無明橫起。是本可知。不了第一義諦名無明故。言愛取爲際者。卽現在所起。若更起愛取。則有未來生老死支。若不起者。當苦不生。有無由之。故名爲際。言是二中間有識等五者。是無明支後。愛取支前。中間五果。言及生老死者。卽愛取支後。望未來世未起愛取支前。爲中間耳。以未

來更起展轉無窮故。

疏後三約淨聲聞是人。四諦爲法。所行道品爲集。所成果爲涅槃。十二因緣。是緣覺法。無邊法界。是菩薩法。又知聲聞。卽是知苦。以聲聞苦是已知故。但舉其位。法卽是彼所行之法。卽是道諦。集卽是彼惑集未盡。是爲集諦。已有斷故。法後說之涅槃。卽是滅諦。已證滅故。改名涅槃。緣覺菩薩。準思可見。前釋通因。後釋就果。若定以前二爲分段。後三爲變易。則小乘三果已前。應受變易。直往七地已下。非此所知。故不可也。鈔又知聲聞下。會通四諦。以前標云。以四諦慧。照十法故。前釋通因下。會二釋。雖因果云異。亦不殊。四諦之意也。若定以前下。四結彈古意。卽刊定記釋。疏先敍之後。則小乘三果下。示其過相。後之三乘。通因通果。今爲變易。則三果已受變易。變易入無餘竟。方始受之。何得三果便受變易。又此三果。非此所知。三果是分段故。言直往七地等者。迴小入大。初地已上。容受變易。直往菩薩八地已上。方受變易。今總爲變易。故七地已還。非此所知。亦可直往七地已前。應受變易。各有二過。疏文影略耳。然分段變易者。勝鬘經云。有二種死。何等爲二。謂分段死。不思議變易死。分段死者。謂虛僞凡夫。不思議變易死者。謂阿羅漢辟支佛。大力菩薩。意生身。乃至究竟無上菩提。釋曰。據此。明小乘三果。七地已還。未受變易。四變易義。前已廣說。

大方廣佛華嚴經疏鈔會本卷七十四

云何知。知從業報諸行因緣之所造作。一切虛假。空無有實。非我非堅固。無有少法可得成立。疏第二釋如實知義。非唯能知行相。亦顯所知之相也。先徵後釋。徵意云。爲隨相知。爲無相知。若隨相知。甯異凡小。若無相知。無相無知。故言云何知。後釋意云。知相知性。無有障礙。是菩薩所知。無知之知。是菩薩知。文分二別。先約自利。明知苦集。後約利他。彰知滅道。二文影略。應各具四。又二段中含前五類。具顯三乘。今初段中。知標業報。是五蘊相。業集報苦。是二諦相。言諸行因緣之所造作。十二支相。諸行因緣。卽是集相之所造作。是苦諦相。上辨知相。一切已下。顯知無相。通於苦集。初有二句。共三乘相。非我已下。釋成上文。揀二別相。由非我故。空無有實。但假五陰。是聲聞相。以非堅固。空無有實。但緣成假。是緣覺相。若無少可得。空無有實。但虛假幻相。是菩薩相。非安立諦。無可成故。鈔亦顯所知之相者。所知者。卽下性相。要顯所知。方識能知耳。知相下。此中有三。一知相。二知性。三知無障礙。無障礙有二。一上性相無礙。二以性融相。重重無礙。卽四法界。是此可知。言無知知者。是菩薩能知也。卽般若無知對緣而照耳。又二段中含前五類等者。謂前以如實知。一一歷前五類之法。在文昭著。今明文中。義合前法。故疏示。

欲令衆生知其實性。廣爲宣說。爲說何等。說諸法不可壞。何等法不可壞。色不可壞。受想行識不可壞。無明不可壞。聲聞法。獨覺法。菩薩法。不可壞。何以故。一切法無作。無作者。無言說。無處所。不生不起。不與不

取無動轉無作用。

疏二欲令已下次約利他彰知滅道能知實性。是道諦相。法不可壞。及所知性。卽滅諦相。廣爲宣說。唯菩薩相。文中二初標說意。二爲說下展轉徵釋。總有三重。初徵意云。說何令知實性。釋云。說不可壞。此略示其宗。次徵云。此不可壞。爲性爲相。此尋說處。釋云。相卽性故。五類等法。皆不可壞。依般若中。自色已上。種智已還。悉皆徧歷。後徵云。現見諸法。猶如聚沫。泡焰。芭蕉。幻夢。不實。那言不壞。下釋所由。略由三義。一色等性空。無可壞故。若壞方空。非本空故。二由空卽眞。同法性故。若壞方眞。事在理外故。三由卽空。不待壞故。壞則斷滅。文中十句五對。初無我無造。故不可壞。二離能所詮故。三能生不生。所生不起。故四因不取果。果不與因故。五體無動轉。用無作相故。鈔自色已上。種智已還者。大品略引八十餘科。大般若更廣。謂色爲首。是五蘊初故。次歷四蘊。次歷十二入。十八界。次眼等觸等所生諸受。次四念住。四諦。四禪。八解脫。陀羅尼。十地。五眼。十力。大慈大悲。四等相好。無忘失法。一切種智。四果。菩薩行。無上菩提。釋曰。上卽所歷也。現見諸法。猶如聚沫等者。舉五蘊不實破壞之義。以難不壞。釋意前已頻有。

菩薩成就如是等無量慧藏。以少方便。了一切法。自然明達。不由他悟。

疏第三總結多門。以彰善巧者。更有多門。皆以無所得等爲少方便。則色空見盡。壞與不壞兩亡。不隨境轉。名不由他悟。鈔皆以無得等爲少方便者。疏以無得釋少方便。下經云。以無所得而爲方便。若準大般若。亦以無生爲方便。無住爲方便。無依爲方便。皆般若相也。然爲方便。略有二意。一以爲入有

方便。令有無所得等。二爲入空方便。亦不住無得故。今正取爲入有方便。

此慧無盡藏。有十種不可盡。故說爲無盡。何等爲十。所謂多聞善巧不可盡。故親近善知識不可盡。故善分別句義不可盡。故入深法界不可盡。故以一味智莊嚴不可盡。故集一切福德心無疲倦不可盡。故入一切陀羅尼門不可盡。故能分別一切衆生語言音聲不可盡。故能斷一切衆生疑惑不可盡。故爲一切衆生現一切佛神力。教化調伏。令修行不斷。不可盡。故是爲十。

疏第二釋無盡義。有標、徵、釋、結、釋。亦十事五對。一因緣。二教理。三福智。四持辯。五智通。福智中云。一味者。百華異色。共成一陰。萬法雖殊。貫之一智。亦如上蘇無不入也。鈔亦如上蘇無不入也者。解深密經。歎真實智無不入也。

是爲菩薩摩訶薩第七慧藏。住此藏者。得無盡智慧。普能開悟一切衆生。

疏三結四歎文處可知。

佛子。何等爲菩薩摩訶薩念藏。此菩薩捨離癡惑。得具足念。

疏釋相中有四。一總標念體。二所念差別。三能念勝相。四明念益相。

憶念過去一生二生。乃至十生。百生千生。百千生。無量百千生。成劫壞劫。成壞劫。非一成劫。非一壞劫。非一成壞劫。百劫千劫。百千億那由他。乃至無量無數無邊無等不可數不可稱不可思不可量不可說不可說劫。念一佛名號。乃至不可說不可說佛名號。念一佛出世說授記。乃至不可說不可說佛出世說授記。念一佛出世說修多羅。乃至不可說不可說佛出世說修多羅。如修多羅。祇夜。授記。伽陀。尼陀那。優陀

那、本事、本生、方廣未曾有、譬喻、論議、亦如是。念一衆會。乃至不可說不可說衆會。念演一法。乃至演不可說不可說法。念一根種種性。乃至不可說不可說根種種性。念一根無量種種性。乃至不可說不可說根無量種種性。念一煩惱種種性。乃至不可說不可說煩惱種種性。念一三昧種種性。乃至不可說不可說三昧種種性。

疏二憶念下。所念差別中。唯依宿住以辨明記。略舉十事。以顯無盡。一生。二劫。三佛名。四授記。五演教。六衆會。七說義。八根性。九所治。十能治。文並可知。

疏十二分教。今當略說。舊名十二部經。恐濫部帙。改名分教。各有二相。

疏唯修多羅。或二。或三。修多羅者。此云契經。廣如初卷。言二相者。一是總相。謂涅槃十五云。始從如是我聞。終至歡喜奉行。皆修多羅。二者別相。雜集十一云。謂長行綴緝。略說所應說義。然更有異名。異名有四。一法本。二但名經。三直說。四聖教。言法本者。遠公以五義釋之一。教爲理本。二經爲論本。三總爲別本。四初爲後本。五略爲廣本。以彼立三修多羅。故一總相。二別相。三本相。亦名略相。總不異前。別謂就前總相。分出十一。餘不收者。還復攝在修多羅中。名爲別相。用斯別相。望祇夜等爲其本。故名初爲後本。言本相者。於彼別相。十二部中。初略標舉。名修多羅。後廣釋者。隨別名之。如言色者。卽是根本略相。復云青黃等者。是名廣相。故云略爲廣本。然其後二。不違雜集。長行綴葺等言。綴葺卽是十一所不攝者。如賢首品云。爾時文殊師利。說無濁亂清淨行大功德已等類。此是結集綴葺。非佛正說。故云十一所不攝者。其略說所應說義。卽是略爲廣本。如欲顯示菩提心功德。卽其類也。此第三略相。亦順

成實。成實名直說語言。總相而言。名爲直說。二語言。多義分別。名非直說。斯則通十二分。皆有此一。若十二分中修多羅。並通前三。若三藏修多羅。唯局總相。但開雜集別義。以成後二。有不曉者。妄非先賢。而云修多羅。但依總相業用。則違諸論長行綴葺等。鈔修多羅者下。別釋之。此一部分二。先辨二相。其長行綴葺等者。次下當知。二然更有下。辨異名。便彰三相。於中二。先列四名。亦如初卷言。法本下。別釋於中。一正述遠公釋。二以彼立下。爲出所以。卽立三相。以五中後三。卽三修多羅相。然其後二下。遮破會通。以刊定記。自立兩重總別。如第一疏鈔。不許立三。彼第一疏中。破云。隋遠法師。雖說修多羅。總別略三。初順涅槃。二無聖教。亦乖正理。三違雜集。雜集論云。修多羅者。謂長行綴葺所應說義。彼自釋云。略說所應說義。卽是長行綴葺。曾無先略標舉。後廣釋相。言略者。總之異名。謂修多羅一分是總。餘十一分是別。今修多羅依藏部中總相業用而立其名。餘藏部名。依藏部中別相業用。所以者何。修多羅業。能貫攝故。餘藏部所詮所化。由此貫攝。彼方成故。故涅槃云。始從如是我聞。乃至歡喜奉行。皆修多羅攝釋。卽此卽彼之立破。今疏知其所立。但是總相。更不敍之。言違雜集。故爲辨相。卻用雜集。故云不違。此成別相。故云長行綴葺。是十一所不攝者。恐義未顯。故引涅槃賢首品示之。以總長行綴葺。卽是總相。總相何得揀偈頌耶。其有略說所應說義。通略相修多羅。卽離雜集論文。而爲兩段。略出別之。據。只用上賢首品一文。雙證二義。如云爾時文殊師利說無濁亂清淨行大功德已者。但是長行綴葺。若云欲顯示菩提心功德故。卽是略相。標下文之所說故。次明不違成實可知。從斯則通十二分者。明略相通也。不同別相。十一不攝。若十二分下。正辨大義。雙結藏部二修多羅通局之異。此文正爲刊定。

立二總別。彼云但藏部立名。各有兩重總別。一謂三藏十二部爲總名。修多羅等爲別稱。二謂修多羅爲總號。毘奈耶應頌等爲別目。自古相傳。唯辨前門。不論其後。釋曰。其後一總別。彼爲挺拔。今正破之。彼意云。旣契理合機。名修多羅。則律與論皆有契合。豈不得名修多羅耶。故今示云。二藏有契合者。卽十二部中修多羅耳。此約義該。何須更立兩重總別。三藏修多羅。唯局總相。十二分中。卻分三相。故從總相。立於經藏。揀異二藏也。但開雜集下。結示遠公之據。有不曉下。結彈刊定違雜集言。卻在彼已。餘十二分文。並可知。然隨一分。便引當經爲證。則顯此經具十二分耳。疏言二祇夜者。此云應頌。一與長行相應之頌。由於長行說未盡故。雜集云。不了義經。應更頌釋。如十住品發心住頌。卽其類也。二爲後來。應更頌故。涅槃云。佛昔爲諸比丘。說契經竟。爾時復有利根衆生。爲聽法故。後至佛所。卽便問人。如來向者。爲說何事。佛時知已。卽因本經。以偈頌曰。我昔與汝等。不識四真諦。是故久流轉。生死大苦海等。鈔涅槃云。佛昔爲諸比丘等者。卽十五經長行具云。何等名爲祇夜經。佛告諸比丘。昔我與汝。愚無智慧。不能如實見四真諦。是故流轉久處生死。沒大苦海。何等爲四苦集滅道。如佛昔日爲諸比丘。說契經竟。下全同疏。疏後等字有二。一等餘偈。更有一偈云。若能見四諦。則得斷生死。生有旣已盡。更不受諸有。是名祇夜經。二等取餘經文。

疏三受記者。梵云和伽羅那。亦云記別。記者錄也。別謂分別。一記弟子生死因果。其文非一。二記菩薩當成佛事。如記彌勒。此發心品及出現品。並有其文。鈔如記彌勒者。涅槃云。何等名爲授記經。如有經律。如來說時。爲諸天人。受佛記別。汝阿逸多。未來有王名曰穰佉。當於是世。而成佛道。號曰彌勒。是

名授記經。

疏四伽陀者。此云諷頌。諷卽是頌。謂孤起偈。一爲易誦持故。二爲樂偈者故。三天偈讚。皆是其流。鈔四伽陀涅槃中引諸惡莫作偈。二相卽是二意立偈。

疏五尼陀那。此云因緣。一因請方說爲重法故。如三家五請等。二因事方說知本末故。如觀善財。又雜集云。又有因緣制立學處。卽因事制戒。亦第二攝。鈔二因事方說。知本末故者。涅槃云。何等爲尼陀那經。如諸經偈。所因根本爲他演說。如舍衛國有一丈夫。羅網捕鳥。得已籠繫。隨與水草。而復還放。世尊知其本末因緣。而說偈言。莫輕小罪。以爲無殃。水滴雖微。漸盈大器。

疏六優陀那。此云自說。一爲令知而請法故。如十地本分等。二爲令所化生殷重故。念佛慈悲。爲不請友。如普賢行品等。

疏七本事者。梵云伊帝目多伽。一說佛往事。如說威光太子等。二說弟子往事。如說諸善友因緣等。

鈔七本事二相中。瑜伽八十一。但有初相云。本事者。說佛前際所有事。後際所生事。雜集但有後意。論云。本事者。謂宣說聖弟子等前世相應事。

疏八本生者。梵云闍陀伽。謂說昔受身。一說如來。如說威光數數轉身。值諸佛等。二說弟子。如諸善友等。然其本事。但云其事。除所生事。本生要說受身。鈔八本生等。一說如來者。涅槃云。如佛世尊。本爲菩薩時。修諸苦行。所謂比正當知。我於過去。作鹿。作熊。作驢。作兔。作粟散王。轉輪聖王。龍。金翅鳥。如是行菩薩道時。捨所可愛身。

疏九方廣者。梵云毘佛略。一廣大利樂故。二正法廣陳故。此經一部。全受斯稱。涅槃云。所謂大乘方等經典。其義廣大。猶如虛空。雜集開爲五義云。方廣者。謂菩薩藏相應言說。亦名廣破。以能廣破一切障故。亦名無比法。無有諸法能比類故。一切有情利益安樂所依處故。宣說廣大甚深義故。鈔九方廣可知。所引雜集。皆第十一開總菩薩藏相應言爲四。并總爲五耳。餘可知。

疏十未曾有者。梵云阿浮達磨。亦云希法。一德業殊異故。如初生卽行七步。斯經不起而升四天等。一法體希奇故。謂說佛菩薩不共功德。經文非一。疏十一譬喻者。梵云阿波陀那。一爲深智說似。令解眞故。如法華云。諸有智者。以譬喻得解。如出現品。一一喻明。二爲淺識。就彼取類。誘令信故。如爲擔人說。二蘊等。此經所無。雜集通說。爲令本義得明了故。

疏十二論義者。梵云優波提舍。一以理深故。二義不了故。並須循環研覈。或佛自說。或菩薩相論。如問明品等。

疏此之十二。於大於小。爲局爲通。若皆大者。則違涅槃等文。涅槃第三云。護大乘者。受持九部。法華第一云。我此九部法。隨順衆生說。瑜伽等論。說聲聞藏。無有方廣。然諸經論。且約一相。故作是說。如實說者。大小皆具。如深密中。菩薩依十二分教。修奢摩他。瑜伽二十一云。佛爲聲聞。一具演十二分教。而涅槃說大。但有九者。依三部中之小相故。謂因緣中。取因事制戒。於譬喻中。依爲誘引。於論議中。約非了義。法華九部小者。三相大故。於記別中。取記作佛。自說之內。依不請友。方廣之中。依廣大利樂。其正法廣陳。通大通小。然契經望餘總相略相。則許通有別相。則無應頌。諷頌。本事。本生。互望並無。本事。本生。

望於記別。亦是互無。自說因緣。容得互有。如因事說。不由請故。除上所除。餘皆互有。此經之中。具足十二。已如上引。十二分教。義已略周。有欲廣知。如涅槃十五。雜集十二。瑜伽八十一。等說。言一三昧種種性者。如一定中。凡小權實。多差別故。又多即入故。鈔涅槃第三云。護大乘者。受持九部者。義引經云。若有比丘。供身之具。亦常豐足。復能護持所受禁戒。能師子吼。演說妙法。謂修多羅。祇夜。受記。伽陀。優陀那。伊帝目多。伽闍陀。毘佛略。阿浮達磨。以如是等九部經典。爲他廣說。利益安樂諸衆生故等。法華第一。卽是方便後偈。下半云。入大乘爲本。以故說是經。下引瑜伽小唯十一。此念有十種。所謂寂靜念。清淨念。不濁念。明徹念。離塵念。離種種塵念。離垢念。光耀念。可愛樂念。無障礙念。

疏三。此念下。明能念勝相。於中十句。一。靜慮相應故。二。無漏俱轉故。三。淨信俱故。四。了知故。五。不取相故。六。離分別故。七。離所知故。八。與慧俱故。九。具上諸德故。十。離上諸過故。

菩薩住是念時。一切世間。無能擾亂。一切異論。無能變動。往世善根。悉得清淨。於諸世法。無所染着。衆魔外道。所不能壞。轉身受生。無所忘失。過現未來。說法無盡。於一切世界中。與衆生同住。曾無過咎。入一切諸佛衆會道場。無所障礙。一切佛所。悉得親近。是名菩薩摩訶薩第八念藏。

疏四。菩薩住此下。明念益相。亦有十句。既世與出世皆念。故能離過成德。並顯可知。

佛子。何等爲菩薩摩訶薩持藏。此菩薩持諸佛所說修多羅。文句義理。無有忘失。一生持。乃至不可說不可說生持。

疏第九持藏釋相中三初別舉文義顯長時持。

持一佛名號。乃至不可說不可說佛名號。持一劫數。乃至不可說不可說劫數。持一佛授記。乃至不可說不可說佛授記。持一修多羅。乃至不可說不可說修多羅。持一衆會。乃至不可說不可說衆會。持演一法。乃至演不可說不可說法。持一根無量種種性。乃至不可說不可說根無量種種性。持一煩惱種種性。乃至不可說不可說煩惱種種性。持一三昧種種性。乃至不可說不可說三昧種種性。

疏二持一佛下。徧舉諸法。顯能廣持。所持卽前所念之法。

佛子。此持藏無邊難滿。難至其底。難得親近。無能制伏。無量無盡。具大威力。是佛境界。唯佛能了。是名菩薩摩訶薩第九持藏。

疏三佛子下。辨能持德量。文有十句。一大之無外。二廣能虛受。三深難至底。四四邊絕相。五外無能制。六體無分量。七用無窮盡。八內含衆德。九因徹果源。十餘無能破。

佛子。何等爲菩薩摩訶薩辨藏。

疏第十辨藏。文有四別。謂徵、釋、結、歎。

此菩薩有深智慧。了知實相。廣爲衆生演說諸法。不違一切諸佛經典。

疏釋相中四。初總舉體用。雙照事理。二種實相。名深智慧。

說一品法。乃至不可說不可說品法。說一佛名號。乃至不可說不可說佛名號。如是說一世界。說一佛授記。說一修多羅。說一衆會。說演一法。說一根無量種種性。說一煩惱無量種種性。說一三昧無量種種性。

乃至說不可說不可說三昧無量種種性。

疏二說一品下顯能廣演。

或一日說或半月一月說或百年千年百千年說或一劫百劫千劫百千劫說或百千億那由他劫說或無數無量乃至不可說不可說劫說劫數可盡一文一句義理難盡。

疏三或一日下明長時演先正明。

何以故此菩薩成就十種無盡藏故成就此藏得攝一切法陀羅尼門現在前百萬阿僧祇陀羅尼以爲眷屬得此陀羅尼已以法光明廣爲衆生演說於法。

疏後徵釋以是十藏之終故說具前十藏近接總持復舉陀羅尼門。

其說法時以廣長舌出妙音聲充滿十方一切世界隨其根性悉令滿足心得歡喜滅除一切煩惱纏垢善入一切音聲言語文字辨才令一切衆生佛種不斷淨心相續亦以法光明而演說法無有窮盡不生疲倦何以故此菩薩成就盡虛空徧法界無邊身故是爲菩薩摩訶薩第十辨藏。

疏四其說法下彰辨之德亦有正明徵釋可知。

此藏無窮盡無分段無間無斷無變異無隔礙無退轉甚深無底難可得入普入一切佛法之門。

疏四歎益中文有十句義該七辨一無窮盡是豐義味辨一一句中出多事理故二卽捷辨欲言卽言無分段故三無疎謬辨不以邪錯間深理故四無斷辨相續連環故五應辨應時應機無變異故六迅辨迅若懸河無隔礙故已下四句卽一切世間最上妙辨此辨有五德一甚深如雷卽第八句二清徹

遠聞故不退轉。卽第七句。三其聲哀雅。如迦陵頻伽。故能普入一切佛法。卽第十句。四能令衆生入心敬愛。五其有聞者歡喜無厭。故難可得入。上二卽第九句。上來第三依章別釋。竟。鈔七辨十地廣明佛子此十種無盡藏。有十種無盡法。令諸菩薩究竟成就無上菩提。

疏第四佛子下總歎十藏勝能分三初標歎。

何等爲十。饒益一切衆生故。以本願善迴向故。一切劫無斷絕故。盡虛空界悉開悟心無限故。迴向有爲而不着故。一念境界一切法無盡故。大願心無變異故。善攝取諸陀羅尼故。一切諸佛所護念故。一切法皆如幻故。

疏二微釋釋有十句。攝爲五對。一下化上求。二豎窮橫徧。三捨相契實。四無變善攝。五外護內明。是爲十種無盡法。能令一切世間所作悉得究竟無盡大藏。

疏三是爲下結歎。此後應有偈等。或是略無。多是經來未盡。第四會竟。

大方廣佛華嚴經疏鈔會本卷七十五

升兜率天宮品第二十三

疏自下第五會明上賢十向。四門同前。初來意中。先會來者。正爲答前迴向問故。迴前解行。以向眞證。廣益自他。令行彌綸。無不周故。菩薩大乘藏經云。以少善根。引無量果者。謂迴向心。以迴向心爲大利。故故行後明之。又前解行既著。令悲願彌博。後品來者。前會既終。將陳後說。先明說處。表法故來。鈔菩薩大乘藏經者。或單名菩薩藏經。唯一卷。亦明禮佛懺悔隨喜等。後廣說迴向等功德。先明七寶布滿恆河沙三千大千世界。供養於佛。後云行此迴向功德等。卽引無量果。乃是義引耳。以迴向心爲大利。故卽暗引淨名佛道品普現色身菩薩之偈云。富有七財寶。教授以滋息。如所說修行。迴向爲大利。故行後明之者。迴前行故。

疏二釋名者。先會得名。亦有二義。同前二會。鈔亦有二義者。一約處。名兜率天宮會。二約人。名金剛幢菩薩會。三約法。名十迴向會。

疏二釋品名。兜率是處。佛以法界之身。不起而應。故名爲升。處此說者。表位超勝。是次第故。又上下放逸。此天知足。表世閒行滿。故居喜足之天。又以彼有一生補處。表菩提之心。功行滿故。又積功累勳。知階未足。迴勳授子。乃知有餘。菩薩亦爾。勤苦積行。未見有餘。迴向衆生。乃知自足。又欲界六天。此居其中。表悲智均平。處於中故。又生此天。而修三福。謂施戒定。自餘不具。偏多不均。故處此說也。鈔處此

說下。此句徵從表位下答。答有六意。一、前行在夜摩。今迴向超前。故居兜率。上但約次第。二、取知足天名。三、約天主說之。四、再就知足釋之前約自利足。此約利他足。五、約中道說之。六、約均平釋。言又生此天而修三福者。卽涅槃三十二。應言修施戒者。得上下天身。修施戒定。得兜率天身。疏第三宗趣者。會以十向大願爲宗。得地爲趣。品以升天赴感爲宗。說向爲趣。

爾時佛神力故。十方一切世界。一一四天下。閻浮提中。皆見如來座於樹下。各有菩薩。承佛神力。而演說法。靡不自謂恆對於佛。

疏第四釋文。此會有三品經。初二當會由致。後一正說所以。無勝進者。由二義故。一、以此會是三賢位終。攝前解行。總爲趣地方便。迴向當體。自是勝進。是故無也。此經上下。其例有四。一、約行滿入位之際。如賢首品。信滿總爲入住方便。二、約願滿入證之際。如此迴向。初僧祇滿。總爲入地方便。三、約功用滿。入無功用之際。如第八地初。總攝前七地。以爲方便。此第二僧祇滿。四、約因位成滿之際。如第十地初。攝前九地。爲入方便。此約三僧祇滿處。攝也。餘同位相接。卽別有方便。故非一例。鈔三約功用滿等者。第八地初。有總明方便。集作地分。集前七地。爲入地方便。四十地初。有方便。作滿足地分。是也。疏二方欲入地。必離進趣相。與無分別。爲方便。故就初二品。前一化主。赴機。後品。助化。讚佛。今初品中。大分十段。一本會齊現。二不離而升。三見佛嚴處。四迎佛興供。五觀佛勝德。六請佛處殿。七如來受請。八天王獲益。九承力偈讚。十如來就坐。

今初也。初言神力。卽是徧因。未必起神境通。但是修成心自在力。十方已下。辨所現相。於中亦有化主。

助化。望第四會。既加及須彌頂。此亦應云。坐於樹下。及須彌。夜摩天宮。文無者略。以第二段中。帶前升後。既全舉前四。則影顯前四。皆圓徧也。而演說者。亦通四會之所說也。鈔未必起等者。此亦卽前第十二經。初各隨其類。爲現神通。餘說四會等。例前可知。

爾時世尊。復以神力。不離於此菩提樹下。及須彌頂。夜摩天宮。而往詣於兜率陀天。一切妙寶所莊嚴殿。疏第二爾時。下明不離而升。謂前十方一切處。四會皆儼然不散。而升此說。意明橫徧十方。豎該九會。佛法界身。徧時處故。餘義具如第三會初。

時兜率天王。遙見佛來。卽於殿上。敷摩尼藏師子之座。其師子座。天諸妙寶之所集成。過去修行善根所得。一切如來神力所現。無量百千億那由他阿僧祇善根所生。一切如來淨法所起。無邊福力之所嚴瑩。清淨業報不可沮壞。觀者欣樂。無有厭足。是出世法。非世所染。一切衆生咸來觀察。無有能得究其妙好。疏第三時兜率下。見佛嚴處中。二初明感應緣會。二卽於已下。正顯嚴處。於中分二。先明一方嚴處。後結通十方。今初。初雖標座。下列樓帳等。皆兼處嚴。文分爲二。初總顯體德。後有百萬下。別明體用。今初有十一句。初總餘別。總中無盡大願。隨意出生。悲智必俱。生死無染。名摩尼藏。展行彌布。故有敷言。別有十種圓滿勝相。以斯妙座。實德成故。初一自體相。以寶成故。次六因相。一深遠相。二勝妙相。三廣大相。四同體相。五具德相。六堅固相。後三總顯殊特。卽座之德用。一端嚴故。二離染故。三無極故。有百萬億層級。周而圍繞。百萬億金網。百萬億華帳。百萬億寶帳。百萬億鬘帳。百萬億香帳。張施其上。華鬘垂下。香氣普熏。百萬億華蓋。百萬億鬘蓋。百萬億寶蓋。諸天執持。四面行列。百萬億寶衣。以敷其上。

疏二別明體用中。通有二百九十九種百萬億。廣上三段。卽爲三別。初廣自體。次有百萬億。初發心下。廣前殊特。三百萬億善根下。廣前因相。初一多明器世間嚴。後二顯衆生世閒嚴。皆智正覺世閒之力也。皆言百萬億者。位增十行之百萬故。初中長分爲十。前九色相嚴。後一音聲嚴。其一嚴事。皆卽法門。可以意得。

第一有十句座體嚴。於中初句辨座層級。後九覆座之嚴。雖四面行列執蓋。亦爲覆座。

百萬億樓閣綺煥莊嚴。百萬億摩尼網。百萬億寶網彌覆其上。百萬億寶瓔珞網。四面垂下。百萬億莊嚴具網。百萬億蓋網。百萬億衣網。百萬億寶帳網。以張其上。百萬億寶蓮華網。開敷光榮。百萬億寶香網。其香美妙。稱悅衆心。

疏第二樓閣下十句。復於殿內建立樓閣。繞座莊嚴。亦是嚴處。於中初句總。下九句別顯嚴閣。百萬億寶鈴帳。其鈴微動。出和雅音。百萬億旃檀寶帳。香氣普熏。百萬億寶華帳。其華敷榮。百萬億衆妙色衣帳。世所希有。百萬億菩薩帳。百萬億雜色帳。百萬億真金帳。百萬億瑠璃帳。百萬億種種寶帳。悉張其上。百萬億一切寶帳。大摩尼寶。以爲莊嚴。

疏第三寶鈴帳下十句。辨帳嚴。亦是繞座。前已辨覆故。若重辨者。帳上建樓。樓上覆帳。重重無盡耳。

百萬億妙寶華周帙飾。百萬億頻婆帳。殊妙間錯。百萬億寶鬘。百萬億香鬘。四面垂下。百萬億天堅固香。其香普熏。百萬億天莊嚴具瓔珞。百萬億寶華瓔珞。百萬億勝藏寶瓔珞。百萬億摩尼寶瓔珞。百萬億海摩尼寶瓔珞。莊嚴座身。百萬億妙寶繒采。以爲垂帶。

疏第四妙寶華下。有十一句。辨嚴座身。其頻婆帳。應在寶華之前。類例穩便。亦可十二句辨帳。九句嚴座身。頻婆者。此云身影質。謂帳莊嚴具中。現外質之影故。

百萬億因陀羅金剛寶。百萬億自在摩尼寶。百萬億妙色真金藏。以爲閒飾。百萬億毘盧遮那摩尼寶。百萬億因陀羅摩尼寶。光明照耀。百萬億天堅固摩尼寶。以爲牕牖。百萬億清淨功德摩尼寶。彰施妙色。百萬億清淨妙藏寶。以爲門闕。百萬億世中最勝半月寶。百萬億離垢藏摩尼寶。百萬億師子面摩尼寶。閒錯莊嚴。百萬億心王摩尼寶。所求如意。百萬億閻浮檀摩尼寶。百萬億清淨藏摩尼寶。百萬億帝幢摩尼寶。咸放光明。彌覆其上。百萬億白銀藏摩尼寶。百萬億須彌幢摩尼寶。莊嚴其藏。

疏第五因陀羅金剛寶下。有十七句。亦嚴座四周。皆明妙寶。以爲窗門及覆。亦嚴座體。以莊嚴其藏。是蓮華藏故。標中表法。有異住行。不言蓮華。理實應有。或是座身之龜名藏。

百萬億真珠瓔珞。百萬億瑠璃瓔珞。百萬億赤色寶瓔珞。百萬億摩尼瓔珞。百萬億寶光明瓔珞。百萬億種種藏摩尼瓔珞。百萬億甚可樂見赤真珠瓔珞。百萬億無邊色相摩尼寶瓔珞。百萬億極清淨無比寶瓔珞。百萬億勝光明摩尼寶瓔珞。周而垂布。以爲莊嚴。百萬億摩尼身殊妙嚴飾。百萬億因陀羅妙色寶。疏第六真珠瓔珞下十二句。瓔珞周垂嚴。其摩尼身下二句。文似闕略。謂因陀羅妙色寶下。無所結屬。又非下之香類。不可別爲一段。

百萬億黑旃檀香。百萬億不思議境界香。百萬億十方妙香。百萬億最勝香。百萬億甚可愛樂香。咸發香氣。普熏十方。百萬億頻婆羅香。普散十方。百萬億淨光香。普熏衆生。百萬億無邊際種種色香。普熏一切。

諸佛國土。永不歇滅。百萬億塗香。百萬億熏香。百萬億燒香。香氣發越。普熏一切。百萬億蓮華。沈水香。出大音聲。百萬億遊戲香。能轉衆心。百萬億阿耨那香。香氣普熏。其味甘美。百萬億能開悟香。普徧一切。令其聞者。諸根寂靜。復有百萬億無比香。王香。種種莊嚴。

疏第七黑旃檀下。有十六句。以香爲嚴。阿耨那者。此云紅赤色。

雨百萬億天華雲。雨百萬億天香雲。雨百萬億天末香雲。雨百萬億天拘蘇摩華雲。雨百萬億天波頭摩華雲。雨百萬億天優鉢羅華雲。雨百萬億天拘物頭華雲。雨百萬億天芬陀利華雲。雨百萬億天曼陀羅華雲。雨百萬億一切天華雲。雨百萬億天衣雲。雨百萬億摩尼寶雲。雨百萬億天蓋雲。雨百萬億天幡雲。雨百萬億天冠雲。雨百萬億天莊嚴具雲。雨百萬億天寶鬘雲。雨百萬億天寶瓔珞雲。雨百萬億天旃檀香雲。雨百萬億天沈水香雲。

疏第八雨百萬下。二十句。雨雲爲嚴。

建百萬億寶幢。懸百萬億寶幡。垂百萬億寶繒帶。然百萬億香爐。布百萬億寶鬘。持百萬億寶扇。執百萬億寶拂。懸百萬億寶鈴網。微風吹動。出妙音聲。百萬億寶欄楯。周匝圍繞。百萬億寶多羅樹。次第行列。百萬億妙寶牕牖。綺麗莊嚴。百萬億寶樹。周匝垂陰。百萬億樓閣。延袤綺飾。百萬億寶門。垂布瓔珞。百萬億金鈴。出妙音聲。百萬億吉祥相瓔珞。嚴淨垂下。百萬億寶悉底迦。能除衆惡。百萬億金藏。金縷織成。百萬億寶蓋。衆寶爲竿。執持行列。百萬億一切寶莊嚴具網。間錯莊嚴。百萬億光明寶。放種種光。百萬億光明。周徧照耀。百萬億日藏輪。百萬億月藏輪。並無量色寶之所集成。

百萬億香燄。光明曠徹。百萬億蓮華藏。開敷鮮榮。百萬億寶網。百萬億華網。百萬億香網。彌覆其上。百萬億天寶衣。百萬億天青色衣。百萬億天黃色衣。百萬億天赤色衣。百萬億天奇妙色衣。百萬億天種種寶奇妙衣。百萬億種種香熏衣。百萬億一切寶所成衣。百萬億鮮白衣。悉善敷布。見者歡喜。百萬億天鈴幢。百萬億金網幢。出微妙音。百萬億天繒幢。衆綵具足。百萬億香幢。垂布香網。百萬億華幢。雨一切華。百萬億天衣幢。懸布妙衣。百萬億天摩尼寶幢。衆寶莊嚴。百萬億天莊嚴具幢。衆具校飾。百萬億天鬘幢。種種華鬘。四面行布。百萬億天蓋幢。寶鈴和鳴。聞皆歡喜。

疏第九建百萬下四十八句。座外四面嚴於中有四。初二十句。雜雜莊嚴。羅列座側。言樓閣延袤者。靜法云。梵云菴莫迦。此云帳。若是樓閣。應云微塵囊。卽不爾者。譯之誤也。此或應爾。前文已有樓閣。故若重辨者。亦無大失。寶悉底迦者。具云塞縛悉底迦。此云有樂。若見此相。必獲安樂。其形如萬字。具於音義。今寶形似此。二光明寶下九句。光明嚴言網覆者。若世之燈。以護夕蟲。成隱曠故。三天寶衣下九句。寶衣敷布嚴。四天鈴幢。下十句。寶幢行列嚴。

百萬億天螺。出妙音聲。百萬億天鼓。出大音聲。百萬億天箜篌。出微妙音。百萬億天牟陀羅。出大妙音。百萬億天諸雜樂。同時俱奏。百萬億天自在樂。出妙音聲。其聲普徧一切佛刹。百萬億天變化樂。其聲如響。普應一切。百萬億天鼓。因於撫擊。而出妙音。百萬億天如意樂。自然出聲音節相和。百萬億天諸雜樂。出妙音聲。滅諸煩惱。

百萬億悅意音。讚歎供養。百萬億廣大音。讚歎承事。百萬億甚深音。讚歎修行。百萬億衆妙音。歎佛業果。

百萬億微細音。歎如實理。百萬億無障礙真實音。歎佛本行。百萬億清淨音。讚歎過去供養諸佛。百萬億法門音。讚歎諸佛最勝無畏。百萬億無量音。歎諸菩薩功德無盡。百萬億菩薩地音。讚歎開示一切菩薩地相應行。百萬億無斷絕音。歎佛功德無有斷絕。

百萬億隨順音。讚歎稱揚見佛之行。百萬億甚深法音。讚歎一切法無礙智相應理。百萬億廣大音。其音充滿一切佛刹。百萬億無礙清淨音。隨其心樂。悉令歡喜。百萬億不住三界音。令其聞者深入法性。百萬億歡喜音。令其聞者心無障礙。深信恭敬。百萬億佛境界音。隨所出聲。悉能開示一切法義。百萬億陀羅尼音。善宣一切法句差別。決了如來秘密之藏。百萬億一切法音。其音和暢。克諧衆樂。

疏第十天蠡出妙音下。辨音聲嚴於中。二初十句樂音嚴。後悅意音下二十句法音嚴。前中云。牟陀羅者。此云鋒鼓。謂天樂初奏。此鼓先作。故後法音嚴中。初十一句讚歎三寶。後隨順音下九句說法益物。別明體用中。初廣自體竟。

有百萬億初發心菩薩。纔見此座。倍更增長一切智心。百萬億治地菩薩。心淨歡喜。百萬億修行菩薩。悟解清淨。百萬億生貴菩薩。住勝志樂。百萬億方便具足菩薩。起大乘行。百萬億正心住菩薩。勤修一切菩薩道。百萬億不退菩薩。淨修一切菩薩地。百萬億童真菩薩。得一切菩薩三昧光明。百萬億法王子菩薩。入不思議諸佛境界。百萬億灌頂菩薩。能現無量如來十力。

疏大文第二。廣前殊特者。前文略云。見者無厭。亦已略明益相。今廣顯之。卽座之德用。恭敬供養。復顯爲嚴。文分爲二。初明獲益。後申供養。前中有三十九句。曲分爲四。初十約位辨益。

百萬億菩薩。得自在神通。百萬億菩薩。生清淨解。百萬億菩薩。心生愛樂。百萬億菩薩。深信不壞。百萬億菩薩。勢力廣大。百萬億菩薩。名稱增長。百萬億菩薩。演說法義。令智決定。百萬億菩薩。正念不亂。百萬億菩薩。生決定智。百萬億菩薩。得聞持力。持一切佛法。百萬億菩薩。出生無量廣大覺解。百萬億菩薩。安住信根。

疏二得自在下。有十二句。雜辨得益。

百萬億菩薩。得檀波羅蜜。能一切施。百萬億菩薩。得尸波羅蜜。具持衆戒。百萬億菩薩。得忍波羅蜜。心不妄動。悉能忍受一切佛法。百萬億菩薩。得精進波羅蜜。能行無量出離精進。百萬億菩薩。得禪波羅蜜。具足無量禪定光明。百萬億菩薩。得般若波羅蜜。智慧光明。能普照耀。百萬億菩薩。成就大願。悉皆清淨。百萬億菩薩。得智慧燈。明照法門。百萬億菩薩。爲十方諸佛法光所照。百萬億菩薩。周徧十方。演離癡法。

疏三得檀下十句。約行辨益。

百萬億菩薩。普入一切諸佛刹土。百萬億菩薩。法身隨到一切佛國。百萬億菩薩。得佛音聲。能廣開悟。百萬億菩薩。得出生一切智方便。百萬億菩薩。得成就一切法門。百萬億菩薩。成就法智。猶如寶幢。能普顯示一切佛法。百萬億菩薩。能悉示現如來境界。

疏四普入一切佛刹下七句。約大用辨益。後三並通諸位。或可第二段明迴向。第三段明十行。第四段明十地。或唯約十住。通別無礙。鈔或可第二明迴向者。以初約位。是十住。三明十度。全同十行。故二配迴向。四配十地。則豎位具足。以第二段中神通不壞等。亦有迴向意。第四段普入佛刹等。亦有十地。

體勞。故爲此配。由二三前卻。二四不顯。故前正釋。後三通諸位。廣殊特中。初明獲益。曲分爲四竟。
百萬億諸天王。恭敬禮拜。百萬億龍王。諦觀無厭。百萬億夜叉王。頂上合掌。百萬億乾闥婆王。起淨信心。
百萬億阿修羅王。斷憍慢意。百萬億迦樓羅王。口銜繒帶。百萬億緊那羅王。歡喜踴躍。百萬億摩睺羅伽。
王。歡喜瞻仰。百萬億世主。稽首作禮。百萬億忉利天王。瞻仰不瞬。百萬億夜摩天王。歡喜讚歎。百萬億兜。
率天王。布身作禮。百萬億化樂天王。頭頂禮敬。百萬億他化天王。恭敬合掌。百萬億梵天王。一心觀察。百。
萬億摩醯首羅天王。恭敬供養。百萬億菩薩。發聲讚歎。

疏二諸天恭敬下。明供養。文分爲五。初十七句。雜明八部人天菩薩三業設敬。其中所作。各隨類所宜。
百萬億天女。專心供養。百萬億同願天。踴躍歡喜。百萬億往昔同住天。妙聲稱讚。百萬億梵身天。布身敬。
禮。百萬億梵輔天。合掌於頂。百萬億梵衆天。圍繞侍衛。百萬億大梵天。讚歎稱揚。無量功德。百萬億光天。
五體投地。百萬億少光天。宣揚讚歎。佛世難值。百萬億無量光天。遙向佛禮。百萬億光音天。讚歎如來甚。
難得見。百萬億淨天。與宮殿俱而來詣此。百萬億少淨天。以清淨心。稽首作禮。百萬億無量淨天。願欲見。
佛。投身而下。百萬億徧淨天。恭敬尊重。親近供養。百萬億廣天。念昔善根。百萬億少廣天。於如來所生希。
有想。百萬億無量廣天。決定尊重。生諸善業。百萬億廣果天。曲躬恭敬。百萬億無煩天。信根堅固。恭敬禮。
拜。百萬億無熱天。合掌念佛。情無厭足。百萬億善見天。頭面作禮。百萬億善現天。念供養佛心。無懈歇。百。
萬億阿迦尼吒天。恭敬頂禮。百萬億種種天。皆大歡喜。發聲讚歎。百萬億諸天。各善思惟。而爲莊嚴。
疏二天女專心下二十六句。唯明諸天三業敬養。初之三句。卽欲界天色究竟。後復言種種天者。或通。

無色。或總上諸類。善思惟天。亦通諸類。

百萬億菩薩天。護持佛座。莊嚴不絕。百萬億華手菩薩。雨一切華。百萬億香手菩薩。雨一切香。百萬億鬘手菩薩。雨一切鬘。百萬億末香手菩薩。雨一切末香。百萬億塗香手菩薩。雨一切塗香。百萬億衣手菩薩。雨一切衣。百萬億蓋手菩薩。雨一切蓋。百萬億幢手菩薩。雨一切幢。百萬億幡手菩薩。雨一切幡。百萬億寶手菩薩。雨一切寶。百萬億莊嚴手菩薩。雨一切莊嚴具。

疏三菩薩天下有十二句。明菩薩事供養。

百萬億諸天子。從天宮出。至於座所。百萬億諸天子。以淨信心。并宮殿俱。百萬億生貴天子。以身持座。百萬億灌頂天子。舉身持座。

疏四諸天子從天宮出下四句。諸天身供養。

百萬億思惟菩薩。恭敬思惟。百萬億生貴菩薩。發清淨心。百萬億菩薩。諸根悅樂。百萬億菩薩。深心清淨。百萬億菩薩。信解清淨。百萬億菩薩。諸業清淨。百萬億菩薩。受生自在。百萬億菩薩。法光照耀。百萬億菩薩。成就於地。百萬億菩薩。善能教化一切衆生。

疏五思惟菩薩下十句。菩薩修法供養。亦明得益菩薩多明得益。諸天但說供養者。諸天供養是益。因故。諸天得益。卽菩薩故。上申供。合前獲益。大文廣前殊特竟。

百萬億善根所生。百萬億諸佛護持。百萬億福德所圓滿。百萬億殊勝心所清淨。百萬億大願所嚴潔。百萬億善行所生起。百萬億善法所堅固。百萬億神力所示現。百萬億功德所成就。百萬億讚歎法。而以讚

歎。

疏第三百萬億善根下。廣前因深。十句可知。所以此會嚴事偏多者。一此天多以補處爲王故。二賢位已極。大悲普周故。所以十住無菩薩迎。表凡入位故。夜摩卽有已入位故。然亦未廣。而此勝相皆是如來海印所現。法界差別自在。實德人法無礙。依正渾融之嚴事也。上廣因相。合前一方嚴處竟。

如此世界兜率天王。奉爲如來敷置高座。一切世界兜率天王。悉爲於佛如是敷座。如是莊嚴。如是儀則。如是信樂。如是心淨。如是欣樂。如是喜悅。如是尊重。如是而生希有之想。如是踴躍。如是渴仰。悉皆同等。疏第二如此世界下。結通十方可知。見佛嚴處竟。

爾時兜率天王。爲如來敷置座已。心生尊重。與十萬億阿僧祇兜率天子。奉迎如來。

疏第四爾時下。迎佛興供。於中二。先將迎興供。二爾時如來威神力下。見佛興供。前中二。初奉迎。

以清淨心。雨阿僧祇色華雲。雨不思議色香雲。雨種種色鬘雲。雨廣大清淨旃檀雲。雨無量種種蓋雲。雨細妙天衣雲。雨無邊衆妙寶雲。雨天莊嚴具雲。雨無量種種燒香雲。雨一切旃檀沈水堅固末香雲。諸天子衆。各從其身。出此諸雲。時百千億阿僧祇兜率天子。及餘在會諸天子衆。心大歡喜。恭敬頂禮。阿僧祇天女。踴躍欣慕。諦觀如來。

疏二以清淨下。興供於中。先諸天興供。皆從身出者。非唯顯諸天福力。亦表身爲供具。供自心生。

兜率宮中。不可說諸菩薩衆。住虛空中。精勤一心。以出過諸天諸供養具。供養於佛。恭敬作禮。阿僧祇首

樂。一時同奏。

疏後兜率宮下。菩薩興供可知。將迎興供竟。

爾時如來威神力故。往昔善根之所流故。不可思議自在力故。兜率宮中。一切諸天。及諸天女。皆遙見佛。如對目前。

疏第二見佛興供中二。先諸天。後百千億那由他先住下。明菩薩。前中三。初明承力見佛。一現佛神力。二宿善力。三法門力。

同興念言。如來出世。難可值遇。我今得見。具一切智於法無礙正等覺者。如是思惟。如是觀察。與諸衆會。悉共同時。奉迎如來。

疏二同興下。慶遇奉迎。

各以天衣。盛一切華。盛一切香。盛一切寶。盛一切莊嚴具。盛一切天旃檀末香。盛一切天沈水末香。盛一切天妙寶末香。盛一切天香華。盛一切天曼陀羅華。悉以奉散供養於佛。

疏三各以下。正明興供於中三。初十句。衣盛供以散佛。表修寂滅以趣果故。

百千億那由他阿僧祇兜率陀天子。住虛空中。咸於佛所。起智慧境界心。燒一切香。香氣成雲。莊嚴虛空。又於佛所。起歡喜心。雨一切天華雲。莊嚴虛空。又於佛所。起尊重心。雨一切天蓋雲。莊嚴虛空。又於佛所。起供養心。散一切天鬘雲。莊嚴虛空。又於佛所。生信解心。布阿僧祇金網。彌覆虛空。一切寶鈴。常出妙音。又於佛所。生最勝福田心。以阿僧祇帳莊嚴虛空。雨一切瓔珞雲。無有斷絕。又於佛所。生深信心。以阿僧祇諸天宮殿莊嚴虛空。一切天樂。出微妙音。又於佛所。生最勝難遇心。以阿僧祇種種色天衣雲。莊嚴虛

空。雨於無比種種妙衣。又於佛所生無量歡喜踊躍心。以阿僧祇諸天寶冠莊嚴虛空。雨無量天冠。廣大
成雲。又於佛所起歡喜心。以阿僧祇種種色寶莊嚴虛空。雨一切瓔珞雲。無有斷絕。

疏二百千億下十句。明起心。雨供嚴空。顯所修萬行。稱法性空。空有無礙。是嚴空義。

百千億那由他阿僧祇天子。咸於佛所生淨信心。散無數種種色天華。然無數種種色天香。供養如來。又
於佛所起大莊嚴變化心。持無數種種色天旃檀末香。奉散如來。又於佛所起歡喜踊躍心。持無數種種
色蓋。隨逐如來。又於佛所起增上心。持無數種種色天寶衣。敷布道路。供養如來。又於佛所起清淨心。持
無數種種色天寶幢。奉迎如來。又於佛所起增上歡喜心。持無數種種色天莊嚴具。供養如來。又於佛所
生不壞信心。持無數天寶鬘。供養如來。又於佛所生無比歡喜心。持無數種種色天寶幡。供養如來。百千
億那由他阿僧祇諸天子。以調順寂靜無放逸心。持無數種種色天樂。出妙音聲。供養如來。

疏三百千億那由他阿僧祇天子下九句。雜申供養。表萬行雜修。故調順寂靜。無放逸心。應分爲二。則
有十句。先諸天興供竟。

百千億那由他不可說先住兜率宮諸菩薩衆。以從超過三界法所生。離諸煩惱行所生。周徧無礙心所
生。甚深方便法所生。無量廣大智所生。堅固清淨信所增長。不思議善根所生起。阿僧祇善巧變化所成
就。供養佛心之所現。無作法門之所印。出過諸天諸供養具。供養於佛。

疏第二菩薩興供中二。先明行成依報供。後其諸菩薩下。身出正報供。前中二十七句。文分爲三。初十
句。多因成多果之供。次八句。一因成一果供。後九句。一因成多果供。應有四句。由多因成一果。攝在初

段。以多因能一一成故。又初段卽一切中有一。及一切中有一。次段卽一中。後段卽一中一切也。今初十句。一時併舉多因。後通成諸供。出過諸天者。勝故多故。餘可知。

以從波羅蜜所生一切寶蓋。於一切佛境界清淨解所生一切華帳。無生法忍所生一切衣。入金剛法無礙心所生一切鈴網。解一切法如幻心所生一切堅固香。周徧一切佛境界如來座心所生一切佛衆寶妙座。供養佛不懈心所生一切寶幢。解諸法如夢歡喜心所生佛所住一切寶宮殿。

疏第二一因一果中。皆因果相似。一蓋以障塵。若度能除蔽。二帳以庇蔭。若悲爲佛境。華以開敷。如覺解清淨。三法忍和悅。用嚴法身。四演教網。則震金剛之妙音。觀教網則不礙文而見理。五香氣聞而不可見。見而不可攬。猶幻法見而不可取。取而不可得。知幻無堅。以成堅法。六周徧法空。是佛智身所依之境。座之義也。七摧懈慢幢。樹法勝幢。故八諸法如夢。是佛棲託之所也。

無著善根。無生善根。所生一切寶蓮華雲。一切堅固香雲。一切無邊色華雲。一切種種色妙衣雲。一切無邊清淨旃檀香雲。一切妙莊嚴寶蓋雲。一切燒香雲。一切妙鬘雲。一切清淨莊嚴具雲。皆徧法界。出過諸天供養之具。供養於佛。

疏第三無着下一因多果供。無著無生。但是一義。無生約理。無著約智。此二契合。方成一因。文中九句可知。

其諸菩薩。一一身各出不可說百千億那由他菩薩。皆充滿法界虛空界。其心等於三世諸佛。以從無顛倒法所起。無量如來力所加。開示衆生安隱之道。具足不可說名味句。普入無量法。一切陀羅尼種中生。

不可窮盡辯才之藏。心無所畏。生大歡喜。以不可說無量無盡。如實讚歎法。讚歎如來。無有厭足。疏第二身出正報供。中文有十句。初二明現身德。量謂一一量周法界。德齊佛故。次以從下三句。明勝辨之因。次具足下四句。顯勝辨所依。後以不可下一句。正申辨讚。皆從總持辨藏之所流故。情動於中。故形於言。言猶不足。敬之至也。鈔情動於中等者。卽子夏詩序。具云。情動於中。而形於言。言之不足。故嗟歎之。嗟歎之不足。故詠歌之。詠歌之不足。故不知手之舞之。足之蹈之。上菩薩興供。合前諸天。迎佛興供。科竟。

大方廣佛華嚴經疏鈔會本卷七十六

爾時一切諸天及諸菩薩衆。見於如來。應正等覺。不可思議人中之雄。

疏第五爾時一切下。觀佛勝德中分二。先明觀佛身雲勝德。後爾時如來大悲下。明現勝德之意。前中分二。初觀勝德。後時彼大衆咸見下。見佛光用。前通十眼所見。後約天眼所見。今初也。然此經文次第具顯如來二十一種殊勝功德。以文言浩汗。致古釋同迷。然離世間品。雖具二十一。句。而此文義兼廣。故隨便引於諸論。文分爲三。初總觀如來。次別觀德相。三結成觀解。鈔而此文義兼廣者。以離世間品。初歎佛。有名無釋。今文有釋無名。四紙餘經。次第具釋二十一德。故云文義兼廣。四紙餘經。文廣其中句義。該收諸論。異釋無遺。故云義廣。由此故於此中引於諸論。將論釋經。將經證論。故云隨便。古人亦引諸論。在離世間。既無經文。論無憑據。由此無名。故古德同迷。賢首以下。總結十句。分爲十段。刊定以十六三業配之。並如下引。今並不用。

疏今初略舉三德。以顯一雄。一者如來。二言應者。卽是應供。三正等覺。卽正徧知。此一應字。亦通屬下。隨應覺故。此卽總句。離世間品。名妙悟皆滿。佛地攝論。皆名最清淨覺。親光釋云。謂佛世尊。普於一切。有爲無爲。所應覺境。正開覺故。此釋正義。揀異邪覺。又於一切所應覺境。淨妙圓滿。正開覺故。此釋最清淨義。亦明覺滿。揀異菩薩。又於一切如所有性。盡所有性。正開覺故。此釋符今等字。謂雙照二諦平等覺故。亦是徧義。故云正徧知。鈔離世間品。名妙悟皆滿三者。上釋經中總句。此下會其總句異名。

然攝論本論。卽無著所造。世親無性二俱有釋。唐三藏俱譯。皆有十卷。此並當第五。今依無性釋所知相中。因云。若欲釋大乘法。略由三相。一由說緣起。二由說從緣所生法相。三由說語義。論曰。說語義者。謂說初句。後以餘句分別顯示。或由德處。或由義處。釋中云。已得在已。圓滿饒益。故名爲德。未得在已。隨順趣求。故名爲義。論曰。德處者。謂說佛功德。卽二十一種殊勝功德。釋中云。最清淨覺。卽是初句。由所餘句。開顯其義。親光釋云者。親光卽佛地經論主。二本攝論。不解總句。此菩薩解。自有三釋。疏便以義揀斷釋之。然此三釋。有其二意。一別別釋總句。一釋正字。二釋最清淨字。三釋等字。彼無等字。義符今經。二者於所覺法。影略出之。一約爲無爲。爲所應覺境。二云一切爲所應覺境。三以如所有性等。爲所應覺。故小異也。爲與無爲。總明所覺。不出二故。二一切法。曲盡差別故。三如所有等。通能所故。其如所有性等。今當略說。卽雜集論第十一云。事邊際所緣者。謂一切法。盡所有性。如所有性。彼疏釋云。事邊際等者。事有二種。一是自相事。二是共相事。初能緣心。盡法分量。後能緣心。如諸經中。所有共體。俱稱邊際。此中事卽是境。就文分三。初標章。次開二義。後別釋。此上是初二段。下卽別釋。論云。盡所有性者。謂蘊界處。爲顯所知諸法體事。唯有爾所分量邊際。是故建立蘊界處。三彼疏釋云。謂盡有爲無爲諸法。自相。論云。如所有性者。謂四聖諦。十六行真。如一切行無常。一切行苦。一切法無我。涅槃寂靜等。空無願無相。彼疏釋云。此中略明四種共相。第一諦門。謂四聖諦。第二行門。謂十六行。及真如。第三卽陀南門。謂一切行無常。至寂靜。四解脫門。謂空無相無願。本論舉境。不舉能了。論云。由如是等義差別門。了所知境。故名如所有性。疏先釋通名。次別釋。此初也。謂由如是四諦十六行等。是盡所有性。

中差別義。其能緣心。如諸法中所有差別。皆悉了知。故名如所有性。論或以諦門了所知境。彼疏云。謂即前所說諸蘊界處。隨其所應。了知是苦。乃至是道。彼疏別釋四差別。即爲四段。此初文也。謂總觀前盡所有性中。蘊界處有漏者。觀於苦集。其無漏者。觀其滅道。故云隨其所應。論云。或以行門了所知境。說一一諦。各有四行。及一切法。無有差別。皆真如行。彼疏云。前諦及法門。約所緣得稱。此下就能緣得稱。即是四諦。各別有四行。即是前總作諦解。而了蘊等。今約一一諦中。別作四相解。而起四行。及一切法。作總相真如緣。而起真如行。即名了無常及真如等。行解名行。即前十六行。是緣安立行。後真如行。是緣非安立行。論或以諸法。歸陀南門。了所知境。即諸行無常。乃至涅槃寂靜。彼疏。歸陀南者。舊爲憂陀那。訛也。正翻爲說義。常無問自說。隨義作名。亦總略義。或名標相義。謂一切行無常。是有爲標相。涅槃寂靜。是無爲標相。論或以解脫門。了所知境。謂空無願無相如是等。彼疏云。謂離繫涅槃。稱爲解脫。空定諸心所。是趣入涅槃所依之門。此中即以空等三空門。以了前境。即了所知諸法。是空及無相。謂雙照下。疏釋第二義。釋曰。二性之義。已略備矣。其盡所有。唯是世諦。其如所有。通於二諦。則顯如來自相共相。若教所說。若法本性。無不證知。如實覺故。疏中但云。雙照二諦平等覺故。然二諦平等。則二性無礙。無所不收。既無不知。即是徧義。

疏彼經無正等言。此經闕最清淨。上妙嚴品。則有最言。故云於一切法。成最正覺。下離世間中。復有妙悟。妙者微妙。離覺相故。悟覺及知名異義同。妙正徧最。名義俱別。所揀異故。若世親無性。不解總句。但以下別德。成斯一覺。故清淨覺。句句皆徧。鈔彼經無正等下。會四經文。言有影略。總皆含具於中先。

列四別。後妙者微妙下。會釋妙正徧最者。妙揀取相。正揀於邪。徧揀不周。最揀未極。如初會說。餘義可知。

其身無量。不可稱數。現不思議種種神變。令無數衆生。心大歡喜。普徧一切虛空界。一切法界。以佛莊嚴。而爲莊嚴。令一切衆生。安住善根。示現無量諸佛神力。超過一切諸語言道。諸大菩薩。所共欽敬。隨所應化。皆令歡喜。住於諸佛廣大之身。功德善根。悉已清淨。色相第一。無能瞋奪。

疏第二其身下。別觀德相。二十一德。分二十段。後二合故。然攝論中。二十一德。通有三節。一先列經二。十一句。二無著菩薩立功德名。以爲解釋。三無性等。但釋論名。以符經旨。今各句句配屬。其佛地論釋。有同攝論。有異攝論。異者引之。今初明不二現行經也。卽觀察如來一向無障轉功德。此是無著立名。他皆倣此。鈔今各句句配屬者。以論中三節。各一時併舉。謂第一列經二十一句。第二本論一時立。二十一德之名。第三釋論次第一時牒釋。故今各配。摘成二十段。疏中文各有二。先釋名義。後釋經文。今初不二現行。先釋名義。中具指經論。及釋三段可知。但無性釋論中。先牒本論功德之名。後方指經。如此段云。謂於此知一向無障轉功德者。此卽開示不二現行。下皆準此。世親則先牒經。今疏皆先牒。經後引本論立名。故釋名義中。且分爲二。一牒經立名。二引釋論釋。初中其卽觀察如來五字。是疏義。加順於此經觀佛德故。餘皆是彼論文。今初二現行。先牒經立名可知。

疏無性二釋。一云。謂佛一向無障礙。智於一切事品類差別。無著無礙故。非如聲聞等。有處有障。有處無障二種。此約離所知障。智德滿故。非如聲聞有處有障者。謂於極遠時方。無邊差別。諸佛法中有無。

智轉。鈔此約離所下。疏取下生起中意。以出德體。

疏第二釋云。或二處現行。此中無有。如是所說。二種現行。此釋二處。亦前有障無障。但前釋約表。爲一智轉。此釋約遮。故無彼二。正同下經。二行永絕。

疏世親同於後釋。親光云。凡夫二乘現行二障。世尊無故。凡夫現行生死。起諸雜染。二乘現行涅槃。棄利樂事。世尊無彼現行二事故。名不二現行。鈔世親所解者。文全同也。然世親有四。一牒經名。二自解釋。三舉本論帖。四重釋。如此段云。此中不二現行者。一牒經謂二現行。此中無有。是故說名不二現行。二釋義。卽是於所知。一向無障礙轉功德。三舉本論帖。非聲聞獨覺智。亦有障亦無障故。四重釋也。文多如此。言親光下。會親光釋。用此消文。

疏無性生起云。云何而得此最勝覺。故次說此。諸聲聞等。於所知境。有二現行。所謂正智不染無知。佛無此故。鈔無性生起云下。第三段。此是無性釋論總畢。重復條流生起次第。而不曉者。謂爲再釋。今亦摘其生起。爲二十段。句句別配。此卽躡前總句。生此別中第一句也。故前釋云。此約離所知障。不染無知。卽所知障體。揀異染污無知耳。

疏文中分二。初廣顯利樂。明離所知。故不同二乘。二住於下。結成所住。彰離煩惱。不同凡夫。前中三。初明應廣順機。令喜。二普徧下。明其徧應。定慧莊嚴。生物善根。三示現下。彰應用深廣。雖超語言。而無遺曲濟。鈔文中二下。二釋文。雙用二論。初廣利樂。是親光意。離所知。故卽無性意。下離煩惱。卽唯親光意。若約親光不二現行。雙離二障。雙異凡小。定慧莊嚴等者。釋經以佛莊嚴。至安住善根。言定慧者。卽

法華第一云。佛自住大乘。如其所得法。定慧力莊嚴。以此度衆生故。

疏二結成所住者。初句明智住法身。能住所住。二俱廣大。下句心無煩惱。善根清淨。色相超倫。具上二義。名清淨覺。他皆倣此。鈔能住所住俱廣大者。所住卽法界。法身徧一切處故。廣大智稱法身等彼真性。如日光含空。具上二義。下結歸總句。兼例下文。

智慧境界不可窮盡。無比三昧之所出生。其身無際徧住一切衆生身中。令無量衆生皆大歡喜。令一切智種性不斷。

疏第二智慧已下。明趣無相法。卽觀察如來於有無無二相真如最勝清淨能入功德。

疏無性云。爲明斷德。故次說之。不住生死涅槃相故。卽無住涅槃。鈔後無性下。引釋論釋。於中文二。一明無性生起。卽無住涅槃五字是疏。餘皆是論。

疏然無相法。卽是清淨真如。趣謂趣入。謂此真如。諸法無性。以爲相故。非是有相。體卽圓成。自相有故。非是無相。此二不相離。名無二相。諸法中勝。故名最勝。遠離客塵。故名清淨。旣自能入。亦令他入。爲最清淨。自入則不住生死。他人則不住涅槃。鈔二然無相法下。疏取釋論釋。然疏雙用二釋。論文消經。及本論名。理無不盡。而文或取捨。無性具云。謂此真如有圓成相。無徧計所執相。由此道理。明無二相。無有無相。是實有故。無有有相。所執無故。最勝清淨能入功德者。謂卽真如最勝清淨。一切法中。最第一故。遠離一切客塵垢故。於此真如。自覺能入。亦令他入。是故說名最勝清淨能入功德。世親釋云。趣無相法者。謂清淨真如。名無相法。趣謂趣入。卽是於有無無二相真如最勝清淨能入功德。謂此真如。

非是有相。諸法無性。以爲相故。亦非無相。自相有故。於此無相。眞如最勝清淨。能入故。最勝能入。故清淨能入。故釋曰。觀上二論。以對疏文。昭然可見。

疏文中。先明自入。後明他入。今初。先明不住生死。智稱如境。皆不可盡。無比三昧。令智出生。又令眞如。出二障故。二其身下。明不住涅槃。同體大悲。徧住物身。心眞如性。物物徧故。二令無量下。辨令他入。一則大悲冥熏。二則大智爲說。令於身中見如來性。成一切智故。種性不斷。是入義也。此用常寂名爲涅槃。鈔徧住物身者。如有偈云。我今解了如來性。如來今在我身中。我與如來無差別。如來卽是我眞如。

住於諸佛究竟所住。生於三世諸佛之家。令不可數衆生。信解清淨。令一切菩薩智慧成就。諸根悅豫。法雲普覆。虛空法界。教化調伏。無有遺餘。隨衆生心。悉令滿足。令其安住。無分別智。出過一切衆生之上。疏第三住於諸佛究竟已下。明住於佛住。卽觀察如來無功用佛事。不休息功德。爲欲得上無住涅槃。故次明之。鈔爲欲得上下。第二引釋論釋。但有生起義。在釋文之中。

疏文中。初明所住。後彰住益。今初言佛住者。謂聖天梵等。皆佛所住。而於性空大悲。徧善安住。大悲性空。卽是佛家。故能不住生死涅槃。爲究竟住。此卽恩德。是以親光亦名爲觀。所謂化功德。常住大悲。晝夜六時。觀世閒故。後令不可下。彰住家益。初明由住大悲。故能益物無遺。是不休息義。由住性空。自無功用。故能令物住無分別。出過衆生。總顯勝也。鈔文中。下釋文爲二。從多而言。前段卽釋經。後段卽釋論。在文易了。而取論意。若其引釋論者。無性論云。謂不作功用。於諸佛事有情等中。能無閒斷。隨其

所應。恆正安住。聖天梵住。非如聲聞。要作功用。方能成辦。利有情事。非如外道。雖有所住。而非殊勝。天住。謂四種靜慮。梵住。卽是悲等無量。聖住。卽是空無相等。世親云。謂住佛所住。無所住處。性空也。謂此住中。常作佛事。無有休息。大悲故也。今用二論。以釋經文。大悲性空者。大悲是利他家。性空是自利家。故法華經明大悲爲室。淨名云。畢竟空寂舍。况二相導。眞實家也。故雙安位。故能不住下。卽上大悲般若所輔翼故。

獲一切智。放大光明。宿世善根。皆令顯現。普使一切發廣大心。令一切衆生。安住普賢不可壞智。徧住一切衆生國土。從於不退正法中生。住於一切平等法界。明了衆生心之所宜。現不可說不可說種種差別如來之身。非世言詞而歎可盡。能令一切常思念佛。充滿法界。廣度羣生。隨初發心。所欲利益。以法惠施。令其調伏。信解清淨。示現色身。不可思議。

疏第四獲一切下。明逮得一切佛平等性。下云得佛平等。卽觀察如來於法身中。所依意樂作事無差別功德。

疏如上佛住。爲共不共。故次明之。此一切諸佛。展轉和雜而同住故。一切諸佛三事無差。非如聲聞。但有所依。鈔此一切諸佛下。躡上生起以爲問端。故今答云。和雜而住。此亦釋經。從一切諸佛三事已下。釋論。此但標名。

疏文卽分三。初明所依無差別。謂一切智。以一切諸佛。皆依眞如清淨智故。放大光下。顯智之用。二普使已下。明意樂無差。謂同有利樂勝意樂故。普使之言。卽意樂也。不可壞智。卽如來藏。普賢菩薩自體。

徧故染而不染。名不可壞。反源照極。故名安住。三徧住下。作業無差。一切皆作受用變化利他事故。於中先明作業周徧。鈔文中別釋三事。皆先牒名。舉釋論釋。後隨經別解。普使之言下。是疏此德。世親但配屬而已。

疏次從於下。作業所依。卽自受用身。一受不失。名爲不退。謂得法性。卽念不退。此後親生佛智。此智生已。還住法界。次明了已下。正顯作業。初觀機後。現不可說下。作業受用變化。各有多類。名不可說差別之身。能令已下。彰業之益。一能益他。二隨初下。滿本所願。亦令於物能現色身。此上四段。名其自利。後十七段。明其利他。

等觀衆生。心無所著。住無礙住。得佛十力。無所障礙。心常寂定。未曾散亂。住一切智。

疏第五等觀衆生下。明到無障處。卽觀察如來修一切障對治功德。利他之中。先明化障對治。故次明之。謂已慣習一切煩惱。及所知障。對治聖道。卽一切智。及定自在性。鈔謂已慣習下。釋德名。全是無性論。

疏故論名爲修治。又已到永離一切習氣所依趣處。經名到無障處。二文互顯。以有治必無障。無障由有治故。鈔從故論名爲修治。是疏釋。又已到下。復是無性論釋。疏將屬經。故結云二文互顯。

疏文中心無所著。是無煩惱障。住無礙住。明無所知障。得佛十力。卽是種智。是所知障治。心常寂定。住一切智。卽煩惱障治。

善能開演種種文句真實之義。能悉深入無邊智海。出生無量功德慧藏。

疏第六、善能開演下。明不可轉法。即觀察如來降伏一切外道功德。由有上能治。故他不能轉。利有情事故。次明之。謂教證二法。皆不爲他所動轉。故無有餘法勝過此故。

疏文中。初明教道。能悉已下。證道。出生已下。二道之益。

恆以佛日普照法界。隨本願力。常現不沒。恆住法界。住佛所住。無有變異。於我。我所。俱無所著。住出世法。世法無染。

疏第七、恆以佛日下。明所行無礙。觀察如來。生在世間。不爲世法所礙功德。顯示如來所化之中。無高下礙。故次明之。謂世八風。不能拘礙。故親光名降魔功德。謂色等境。不能亂故。鈔謂世八風下。釋即疏取意略釋。兼會親光。以色等五塵。是塵境故。至釋文中。方出釋論。

疏文中。以佛身日普照法界。則橫無礙。常現不沒。則豎無礙。不以無信生盲等而不現故。正顯八風不礙。恆住已下。顯無礙因。無有變異。示無礙相。如摩尼珠。不隨物變。不著我所。於內無礙。世法不染。於外無礙。由住出世。如蓮華故。如有頌云。諸佛常游於世間。利樂一切有情類。八法勢風邪。分別不能傾動。不拘礙。鈔不以無信等而不現者。即第一迴向中意。如有頌云。即無性論。

於一切世間。建智慧幢。其智廣大。超過世間。無所染著。拔諸衆生。令出淤泥。置於最上智慧之地。所有福德。饒益衆生。而無有盡。了知一切菩薩智慧。信向決定。當成正覺。

以大慈悲。現不可說無量佛身。種種莊嚴。以妙音聲。演無量法。隨衆生意。悉令滿足。

疏第八、於一切下。明其所安立。不可思議。即觀察如來安立正法功德。由依前方便。能作饒益之事。故

次明之。謂十二分教。名所安立。由深廣故。不可思議。鈔謂十二下。即疏取論意釋。無性具云。謂契經等十二分教。名所安立。安立彼彼。自相共相故。如是安立。非諸愚夫。覺所行故。出世間故。不可思議。此所安立。不可思議。即是功德。

疏文中分二。初約所詮。以辨深廣。後約能詮。以明深廣。今初。初句總顯。建即安立。其智下。釋超世廣大。即是幢義。拔置智地。即是建義。所有已下。福智相對。明高廣義。

疏二。以大慈下。現身說法。約能詮教。以明安立。

於去來。今心常清淨。令諸衆生。不著境界。恆與一切諸菩薩記。令其皆入佛之種性。生在佛家。得佛灌頂。疏第九。於去來。今下。明游於三世平等法性。即觀察如來授記功德。以上加行利有情事。三世諸佛皆悉平等。故次明之。謂於三世平等性中。能隨解了過去未來。曾當轉事。皆如現在。而授記故。故下經云。普見三世。鈔謂於三世下。釋義。即無性釋。然前更有文云。謂於三世平等法性。能徧遊涉。謂於三世平等下。全同彼論。故下經下。證成。以遊三世。經不明顯。故以餘義文中具之。

疏文中。初明三世平等之義。故云心常清淨。自得平等。令物不著。使他平等。恆與以下。正明授記。授記未來。令同過去種性。亦名平等。

常遊十方。未曾休息。而於一切無所樂著。法界佛刹。悉能徧往。諸衆生心。靡不了知。所有福德。離世清淨。不住生死。而於世間。如影普現。

疏第十。常遊十方下。明其身流布一切世間。即觀察如來於一切世界。示現受用變化身功德。顯上利。

益一時頓徧。非次第作。故次明之。鈔顯上利益下。生起義在文中。易故不總釋。無性云。謂隨所化。徧諸世界。示現兩身。利樂彼故。

疏文中。初通辨二身。常約豎窮。徧約橫廣。十方法界。綺互其文。後諸衆生心下。總顯現相。德無不淨。故不住生死。機無不鑒。故普現世間。

以智慧月。普照法界。了達一切。悉無所得。恆以智慧。知諸世間。如幻如影。如夢如化。一切皆以心爲自性。如是而住。

疏第十一。以智慧月下。明於一切法。智無疑滯。即觀察如來斷疑功德。以於上十方彼彼之處。作斷疑事故。次明之。謂於諸境。善決定故。故下經云。智恆明達一切諸法。鈔謂於諸境下。釋義全無性論。

疏文中。初自斷疑。非不自決。能斷他疑故。智月普照。總明了境。了達無得。是了真境。非不證真。能了俗故。恆以智下。明了俗境。一切皆以心爲自性。義通二境。攝境爲心。是世俗勝義。心之自性。即是真如是。

勝義勝義。如是而住。以無所得而爲方便。雙照真俗。無住住故。菩薩智光月。法界以爲輪。游於畢竟空世間。靡不現。亦可屬上。現受用身。鈔文中。二疑。亦是論文。論但有兩句。云。非於諸法。自不決定。能決

他疑。此反釋也非離決定。能斷疑故。順也但用上句。若準梁論。具四無礙智。能自決疑。具四無礙辨。能決他疑。菩薩智光月者。即五十九經偈。亦可屬上者。此文通二勢。上約屬十一。爲自斷疑。亦通第十。其身流布。

一切世間。則斷他疑。方屬第十一。以屬後爲正。故云亦可屬前。

隨諸衆生業報不同。心樂差別。諸根各異。而現佛身。如來恆以無數衆生而爲所緣。爲說世間皆從緣起。

知諸法相皆悉無相。唯是一相。智慧之本。欲令衆生離諸相著。示現一切世間性相而行於世。爲其開示無上菩提。

疏二。隨諸已下。能斷他疑。初明隨機現身。如來已下。所斷疑境。爲說緣起。是斷疑法。深入緣起。疑見亡故。知緣起無性故。知法無相。無相無異。故名一相。智體理成。故爲其本。鈔深入緣起者。淨名云。深入緣起。斷諸邪見。有無二邊。無復餘習。寶積偈云。說法不有亦不無。以因緣故。諸法生。故由見因緣。能斷疑故。

疏後欲令下。正明斷疑。若離相著。開示菩提。疑方斷故。

爲欲救護一切衆生。出現世間。開示佛道。令其得見如來身相。攀緣憶念。勤加修習。除滅世間煩惱之相。修菩提行。心不散動。於大乘門。皆得圓滿。成就一切諸佛義利。

疏第十二。爲欲救下。明於一切行成就大覺。即觀察如來。令入種種行功德。由所化生。性有差別。故次明之。謂入種種行。皆成大覺。下經但云。了一切行。鈔謂入種種下。釋義二論易故。但以經屬論而已。今疏釋意。以成就大覺屬所知。即隨種種心行差別化之。究竟至於一切智故。如釋文中。故以法華開示悟入意釋耳。

疏文中。初約說法。令入。開示佛道者。令悟入故。後令其下。約現身。令入。攀緣修習。是進善行。除滅已下。是離惡行。修菩提行。總舉萬行。心不散動。即是入義。既萬行齊修。則因無不滿。果無不成。悉能觀察衆生善根。而不壞滅清淨業報。智慧明了。普入三世。

疏第十三。悉能觀察下。明於諸法。智無有疑惑。即觀察如來。當來法生妙智功德。由即於前所化。有能無能。善巧別知。故次明之。謂聖聲聞言。此人全無少分善根。如來知彼善法。當生現證。過去微少善根。種子所隨故。鈔由即於前下生起。謂聖聲聞下。釋義皆無性意。

疏故文云。悉能觀察下。經云。盡一切疑。如求度者。遠劫採薪興一善念。佛便知故。觀已便化。故不壞其清淨業報。智慧已下。釋其所以。以智普入。無不知故。故親光名爲能隨所應。恆正教誨功德。謂於諸法懷疑惑者。無有堪能。隨應教誨。唯佛能故。名智慧明了。則第十一是自斷疑。此斷他疑。鈔如求度者。遠劫採薪者。即大莊嚴論第九。因說供養聲聞得無量福。何況如來。便引此緣。昔有一人。因緣力故。發心出家。往至僧坊。值佛不在。詣身子所。身子觀其無少善根。詣諸比丘。比丘先問。誰不度汝。云舍利弗。如是展轉。皆不度之。如來大慈。至僧坊門。爲說偈云。一切種智身。大悲以爲體。佛於三界中。見諸受化子。猶如牛求犢。愛念無休息。以手摩頂。其人悲泣。具說不度因緣。佛說偈云。身子舍利弗者。彼非一切智。亦不解體性。不盡知中下。彼識有齊限。不能深解了。無有智能知。微細之業報。遂牽入僧坊。與度得道。身子問云。我觀此人。無少善因。云何與度。便得道耶。佛言。汝智微淺。此人過去無量劫前。爲一貧人。入阿蘭若山林。取薪爲虎所逼。以怖畏故。稱南無佛。種子今熟。故吾度之。得羅漢耳。故上云。微少善根。種子所隨。則第十一者。若準無性世親。皆十一斷他疑。今順親光。故爲此說。

永離一切世間分別。放光明網。普照十方一切世界。無不充滿。色身妙好。見者無厭。以大功德智慧神通。出生種種菩薩諸行。諸根境界。自在圓滿。作諸佛事。作已便沒。

疏第十四。永離一切下。明凡所現身。不可分別。下經但云。無能測身。卽觀察如來。如其勝解。示現功德。由上云。善巧別知。故此云。於前所化。邪正及俱行中。無有分別。鈔由上善巧別知下。生起。此上是疏躡前生後。無性但云。卽於所化有情。邪正俱行中。所應現相。不可分別耳。義在文中。

疏文中。初二句。明無分別義。世虛妄解。種現俱亡。故云永離。由自無分別故。餘不可以分別知。故親光名爲能正攝受。無染自體殊勝功德。謂佛身功德。非是雜染分別所起。無煩惱業生之雜染。故不可分別。而無性云。隨機現身。如摩尼珠。無分別者。則順今文。佛無分別。不順彼經不可之言。鈔而無性云。下。會通釋論。然無性具云。謂隨有情種種勝解。現金色等。雖現此身。而無分別。如摩尼珠。及簫笛等。廣說如彼。如來密經。釋曰。故疏斷云。則順今文。

疏次。放光明下。彰所示現。皆無分別。見無厭足。則顯衆生不能分別。如瞿波觀佛毛孔。念念無厭。不能窮究故。鈔如彼瞿波觀佛毛孔。卽七十五經。

疏以大功德下。辨能現德。出生已下。明所現益。諸根以下。辨所現相。謂諸根圓滿。境界自在。作諸佛事。總彰現意。作已便沒。明現時分。旣隨勝解現。則感謝應移。

善能開示。過現未來。一切智道。爲諸菩薩。普雨無量陀羅尼雨。令其發起廣大欲樂。受持修習。

疏第十五。善能開示下。明一切菩薩等所求智。卽觀察如來無量所依。調伏有情。加行功德。爲欲引發。任持不定。種性聲聞菩薩。唯讚大乘。故次明之。言等所求者。無不求故。佛地名爲正所求智。謂唯菩薩正能求故。鈔言等所求下。是疏釋經義在釋文。

疏文中。初明所求。卽一切智。此所求智。卽是無量菩薩所依。而言道者。通因果也。爲諸已下。卽成所依。義謂由無量菩薩。爲欲調伏諸有情故。發起加行。要以佛增上力故。聞法爲先。獲得妙智。而爲所依。令其發起廣大欲樂者。卽是調伏有情加行。受持修習者。卽成智之因。鈔此所求智。卽是無量菩薩所依者。卽是無性釋。而言道下。是疏釋經。謂由無量菩薩。本論此下。更有文云。異類菩薩。攝受付囑。展轉相續。無閒而轉。由此證得一切菩薩等所求智。釋曰。此卽疏中所成之智。謂依此智化生。令生成於此智。故菩薩皆求。

成就一切諸佛功德。圓滿熾盛。無邊妙色莊嚴其身。一切世閒靡不現覩。永離一切障礙之法。於一切法眞實之義。已得清淨。於功德法而得自在。

疏第十六。成就一切下。明得佛無二住勝彼岸。卽觀察如來平等法身。波羅蜜多。成滿功德。爲遮所化。於大師所疑一切智。非一切智。故次明之。由滿諸度。是一切智。言無二者。卽平等也。平等有二。一法身平等。於法身中。滿諸度故。二果位諸度。無增減故。名爲平等。親光則以住於法身。卽是彼岸。不說諸度。故云法身無差別。相名爲無二。緣彼勝定。常住其中。故名爲住。卽無二住。名勝彼岸。佛已窮到。故名爲得。鈔由滿諸度下。疏取意答前疑也。從言無二者。卽無性菩薩。以彼經文。會於本論。從平等有二下。釋義。二義皆無性。論云。依平等法身。波羅蜜多。果位成滿故。卽前意也。論云。或平等無減無增。於法身中。波羅蜜多。一切成滿。其中無有或增或減。非如於彼菩薩地中。波羅蜜多有增有減。釋曰。卽後意也。二中前義平等。屬於法身後義平等。屬於諸度。然皆法身是所滿。諸度是能滿。下親光法身。卽是波羅

蜜多世親同無性前義。

疏文中初滿諸度。故云熾盛。次無邊下。以度滿故。莊嚴法身故。法華云。微妙淨法身。具相三十二。以八十種好。用莊嚴法身。以十身圓融。不相離故。言一切世間者。不隔凡聖。靡不現觀。雙現受用變化之身。永離已下。無二礙故。和合識破。相續心滅故。於一切下。顯現法身。智純淨故。於功德下。諸度滿故。鈔和合識破。即起信意。前文已有。下復重明。

大方廣佛華嚴經疏鈔會本卷七十七

爲大法王。如日普照。爲世福田。具大威德。於一切世間。普現化身。放智慧光。悉令開悟。欲令衆生知佛具足無邊功德。以無礙縉。繫頂受位。隨順世間。方便開導。以智慧手。安慰衆生。爲大醫王。善療衆病。一切世間。無量國土。悉能徧往。未曾休息。清淨慧眼。離諸障翳。悉能明見。於作不善惡業衆生。種種調伏。令其入道。善取時宜。無有休息。若諸衆生。起平等心。卽爲化現。平等業報。隨其心樂。隨其業果。爲現佛身。種種神變。而爲說法。令其悟解。得法智慧。心大歡喜。諸根踊躍。見無量佛。起深重信。生諸善根。永不退轉。

疏第十七爲大法王。下。明不相閒雜。如來解脫妙智究竟。卽觀察如來隨其勝解。示現差別佛土功德。以外人聞上平等。謂同一性。故次說言不相閒雜。謂一切如來十身體用。各各別故。猶如冥室千光。鈔謂一切如來下釋義。此是疏家總釋經中不相閒雜義。

疏但經云如來解脫。無着釋云。隨其勝解。世親無性皆云。此中勝解。名爲解脫。鈔但經云下。會經論異。第一引二論釋。明本論同經。故云勝解。名爲解脫。云何勝解得名解脫。勝解謂於境印持爲性。如於大地作黃金解。便成黃金。一作多解。便爲多矣。斯則不思議作用解脫。如淨名得能令須彌入芥子等。疏又勝解者。通機及佛。故無性云。謂觀衆生勝解差別。現金銀等土。不相閒雜。如來勝解。現在前時。隨衆生樂。皆悉顯現。無不了知。名如來解脫等。

疏親光又爲一釋。卽離障解脫。故云如來妙智。令衆生解脫。名如來解脫妙智。佛於此智。已得究竟。

疏觀今經中諸論各得一意。

疏復應加佛自得離障及作用解脫。謂文云。離諸障翳。故具無邊德。故令其入道。故明見善惡。是如來勝解。其心所樂。即衆生勝解。是以不可偏取。下經但云。具足如來平等解脫。鈔復應加佛自離障者。以親光但令衆生離故。

疏在文分二。初明變化身土不雜。二明受用身土不雜。無著但云。差別佛土。略舉一邊。親光則雙明身土。合今文意。今初變化中。先身後土。初中先總顯化身超勝。次普現者。通十法界身。放智慧光。合如日義。欲令已下彰所化意。能爲多化。方顯佛德無邊。所以名不閒雜者。以於一切世閒普化。一佛既爾。餘何所化。故知所屬不同。重重皆徧。是不閒雜義。鈔所以名不閒雜下。隨難別釋。即是釋經於中先問後。故知所屬不同。釋所屬不同。即無雜義。如千燈各異。重重皆徧。是無閒義。如光光涉入。故上總言。如冥室千光。

疏後以無礙下。別化因圓果滿之身。初明因圓。爲大醫下。現果滿身。二一切世下。明現化土。初明非唯能化。亦能徧往清淨慧下。明佛觀機。即是如來勝解現前。於作不善下。隨機現土等。隨諸衆生。應以何國起調伏心。入佛智慧。而取佛土。故云善取時宜。無適淨穢。故云種種。欲該餘化。略無土言。義必含有。又對後平等。但言不善。亦應含有有漏之善。

疏二。若諸衆生下。現受用身土。先土後身。已證真如。名平等心。觀受用土。是平等報。上則心有高下。此則依於佛慧。鈔上則心有高下。即淨名經意。螺髻語舍利弗。仁者心有高下。不依佛慧。故見此土爲

不淨耳。今指上化土。是隨心高下。今見受用。是依佛慧。

疏後隨其心樂下。現受用身。故親光云。於淨佛土。現受用身。亦不相雜。令其已下。明現之益。親光云。大集會中。現種種身。與諸菩薩。受用法樂。亦不相雜。得智心喜等。皆法樂也。又心大歡喜。卽是初地。見諸佛故。生歡喜等。以證生信。故名深重。以證不退。故得永言。

一切衆生。隨業所繫。長眠生死。如來出世。能覺悟之。安慰其心。使無憂怖。若得見者。悉令證入。無依義智。智慧善巧。了達境界。莊嚴妙好。無能映奪。智山法芽。悉已清淨。或現菩薩。或現佛身。令諸衆生。至無患地。無數功德之所莊嚴。業行所成。現於世間。一切諸佛。莊嚴清淨。莫不皆以一切智業之所成就。

疏第十八。一切衆生下。明證無中邊佛平等地。卽觀察如來三種佛身。方處無分限功德。由疑上如來妙智究竟。非一非異。其相云何。故次明此。無中邊等。常無常等。皆二邊相。言方處者。謂諸世界。無分限者。釋無中邊。此無中邊。略有四義。一。世界無中邊。佛德如彼。無有分限。二。世界無邊。諸佛十身。卽於其中。稱世界量。平等徧滿。三。此法身等於佛地中。平等徧滿。無中無邊。無有分限。四。此法身等。徧一切處。爲諸衆生。現作饒益。然非自性。無中無邊。親光復名此爲真如。相殊勝功德。謂真如相。無有中邊。如此真如。卽是佛地平等法性。證此性故。徧知一切。於中不染。今此文中。總顯十身。皆無分限。鈔由疑上。如來妙智下。生起。此但發揮前義耳。此無中邊下。總會論以釋其義。初之四釋。皆無性意。然此四意。異者。一。以世間爲喻。二。佛身滿世界中。上二皆用世界。三。法身徧佛地中。四。以契中道故。然疏取意義。則已周。若具無性之文。云。謂如世界無中邊。佛地亦爾。功德方處。無有分限。或復世界方處無邊。諸佛三

身。卽於其中稱世界量。平等徧滿。以法身卽住如是諸世界中。非餘處故。或法身等於佛地。中平等徧滿。無中無邊。無有分限。或此法身等徧一切處。爲諸衆生現作饒益。然非自性無中無邊。釋曰。以疏四段對之可知。則親光意義同後一。

疏文中分二。先別顯四智十身。後無數下。總結因果。今初。先就覺他。翻明白覺。成就法身。於中先明覺他。卽妙觀察智。及成所作智之所利樂。若得見下。彰其所益。無依義智。卽大圓鏡。是無中邊。佛平等地。以無礙智身。無所依故。則證真如。爲佛地性。轉昔染依。爲智所依。卽是如如。及如智。旣令他證。顯自己證也。次智慧下二句。卽妙觀察智。莊嚴無奪。顯圓鏡智所現之影。智山清淨。卽平等性智。平等高出。所以名山。四惑已亡。故云清淨。因惑爲種。生必待時。今能生自在。故種受芽稱。或現已下。卽平等性所現之影。兼顯十身。不唯此二。故復言。或令諸衆生至無患地者。卽成佛地。以遠離微細念故。名爲無患。鈔以無礙智身者。卽引出現品。成大圓鏡智。是無依義智。故彼文云。一切佛法依慈悲。慈悲又依方便立。方便依智智依慧。無礙慧身無所依。然無礙慧卽根本智。二智收四根本。收大圓鏡故。餘轉依等義。如十地說。四智之義。已如前說。因惑爲種。下釋法身清淨。清淨字。兩徧用之。故云悉已。謂七識在因。四惑相應。但能領覽內緣。內熏而成種子。今無四惑。卽此七識能生自在。更不內熏。故云爾也。

疏後總結中。初總明。謂十力四智等。莊嚴法身業行所成。卽是報佛。現於世間。結他受用。及變化身。總上諸義。則有十身。鈔總上諸義者。一就覺他。翻明白覺。是菩提身。二成就法身。及顯如如。卽法身。三四智。卽智身。四莊嚴妙好。卽相好莊嚴身。五無能映奪。卽威勢身。六無數功德。卽福德身。七或現菩薩。

等。卽意生身。八。令生離惑。卽是願身。及九變化身。十。業行所成現於世間。卽力持身。故云具十。疏一切已下。總結異因同歸一智。謂智導萬行。故能證此佛平等地。若報若化。無不清淨。

常守本願。不捨世間。作諸衆生。堅固善友。清淨第一。離垢光明。令一切衆生。皆得現見。六趣衆生。無量無邊。佛以神力。常隨不捨。若有往昔。同種善根。皆令清淨。而於六趣一切衆生。不捨本願。無所欺誑。悉以善法。方便攝取。令其修習清淨之業。摧破一切諸魔鬪諍。

疏第十九。常守本願下。明極於法界。卽觀察如來窮生死際。常現利益安樂。一切有情功德。以上言無中邊相。云何無相故。次云極於法界。謂此法界最清淨故。離諸戲論。是法界相。能起等流利益之事。極此法界。無有盡期。親光亦名此德。爲證得果。相殊勝功德。謂此窮於清淨法界。如是法界。修道得故。以斯則極法界言。有於二義。一同法界常故。二同法界清淨故。鈔以斯下。疏會二論。以就經文。常卽前無性意。清淨卽親光意。

疏文中。先明常利樂。二廣利樂。今初常守本願者。謂本發心。法界生界。若有盡。我願乃盡。今生界未窮。故常現利樂。作善友者。世之善友。略有七事。一。遭苦不捨。二。貧賤不輕。三。密事相告。四。遞相覆藏。五。難作能作。六。難與能與。七。難忍能忍。如來亦爾。爲物隨於六趣。苦而不捨。貧無法財。而不見輕。本性客塵。無不相告。善根未熟。則以權覆實。堪眞實化。則以實覆虛。著弊垢衣。執除糞器。爲難作能作。解髻明珠。爲難與能與。生違佛化。乃至多劫。心無退動。爲難忍能忍。無不究竟。方明堅固。鈔如來亦爾下。善友七事。略無次第。義無不具。前三通諸教。四善根已下。卽法華意。則於一佛乘。分別說三。爲權覆實。會二

歸一示眞實相。卽以實覆虛。上卽法說周意。五著弊垢衣。卽信解品意。謂不說十蓮華藏之相。故云脫珍御服。而說三十二相等。爲著弊垢衣。久證菩提。示以三十四心斷結等。爲執除糞器。六卽安樂行品。輪王解髻明珠喻。一乘圓旨。喻若明珠。昔爲權覆。如在髻中。開權顯實。爲解髻與珠。七意亦通。

疏次清淨已下。明同法界清淨。雖復常化。離能所相。故名第一次六趣下。廣多不捨。次若有已下。不捨昔緣。次而於下。通顯不捨。若暫不隨。則捨本願。如願能作。名不欺誑。次悉以下。彰攝巧益。令同法界清淨。摧魔惑故。

從無礙際。出廣大力。最勝日藏。無有障礙。於淨心界。而現影像。一切世間。無不覩見。以種種法。廣施衆生。佛是無邊光明之藏。諸力智慧。皆悉圓滿。恆以大光普照衆生。隨其所願。皆令滿足。離諸怨敵。爲上福田。一切衆生。共所依怙。凡有所施。悉令清淨。修少善行。受無量福。悉令得入無盡智地。爲一切衆生種植善根。淨心之主。爲一切衆生發生福德。最上良田。智慧甚深。方便善巧。能救一切三惡道苦。

疏第二十。從無礙際下。顯於二句。謂盡虛空性。窮未來際。卽觀察如來無盡等功德。謂上利樂皆無盡。故深密佛地具斯二句。開則別中。自有二十一。句下。離云。開。但云等虛空界。而無窮未來際。欲顯圓數。故親光亦云。次後二句。顯示世尊無盡功德。初句自利。後句利他。故云。謂如虛空。經成壞劫。性常無盡。如來一切眞實功德。亦復如是。如未來際。無有盡期。利他功德。亦復如是。而無著釋。但云無盡功德等。不言開合。世親無性。開此等字。爲究竟功德。故皆云等。言等取究竟功德。則以無盡功德釋初句。究竟功德釋後句。而無性意。後句是究竟無盡。與前無盡異者。前則橫論無盡。故云盡一切界。徧作有情諸。

饒益事後句則豎顯無盡。故云顯佛功德永無窮盡。所化有情永無盡故。同顯無盡。故二句合。自他等異。二句則開。今文意合。欲顯二利不相離故。窮未來際。通在極於法界。及盡虛空故。鈔六。今文下顯。今經意雖合。而具無性二義利故。

疏前段中已顯常隨不捨。鈔前段中者謂無性卽向盡虛空下二句。明二利無盡。今顯極於法界中。已有利樂無盡。

疏爲順二論文分爲兩。初唯橫論無盡。正明盡虛空性。二爲上福田下。雙約橫豎以顯無盡。兼明窮未來際。今初先二句總言無礙際者。卽法身智身。如彼虛空。無有障礙。無邊無際。無盡無滅。無生無滅。無有變易。名無礙際。而能現前作諸利樂。如彼虛空。容受質礙。故云出廣大力。次最勝日下。別顯依空無礙之用。略舉一日而有四德。一蘊藏千光。二百川現影。三有目皆覩。四生成萬差。名種種施。上一段文言合法喻。佛是已下。唯就法說。初光明藏卽上日藏。身智光明。含攝出生故。諸力已下。如日無缺。恆以大下。如日舒光。離諸魔敵。降老死冤。如日大明。衆景奪耀。不獨合上。故文有影略。鈔降老死怨者。淨名云。譬如勝怨。乃可爲勇。如是兼除老病死者。菩薩之謂也。今借用之。

疏二雙約橫豎論無盡者。但云一切通於十方。及來際故。文中先明爲生福智之田。上福田者。具前德故。凡所有下。釋上田義。三義名上。一令清淨。如無荒穢。二因少果多。如涅槃說純陀施福。三入無盡智。如田隨種隨生。如穀展轉無盡。成金剛種。終不銷故。具斯三義。稱曰上田。次爲一切下。顯爲田主。次爲一切衆生發生下。明體卽是田。後智慧下。明能爲田義。具悲智故。初權實無二。總爲一智。對下能救悲。

智無礙。合爲一心。則是如來最清淨覺。鈔則是如來最清淨覺者。以在最後。故復結之。句句亦皆合結也。如涅槃說者。經云。我今所供。雖復微少。下佛令汝具足。檀波羅密。爲果多也。

疏上所引功德之名。全依無著。其所解釋。多依無性。有不同者。亦已對決。與世間品。小有同異。大旨無違。至下品中。當更顯示。依上所釋。文旨有據。德相可分。若列宿羅空。粲然不雜。豈得寬文。廣申辭句。於佛勝德。蔑然略陳。幸諸後學。不咎其繁。而不要也。別觀德相二十段竟。

如是信解。如是觀察。

疏第三如是下。結成觀解。謂前諸德。不出內德。及與外相。今初二句。總明能觀。信解約於仰推。觀察通於諸眼。

如是入於智慧之淵。如是遊於功德之海。如是普至虛空智慧。如是而知衆生福田。

疏後之八句。就所觀德。以辨能觀。前四內德。後四外相。前中謂佛內德無量。不出福智。前二福智之體。智慧之淵。略語其深。功德之海。義兼深廣。淵宜趣入。海宜游涉。次二句福智之用。智廣虛空。福無不益。稱此而了。名普至知。

如是正念現前觀察。如是觀佛諸業相好。如是觀佛普現世間。如是觀佛神通自在。

疏後四外相中。初一句重舉能觀。揀內外故。言正念者。明非散心。了佛德相。唯心無性。靜而能鑒。復云觀察。後三句亦就所觀。以辨能觀。初一句總。後二句別。身雲普現。卽是相好。神通自在。卽前業用。前二十一德中。或一句之內。言兼福智。一德之內。體用雙明。若別配屬。義成偏近。鈔若別配屬者。正彈古

德。以後十結句。科上二十一德之經。彼云然。此所現佛法界身。豈有有限量。今且依下結文。分爲十門。於中二。先顯十門之德。後如是下。正結十門之名。前中卽爲十段。然按後結。少不次第。從初至清淨善根已來。超明第十見佛。示現不可思議自在神力門。彼約晉經。與今小異。恐尋不曉。會取今經。今經卽至功德善根。悉已清淨。爲第一段。神通自在。第二已去。全依今經。謂第二從色相。第一下。卻明第一如是信解門。第三獲一切智。放大光下。第二觀察正覺門。第四示現色身。不思議下。明入智慧淵門。第五恆以佛日普照法下。第四入功德海門。第六以大慈悲。現不可說無量佛身下。明第七正念現前觀察門。第七以智慧月下。明第五普至虛空智慧門。第八放光明網普照十方下。卽第八觀察如來諸業相好門。第九爲大法王。如日普照下。卻明第六如是而知衆生福田門。第十清淨第一離垢光明下。卻明第九如是觀佛普現世間門。釋曰。此卽賢首解爲十門。以其總名。收其別義。皆不盡理。故云偏近。况結中不出內德外相。內德不出福智。如何攝得前文。又刊定記科爲十六三業。而段段之中。三業多闕。亦消文不盡。故皆偏近。依今之釋。一句無遺矣。

時彼大衆。見如來身。一一毛孔。出百千億那由他阿僧祇光明。一一光明。有阿僧祇色。阿僧祇清淨。阿僧祇照明。令阿僧祇衆觀察。阿僧祇衆歡喜。阿僧祇衆快樂。阿僧祇衆深信增長。阿僧祇衆志樂清淨。阿僧祇衆諸根清涼。阿僧祇衆恭敬尊重。

疏第二時彼大衆下。明見佛光用。前雖有用。乃觀如來常所具德。今現目覩。故不同也。文中三。初觀常光。二觀放光。三顯光意。今初雖云毛出。意取常出。有十一句。初總餘別。前三光相。後七光益。

爾時大衆咸見佛身。放百千億那由他不思議大光明。一一光明。皆有不思議色。不思議光。照不思議無邊法界。

疏二、爾時下。觀放光中。先舉體相。

以佛神力。出大妙音。其音演暢百千億那由他不思議讚頌。超諸世間所有言詞。出世善根之所成就。復現百千億那由他不思議微妙莊嚴。於百千億那由他不思議劫。歎不可盡。皆是如來無盡自在之所出生。又現不可說諸佛如來出興於世。令諸衆生入智慧門。解甚深義。又現不可說諸佛如來所有變化。盡法界虛空界。令一切世間平等清淨。如是皆從如來所住無障礙一切智生。亦從如來所修行不思議勝德生。復現百千億那由他不思議妙寶光燄。從昔大願善根所起。以曾供養無量如來。修清淨行。無放逸故。薩婆若心。無有障礙。生善根故。

疏後以佛下。辨光業用。文有五現。一說法。二現嚴。此二皆先現後因。三現佛。則先現後意。令成教證。二甚深故。四現神變。五現寶燄光。皆先現後因。

爲顯如來力廣徧故。爲斷一切衆生疑故。爲令咸得見如來故。令無量衆生住善根故。顯示如來神通之力。無映奪故。欲令衆生普得入於究竟海故。爲令一切諸佛國土菩薩大衆。皆來集集故。爲欲開示不可思議諸法門故。

疏第三。爲顯下。現光意。並顯可知。

爾時如來大悲普覆。示一切智所有莊嚴。

疏第二、爾時如來下。明現勝德之意。文分二別。先牒前現德。悲爲能現。智爲所現者。影略其文。應以依二嚴體現二嚴德。

欲令不可說百千億那由他阿僧祇世界中衆生。未信者信。已信者增長。已增長者令其清淨。已清淨者令其成熟。已成熟者令心調伏。觀甚深法。具足無量智慧光明。發生無量廣大之心。薩婆若心。無有退轉。不違法性。不怖實際。證真實理。滿足一切波羅密行。出世善根。皆悉清淨。猶如普賢。得佛自在。離魔境界。入諸佛境。了知深法。獲難思智。大乘誓願。永不退轉。常見諸佛。未曾捨離。成就證智。證無量法。具足無邊福德藏力。發歡喜心。入無疑地。離惡清淨。依一切智。見法不動。得入一切菩薩衆會。常生三世諸如來家。疏二、欲令下。正明現意。分二。先明下益衆生。二開示如來下。明上弘佛道。今初分二。先彰現益。後世尊下。辨現益之因。今初先舉所益。後未信下。辨益不同。然此益中文含多勢。且依一判。先約行布。初五。十信。始自初信。令心調伏。信位滿故。次七句。皆十住益。謂初二句。是住中觀慧。次二句。下化上求之心。後三句。住中證入。知心自性。故曰不違。不退二乘。故不怖實際。不由他悟。是證實理。圓教十住。許人證故。三。滿足下三句。十行益。初句。位中之行。後二句。位中之德。四。離魔下三句。十向益。初句。起行。一向利他。離二乘等魔。迴向菩提。故入佛境。次句。得法。隨相離相。無礙難思。後句。行成。五常見諸佛下。盡明十地。初四句。皆歡喜地。一見受用身。故稱曰常。二根本證真。後得證無量法。又證徧行真如。亦名無量。三。則僧祇積福。證理出生。名福藏力。四發歡喜心。是此位名。入見道故。名無疑地。離惡清淨。是第二地。依一切智。見法不動。是三四地。得入一切菩薩衆會。是五六七地。常生佛家。八地已上。念無有閒。故曰常生。

若約圓融。初之五句。信中攝位。句各一位。如理思之。鈔句各一位者。初信位。二增長是住位。三清淨是行位。四成熟是向位。五調伏是地位。

疏從觀甚深下。義通諸位。以圓教中。位位攝德故。

世尊所現如是莊嚴。皆是過去先所積集善根所成。爲欲調伏諸衆生故。

疏二辨現因。旣積善所成。故爲益深大。爲欲調伏諸衆生故。一句文含二勢。一結前。謂結因所屬。二生後。生後開示。亦是爲生。

開示如來大威德故。照明無礙智慧藏故。示現如來無邊勝德。極熾然故。顯示如來不可思議大神變故。以神通力於一切趣。現佛身故。示現如來神通變化。無邊際故。本所志願。悉成滿故。顯示如來勇猛智慧。能徧往故。於法自在。成法王故。出生一切智慧門故。示現如來身清淨故。又現其身最殊妙故。顯示證得三世諸佛平等法故。開示善根清淨藏故。顯示世間無能爲喻上妙色故。顯示具足十力之相。令其見者無厭足故。爲世間日照三世故。

疏第二明上弘佛道中分二。先別彰所爲。二自在已下。舉因結歎。前中有十七句。爲欲顯前二十一種殊勝功德。初句爲總。餘皆是別。於中前五各攝二德。餘句各一。第一照明無礙智慧藏句。顯二德者。一顯不二現行。故云無礙。無二礙故。二顯趣無相法。故云照智慧藏。慧爲能照。藏卽所照。無相真如。照明趣達。眼目殊稱。第二句。一顯住於佛住。謂住空大悲。任運利樂。無休息時。名曰熾然。二顯逮得一切佛平等住。謂依清淨智。起利樂意。作二身業。皆熾然故。第三句。一顯到無障處。二顯不可轉法。謂此二是

降魔伏外功德。前由有對治。則不爲他動。今由有神變。乃能轉他。第四句。一爲顯所行無礙。今徧趣現身。卽是所行有漏盡通。八風不染。又神通力。卽能徧因。二顯其所安立不可思議。謂佛威神所建立故。第五句。初顯游於三世平等法性。約記三世事。亦是神通。無邊際言。卽平等性。二顯其身流布一切世間。此言甚顯。下皆各攝一德。六顯於一切法。智無疑滯。本願已滿故。七顯於一切行。成最正覺。名智徧往。八顯於諸法。智無有疑惑。名於法自在。九顯一切菩薩等所求智。十顯凡所現身。不可分別。十一爲顯得佛無二。住勝彼岸。彼岸已圓。十身殊妙故。十二顯不相間雜。如來解脫妙智。究竟功德。又諸佛平等。皆徧而不相雜故。十三顯證無中邊。佛平等地。平等之地。卽清淨藏。十四顯極同法界。故云上妙。十五有十力故。能盡虛空。見者無厭。十六窮未來際。故照三世。

自在法王。一切功德。皆從往昔善根所現。一切菩薩於一切劫。稱揚讚說。不可窮盡。

疏第二。舉因結歎。前舉積因。後歎無盡。五觀佛勝德竟。

爾時兜率陀天王。奉爲如來嚴辦。如是諸供具已。與百千億那由他阿僧祇兜率天子。向佛合掌。白佛言。善來世尊。善來善逝。善來如來。應正等覺。唯見哀愍。處此宮殿。

疏第六。爾時兜率下。天王請佛處殿。亦稱五號。並曰善來。及下文意。皆如第三會說。鈔亦稱五號者。一世尊。二善逝。三如來。四應供。五正徧知。然尋常略舉下三。今加上二。故爲五德。

爾時世尊以佛莊嚴。而自莊嚴。具大威德。爲令一切衆生。生大歡喜故。一切菩薩發深悟解故。一切兜率陀天子。增益欲樂故。兜率陀天王。供養承事無厭足故。無量衆生。緣念於佛而發心故。無量衆生。種見佛。

善根福德無盡故。常能發起清淨信故。見佛供養無所求故。所有志願皆清淨故。勤集善根無懈怠故。發大誓願求一切智故。受天王請入一切寶莊嚴殿。

疏第七、爾時世尊下。如來受請分二。先受請入殿。二爾時一切下。入已現嚴。前中先明此界。後辨結通。前中初一句。明能應之德。次明所爲之意。三正受請。並顯可知。

如此世界十方所有一切世界。悉亦如是。

爾時一切寶莊嚴殿。自然而有妙好莊嚴。出過諸天莊嚴之上。一切寶網。周匝彌覆。普雨一切上妙寶雲。普雨一切莊嚴具雲。普雨一切寶衣雲。普雨一切旃檀香雲。普雨一切堅固香雲。普雨一切寶莊嚴蓋雲。普雨不可思議華聚雲。普出不可思議妓樂音聲。讚揚如來一切種智。悉與妙法。而共相應。如是一切諸供養具。悉過諸天供養之上。

疏第二、現嚴顯是佛力。故出過諸天。

時兜率宮中。妓樂歌讚。熾然不息。以佛神力。令兜率王。心無動亂。往昔善根。皆得圓滿。無量善法。益加堅固。增長淨信。起大精進。生大歡喜。淨深志樂。發菩提心。念法無斷。總持不忘。

疏第八、時兜率宮下。天王獲益。文中初得定益。往昔已下。是進善益。佛神力言。通此二益。十住位劣。攝散歸靜。故樂音止息。此位超勝。得動實性。故動寂無二。熾然音樂。心不動也。

爾時兜率陀天王。承佛威力。卽自憶念過去佛所種善根。而說頌言。

疏第九、爾時下。承力偈讚。然憶念昔因。亦是益相。取文便故。爲說偈依。文中二。先明此處偈讚。後結通。

十方前中先說偈依。

昔有如來無礙月。諸吉祥中最殊勝。彼曾入此莊嚴殿。是故此處最吉祥。
昔有如來名廣智。諸吉祥中最殊勝。彼曾入此金色殿。是故此處最吉祥。
昔有如來名普眼。諸吉祥中最殊勝。彼曾入此蓮華殿。是故此處最吉祥。
昔有如來號珊瑚。諸吉祥中最殊勝。彼曾入此寶藏殿。是故此處最吉祥。
昔有如來論師子。諸吉祥中最殊勝。彼曾入此山王殿。是故此處最吉祥。
昔有如來名日照。諸吉祥中最殊勝。彼曾入此衆華殿。是故此處最吉祥。
昔有佛號無邊光。諸吉祥中最殊勝。彼曾入此樹嚴殿。是故此處最吉祥。
昔有如來名法幢。諸吉祥中最殊勝。彼曾入此寶宮殿。是故此處最吉祥。
昔有如來名智燈。諸吉祥中最殊勝。彼曾入此香山殿。是故此處最吉祥。
昔有佛號功德光。諸吉祥中最殊勝。彼曾入此摩尼殿。是故此處最吉祥。
疏後正陳偈讚十頌。頌各一佛。佛名有異。略無別德。餘同前會。此佛卽前會十佛。次前十佛。寄位漸深。憶念漸遠耳。

如此世界兜率天王。承佛神力。以頌讚歎過去諸佛。十方一切諸世界中。兜率天王。悉亦如是。歎佛功德。爾時世尊於一切寶莊嚴殿。摩尼寶藏師子座上結跏趺坐。
疏第十。爾時世尊下。如來就座。文分四別。一明就座。

法身清淨。妙用自在。與三世佛同一境界。住一切智。與一切佛同一性。佛眼明了。見一切法。皆無障礙。有大威力。普遊法界。未嘗休息。具大神通。隨有可化衆生之處。悉能徧往。以一切諸佛無礙莊嚴。而嚴其身。善知其時。爲衆說法。

疏二、法身下顯德亦大同前二十一德。恐厭繁文。不能具釋。

不可說諸菩薩衆。各從他方種種國土。而共來集。衆會清淨。法身無二。無所依止。而能自在起佛身行。疏三、不可說下衆集。卽眷屬圓滿。然後品衆集。有所表故。但云一萬。理實徧集。故此但云不可說衆。未必但是後品之人。

坐此座已。於其殿中。自然而有無量無數殊妙好。出過諸天供養之具。所謂華鬘。衣服。塗香。末香。寶蓋。幢旛。伎樂。歌讚。如是等事。一一皆悉不可稱數。以廣大心。恭敬尊重。供養於佛。十方一切兜率陀天。悉亦如是。

疏四、坐此座下。現嚴初。此界後。結通。有云。此升座一段。宜置入殿之後。歎處之前。迴文不曉者。未必然也。謂初請入殿。讚爲請坐。於理何違。鈔有云。下。敍刊定破經。二未必然也。總非三謂初請入下。出其正理。彼破意云。謂入殿卽坐。坐竟方歎。故合迴文。今明初入殿。竟。次卽歎處。請坐。後方受請。於理何失。

